

GB96



সরোজ কুমার

গ্রন্থবাণী
পুস্তক প্রকাশক ও বিক্রেতা
১৬ ম্যান্ডো লেন, কলিকাতা-১

শ্রী সরোজ কুমার রায়চৌধুরী

গ্রন্থবাণী
১৬ ম্যান্ডো লেন, কলিকাতা-১

প্রকাশক
শ্রীমুন্সীল মণ্ডল

মণ্ডল বুক হাউসের
প্রথম সংস্করণ—মাঘ ১৩৬৬

দাম ছুটাকা পঞ্চাশ নয়া পয়সা।

প্রচ্ছদপট এঁকেছেন
শ্রীগণেশ বসু

এশিয়ান প্রিন্টার্স থেকে
শ্রীমূলভ কুমার বসু
কল্কাত্ত মুদ্রিত



ক্ৰীশচীন্দ্রনাথ সেনগুপ্ত

প্রিয়বরেষু—

এই লেখকের

আকাশ ও মৃত্তিকা

হংস বলাকা

কুকা

ঘরের ঠিকানা

শৃঙ্খল

নতুন ফসল :

ময়ূরাক্ষী

গৃহকপোতী

সোমলতা

কালোঘোড়া

মহাকাল

শতাব্দীর অভিষাপ

পান্থনিবাস

গুরু সন্ধ্যা

মধুমিতা

তিমির-বলয়

(১ম ও ২য় পাঠ)

সোম-সবিতা

শ্রেষ্ঠ গল্প

নীলাঞ্জন

অতুষ্ণ পৃষ্ঠা

কুশাহ

মনের গহনে

সুখা

বন্ধনী

হালদার সাহেব

মুদ্র

বন্ধু, আমাকে এই ছোট মেসে দেখে তুমি অবাক হয়ে গেছ। এবং এখানে আমার অত্যন্ত ক্লেশ হচ্ছে ভেবে উদ্বেগও প্রকাশ করেছে। এ জগতে মানুষের জন্মে মানুষের আন্তরিক উদ্বেগ অবশ্যই সুদূর্লভ। এজন্মে নিশ্চয়ই তোমায় ধন্যবাদ দিতাম। কিন্তু তুমি তো জান না—তুমি ভাবতেই পার না, অত্যন্ত পুরোণো, ভাঙা বাড়ীর একখানি প্রায়াক্রমিক ঘরে আমরা ক’টি হতভাগ্য প্রাণীতে ঘেসাঘেসি করে কি আনন্দেই দিন রাত্রি যাপন করি। এর আগে তুমি আমায় দেখেছ বড় বাড়ীর সুসজ্জিত কক্ষে। কিন্তু সেখানে দিন আর কাটতে চাইত না। প্রত্যেক মুহূর্তে আমাকে তার পর মুহূর্ত কাটাবার জন্মে উত্তেজক উপলক্ষ্য সৃষ্টি করতে হত। আর এখানে কি হয় জান? এখানে আমি থাকি নিশ্চিন্তে বসে। ছোট নদীর মতো দিন আমার পাশ দিয়ে বয়ে যায়। নিঃশব্দে নয়, কলকণ্ঠে। তবু জানতে পারি না।

তবে বলি শোন :

সকাল তখনও হয়নি। বাইরে অল্প অল্প ফসাঁ হয়েছে, কিন্তু ঘরে অন্ধকার রয়েছে। শীতের দিনে পাঁচটি প্রাণী এইটুকু ঘরে প্রায় পিঠে পিঠি ঠেকিয়ে নিদ্রামগ্ন। অকস্মাৎ কাণের কাছে একটা ভাঙা শানাই শেষ খাদে বেজে উঠল। ঘুমের ঘোরে শুনলে তাই মনে হয় বটে, কিন্তু ভাঙা শানাই নয়। ওটা ঘোষাল মশায়ের কণ্ঠস্বর। ঘোষাল এই মেসে খান, থাকেন বাইরে।

দরজার গোড়ায় দাঁড়িয়ে তিনি বললেন, এই যে ছুটুবাবু, ঘুমিয়ে আছেন? আমি বলছিলাম, স্নেদের সেই ক'আনা পয়সা আজকে দেবার কথা ছিল। দেবেন কি?

এ কণ্ঠস্বরে ঘুম আমাদের সবারই ভেঙে গেল। ছুটুবাবু পাশ ফিরতে ফিরতে আহত জন্তুর মতো এক প্রকার গৌঁ-গৌঁ শব্দ করলেন। তার অর্থ আমরা কেউ না বুঝলেও, ঘোষাল মশাই বুঝলেন।

চৌকাঠের ওপর উবু হয়ে বসে তিনি নির্লিপ্তভাবে বললেন, যাকগে। আর একটা কথা। কাল রাত্রে নারায়ণের নাম করতে করতে ভেবে দেখলাম, মেসে আমাদের বেশি পড়ছে। এইটে জানাবার জন্তেই বিশেষ করে এত ভোরে আসা।

মানেক্জার বটুক ঘোষ শুয়ে ছিলেন। এইবার ধড়মড় করে উঠে বসলেন। যে বিলিতি কব্বলটা মুড়ি দিয়ে শুয়েছিলেন, সেটা সর্বাঙ্গে জড়াতে জড়াতে বললেন, কি করে?

তাকে অমন অকস্মাৎ উঠতে দেখে ভ্যাবাচ্যাকা খেয়ে ঘোষাল মশাই প্রথমে বললেন, এই যে বটুকবাবু!

কিন্তু তখনই নিজেকে সামলে নিয়ে বললেন, তা একটু বেশি বই কি! প্রথমতঃ বাইরে থাকি, চাকরের পুরো সুবিধা পাই না। অথচ পুরো এস্টারিশমেন্ট চার্জ দিতে হয়। আমি বলি শুমুন, প্যালাটা কংটুকুনই বা খায়? তা হোক। খাওয়ার চার্জ ওর পুরোই পাবেন, কিন্তু এস্টারিশমেন্ট অর্ধেক। ফ্যালার অবশ্য দুইই পুরো হবে। আর আমি তো ছুটিতে—এখনও একমাস আছি। আমার ফ্রেণ্ডস-চার্জ। না পারেন তো বলুন, কাল থেকে তাহলে অগ্রত্ন ব্যবস্থা করব।

তার কণ্ঠস্বর কঠিন।

বটুক ঘোষ অন্ধের মাষ্টার। মনে মনে হিসাব করে দেখলেন,

ঘোষাল মশাই ছুটিতে থাকলেও কলকাতায় যে রকম ঘন-ঘন তাঁর যাওয়া-আসা, তাতে ফ্রেণ্ডস্ চার্জে তাঁর অনেক বেশিই পড়বে সে বিষয়ে সন্দেহ নেই।

বললেন, তাতে কি আপনার সুবিধে হবে ?

ঘোষাল মশাই সোৎসাহে বললেন, অনেক সুবিধে হবে মশাই। বেশ ভালো করে ভেবে দেখেছি। আজকাল কি হয়েছে জানেন, টাকা-পয়সা সম্বন্ধে ভয়ানক হুঁসিয়ার হয়েছি। একটি পয়সা বাজে খরচ হলে মনে হয়, গায়ের এক ফোঁটা রক্ত গেল। টাকার ওপর বড় মমতা বেড়েছে।

টাকার ওপর ঘোষাল মশায়ের মমতা বৃদ্ধি বটুক ঘোষের অঙ্কের হিসাবে ধরা পড়ল না। শুধু আজই নয়, কোনোদিনই ধরা পড়েনি। মানুষের বিপদে তিনি পরের কাছে থেকে চড়া সুদে টাকা ধার করে এনে বিপন্নকে দেন। সুদের তাগাদাও করেন মাঝে মাঝে। কিছু-কিছু সুদ পানও। কিন্তু আসল কখনও পেয়েছেন, ঘোষাল মশায়ের ঘনিষ্ঠ সন্নিধানে থেকেও বটুকবাবু সে খবর এখনও পাননি। যখন টাকা পয়সার হিসাব তিনি করেন, বটুকবাবু সম্বস্ত হয়ে ওঠেন। তাঁর সন্দেহ থাকে না, এর ফলে ঘোষালের লোকসানের অঙ্ক বেড়ে যাবে। কিন্তু সে কথা তাঁকে বলে কে! বললেও তো শুনবেন না!

এই হট্টগোলের মধ্যে কতক্ষণ শুয়ে থাকা যায়! ঘুম-ভাঙার আগেই সুদের তাগাদায় হুটুবাবুর মনটা খিঁচিয়ে গেছে। এতক্ষণে হুটুবাবু উঠে বসেছেন। বিছানায় বসে বসেই তিনি দেওয়ালে বিলম্বিত মহাদেবের মূর্তিকে ঘন-ঘন মাথা নেড়ে প্রাতঃপ্রণাম জানাচ্ছিলেন।

ঘোষাল মশাই তাঁর দিকে ফিরে বললেন, হুটুবাবুকে বলছি, ফ্যালাটাকে তো শেষ কথা বলে দিলাম।

—কি রকম ?

ঘোষাল মশাই বিস্মিতভাবে জিগ্যেস করলেন, শোনেন নি
সেকথা ?

—না।

—ব্যাটা বলে কি না, বাবা বোগাস্ ! সে কি রে বাবা ! বললাম,
বাপু, ‘বোগাস্’ কথাটি যদি শুদ্ধ করে বানান করতে পার, তোমার
হাত-খরচ মাসে ছ’টাকা করে বাড়িয়ে দোব। তিনবার ম্যাট্রিক ফেল
করে বাবার ওপর ইংরিজি ঝাড় !

আমরা হাসি চাপতে চাপতেও হেসে ফেললাম।

ঘোষাল মশাই আমাদের হাসি থামিয়ে দিয়ে উত্তেজিতভাবে
বললেন, কিন্তু আমিও সে বাবা নই। স্পষ্ট বললাম, বাপধন, মাচোঁ
হোমিওপ্যাথি পড়া শেষ হবে। তারপরে আর আমি মোট একশোটি
টাকা তোমায় দোব। ওই নিয়ে যা-করে-হয় নিজের পেটটা
চালাবে। এ ‘বোগাস্ বাবা’র কাছ থেকে আর একটি পয়সাও
পাবে না।

বলে ঘোষাল মশাই যেন আমাদের ওপর রাগ করেই হন্-হন্
করে বেরিয়ে গেলেন।

সঙ্গে সঙ্গে পাশের বাড়ীতে অনেকগুলি নারীকণ্ঠ একসঙ্গে ধ্বনিত
হয়ে উঠল। এইটুকু বললে ব্যাপারটা তোমার বোধগম্য হবে না
জানি। কারণ এ ধ্বনি যে কি ধ্বনি, যে না শুনেছে তার সাধ্য কি
এর রসগ্রহণ করে! উদারা, মুদারা, তারা, তিন গ্রামে গোটা
তেত্রিশেক কণ্ঠ যেন ভাজা খৈএর মতো ফেটে পড়ল। সে শব্দসমুদ্রে
দিঙ নির্ণয় করা অসম্ভব।

এত ভোরে কেন এ কলহ কিছুই বোঝা গেল না। টুকরা

টুকরা কথায় এইটুকু মাত্র বোঝা গেল যে, যে সকল কারণে এই প্রভাতে এতগুলি নারীচিহ্ন বিচলিত হয়ে উঠেছে তার একটি জল, আর একটি লক্ষ্মীপূজা। অনুমান করা গেল, লক্ষ্মীপূজার দিন গুঁদের স্নানের জলের অভাব ঘটেছে। কিন্তু কলহ ক্রমেই বর্তমান কালকে অতিক্রম করে বিদ্যুৎবেগে দূর এবং দূরতর অতীতকালের দিকে অগ্রসর হতে লাগল। গতি কোথাও সরল, কোথাও তির্যক্, কোথাও বা বক্র,—যখন যে ভাবে গেলে প্রতিপক্ষকে পরাস্ত করা যায়।

কিন্তু এত দূর থেকে কে কোন্ পক্ষ নির্ণয় করা আমাদের পক্ষে অসম্ভব। এবং কণ্ঠই যেখানে সর্বশ্রেষ্ঠ ও একমাত্র অস্ত্র, তর্কের বস্ত্র বাক্যের জালে যেখানে প্রতিমুহূর্তে আচ্ছন্ন হয়ে হারিয়ে যাচ্ছে, সেখানে কি করে বল, কোন পক্ষ জিতল আর কোন পক্ষ হারল। তবে বাক্যযুদ্ধের এই একটিমাত্র শ্রেষ্ঠত্ব আমি স্বীকার করি যে, জয়-পরাজয়ের মীমাংসা না হলেও, এবং বিনা আপোষেও, এ যুদ্ধের বিরতিতে বাধা ঘটে না। মানুষের কণ্ঠ আর কিছু না মানলেও ক্রান্তি মানে।

বোধ করি, সেই জগ্গেই ও বাড়ীর কলহ ঘণ্টাখানেকের মধ্যেই ধীরে ধীরে স্তিমিত হয়ে আসতে লাগল। কেবল হাওয়া যাতে একেবারে মিঁয়ে না যায় সে জগ্গে অপেক্ষাকৃত মৃদু সুর একটা বাজতে লাগল। দেখা যেতে লাগল, মেয়েরা একে একে একখানি করে গামছায় নিজেকে যথাসম্ভব আবৃত করে কাপড় মেলে দেবার জগ্গে ছাদে উঠতে লাগলেন। আশা হল, আর পনেরো মিনিট না হোক, আধঘণ্টার মধ্যেই ওটুকু কলগুঞ্জনেরও নিবৃত্তি ঘটবে। কিন্তু মানুষের আশাকে ধ্বংস করবার জগ্গে ভগবানের বজ্র যেন উজ্জত হয়েই আছে।

হুটুবাবু একটা আড়ামোড়া ভেঙে কেবল জিগ্যেস করেছেন, কে গেল? অর্থাৎ পায়খানায় কে গেল? আর বটুক ঘোষ মুক্ত

কচ্ছ পায়ের গোড়ালি দিয়ে পিছনের দিকে ছুঁড়তে ছুঁড়তে কেবল তার উত্তর দিতে যাবেন, এমন সময়ে পাশের বাড়ীতে, লোকেরা নয়, যেন বাড়ীখানাই আবার চীৎকার করে উঠল। মুক্ত কচ্ছ মুক্তই রইল, রইল পড়ে ছুটুবাবুর প্রশ্ন। হাঁ, ভরসা হল বটে স্ত্রী-স্বাধীনতার এখনও কিছু দেরি আছে। কী দৃষ্ট বাক্‌ভঙ্গী! কী অমিত বলশালী কণ্ঠ! তেত্রিশটি নারী তেত্রিশকোটি হয়ে অনর্গল প্রশ্নের পর প্রশ্নে ভদ্রলোককে জর্জরিত করে তুলেছেন। আর ভদ্রলোক চক্ষের পলকে ঘাড়ের মোট মেঝেয় নামিয়ে আপনার ভারী কণ্ঠস্বরে সমস্ত আওয়াজ যেন ধামাচাপা দিয়ে দিলেন। মনে হল, তাঁর আর প্রতিপক্ষ নেই। একাই ইচ্ছে করে খানিক গলার কসরৎ করছেন। রমণীর স্বরলহরী তাঁর সুরের সুরধুনীতে বিলীন হয়ে গেল।

ছুটুবাবু বিরক্ত হয়ে বললেন, আঃ! ও লোকটাও বাজারের পয়সা চুরি করতে ছাড়বে না, মেয়েরাও চ্যাঁচাতে ছাড়বে না। মাঝে থেকে আমাদের হয়েছে মরণ।

বটুক ঘোষ মুক্ত কচ্ছ যথাস্থানে সন্নিবেশ করতে করতে বললেন, রোজই কি আর চুরি করে মশাই? বিড়ির পয়সার টানাটানি পড়লে এক আধ দিন হয়তো করে। দেখছেন না, মেয়েরা যেন ওকে কি পায়!

—পায়, না হয় বুঝলাম। কিন্তু ওরই বা এ কেলেকারী করতে রোজ রোজ যাওয়া কেন? না গেলেই তো পারে!

—না গেলে যাবে কে? সবারই চাকরী আছে, কেবল ওই বেচারাই বেকার। একটা কিছু না করলে চলবে কেন? সূতরাং ওরই ওপর চাপ পড়ে।

একটু হেসে বটুক ঘোষ বললেন, ওরও কি আর স্বার্থ নেই? আছে।

ছুটুবাবু উঠে বসে গেঞ্জি পরতে পরতে বললেন, সেই কথাই বলছি।

হুটুবাবুকে গেঞ্জি পরতে দেখে বটুক ঘোষ তাড়াতাড়ি বাইরের দিকে পা বাড়ালেন।

তা দেখে শুধুমুখে হুটুবাবু জিগোস করলেন, আপনি চললেন না কি ? একটু তাড়াতাড়ি আসবেন। আমার আবার কাল থেকে...তার ওপর খিচুড়ীও খেয়ে ফেললাম অনেকটা...

হুটুবাবু বিড় বিড় করে বলতে লাগলেন, একটা পায়খানা... আমাদের হয়েছে পয়সা কম...নইলে ..

হুটুবাবু আর একবার গা গড়িয়ে নেবেন কি না ভাবতে লাগলেন। আর বটুক ঘোষ সিঁড়ি দিয়ে নামতে লাগলেন। দেখেছ তো, আমাদের সিঁড়ির প্রতি ধাপে এক জোড়া করে জুতো। সেখানে ছাড়া জুতো রাখার জায়গাও আর নেই।

বটুক ঘোষ নামতে লাগলেন। তিনি নিচের দিকে বড় একটা চান না। জুতোগুলো তাঁর পায়ে লেগে ছিটকে ছিটকে পড়তে লাগল। কোনোটা বা পায়ের নিচে চিপ্সে গেল। কিন্তু অত নজর দেবার তাঁর উপায় নেই, সময়ও নেই। সাড়ে সাতটায় একটা ট্রাইশান আছে।

হুটুবাবু করুণ নেত্রে জুতোগুলোর দুর্দশা দেখতে লাগলেন। নিরীহ মানুষ। কোনো ব্যাপারে তিনি সহজে উত্তেজিত হন না। কণ্ঠস্বরও চড়ে না।

বিনীত কণ্ঠে বললেন, জুতোগুলো গেল যে! একটু আস্তে যাবেন বটুকবাবু।

কথাটা বটুকবাবুর কানে গেল বলে মনে হল না।

একটা দীর্ঘশ্বাস ফেলে হুটুবাবু বলতে লাগলেন :

ছ'মাস হয়নি এখনও চোদ্দ সিকে দিয়ে জুতোজোড়া কিনলাম। এ মেসে থাকতে গেলে অতদামের জুতো কেনা ঠিক হয়নি। আর করবই বা কি ! ক্যান্সিসের জুতো কিনব তো সেও শ্রীচরণের ছাপে

পরা যাবে না। রাখবারও জায়গা নেই। কাল থেকে মাথার গোড়ায় রাখতে হবে দেখছি।

আরও একটা দীর্ঘশ্বাস ছেড়ে ছুটুবাবু একটা একটা করে হাতের পয়সাগুলো গুণতে লাগলেন। সকালের বাজারের পয়সা। এমাসে তিনিই ম্যানেজার হয়েছেন।

হাঁকলেন, বাজারে কে যাচ্ছ হে বাবুরা। পয়সাটা নিয়ে আগাকে দয়া কর এইবার।

নরহরির ঘুম ভাঙে আটটায়। স্নানাহার ইত্যাদিতে এক ঘণ্টা। দশটায় অফিস। বয়স তার অল্প। সেই কারণে আশঙ্কা জন্মেছে, মেসের সমান অংশীদার হয়েও ঠাকুর-চাকরের কাছে সে যথেষ্ট খাতির পাচ্ছে না। পাছে বয়সের মাপকাঠিতে তার সম্মানের পরিমাপ হয়, সেজন্তো সর্বদাই সে মেজাজ এক পর্দা উঁচুতে বেঁধে রাখে। কথা গরম মেজাজে বলে।

ঘুম থেকে উঠেই একটা হাই তুলে নরহরি গম্ভীর কণ্ঠে জিগ্যেস করলে, বাজার এসেছে ?

সুমুখের জানলার একটা কপাটে ঠেস দিয়ে ছুটুবাবু আরাম করে এক সঙ্গে শীতের রোদ্দ এবং তাম্রকূট সেবন করছিলেন। নিচের দিকে একবার তাকিয়ে নিয়ে বললেন, দেখছি না তো।

হৃদ্বার দিয়ে নরহরি বললে, তার মানে ? কেন, এতক্ষণ কি করছে ? কে—বাজারে গিয়েছে কে ?

ছুটুবাবু নিঃশব্দে তামাক টানতে লাগলেন, নরহরির কথার জবাব দিলেন না।

নরহরি আবার বললে, রোজ রোজ দেরি করে বাজার। একদিন মাছের ঝোল খেয়ে যেতে পারলাম না। এ-সব চলবে না। দাঁড়ান,

কাল থেকে আমি নিজে বাজার যাব। সব বাবুর চালাকি বের করছি।

মুটুবাবু টিপে টিপে বললেন, আজকে তো তোমারই বাজার যাবার কথা ছিল।

শুনে প্রথমটা সে থতমত খেয়ে গেল। কিন্তু থতমত খাওয়ার ছেলে সে নয়। তৎক্ষণাৎ চৈঁচিয়ে বললে, ছিল তো ডাকলেন না কেন? যদি না উঠতাম, তাহলে বলতে পারতেন।

মুটুবাবু এ কথার আর জবাব দিলেন না। শুধু একটু মুচকে হাসলেন।

নরহরিও এক মিনিট চুপ করে রইল। তারপর আবার জিগ্যেস করলে, গেল মাসে চার্জ কত পড়ল?

মুটুবাবুর ঠোঁটের উপর পাতলা একটা হাসি খেলে গেল। কিন্তু অত সূক্ষ্ম জিনিষ নরহরির চোখে পড়ে না।

মুটুবাবু চিবিয়ে চিবিয়ে আস্তে আস্তে বললেন, তা তেরো টাকা কম হবে না।

—তে রো টা কা!

নরহরির চোখ কপালে উঠল।

বললে, বলেন কি মশাই? কুড়ি টাকা মাইনে পাই, তার তেরো টাকা মেসে! নাঃ! মশাই, আমি নোটস দিয়ে রাখলাম। আসছে মাস থেকে আমি আর এ মেসে নেই! তেরো টাকা চার্জ! বাবাঃ!

নরহরি দু'হাত কপালে ঠেকিয়ে মেসের উদ্দেশে প্রণতি জানালে।

এমন সময় দেখা গেল, একটা মুটের মাথায় বাজার চাপিয়ে হস্তদস্ত

হয়ে জয়কালী আসছে। হুটুবাবুকে দেখে জয়কালী গলির মোড় থেকেই একটা হাত উর্ধ্বে তুলে চীৎকার করে বললে, কেষ্টাকে ছাড়লে না।

হুটুবাবু বিস্মিতভাবে বললেন, ছাড়লে না? কে ছাড়লে না? কোথায় সে?

নরহরি লাফিয়ে জানালার গোড়ায় এসে গর্জন করে বললে, তার মানে?

ভাবটা এই যে, তার চাকরকে আটকে রাখবার ক্ষমতা লাট সাহেবেরও নেই।

কেষ্টা মেসের চাকর। বছর বারো-তেরো বয়স। অনর্গল মিথ্যে বলতে পারে। ছুঁছুঁমীতে এরই মধ্যে এ পাড়ায় সে বিখ্যাত হয়ে উঠেছে। ওকে সবাই চেনে। সকালে জয়কালীর সঙ্গে সে বাজারে গিয়েছিল, সকল মেসের চাকর যেমন যায়। এখন জানা গেল, তাকে ছাড়ে নি।

কে ছাড়ে নি? কেনই বা ছাড়ে নি? সকাল বেলায় হঠাৎ কী এমন তার মূল্য গেল বেড়ে? বাজারে তাকে এত সমাদর করে কে?

জয়কালী যে ভাবে লম্বা লম্বা পা ফেলে বীরদর্পে মেসে প্রবেশ করলে, মনে হল, সে ওয়াটালু জয় করে ফিরছে। জামার কনুই থেকে আস্তিন পর্যন্ত লম্বা একটা ছেঁড়া। জুতো কর্দমাক্ত, তার একটা পাশ এমন হয়ে ছিঁড়ে গেছে যে, হাঁটিতে গেলে ফস্-ফস্ করে শব্দ হচ্ছে।

তখনও সে হাঁফাচ্ছে। সবাই তার চার পাশে এসে নির্বাক বিস্ময়ে জমা হয়েছে।

হুটুবাবু তার সর্বাঙ্গ বার বার নিরীক্ষণ করে চিবিয়ে চিবিয়ে বললেন, তোমার জামা ছিঁড়ল কেন? এটা তো সেই নতুন পাঞ্জাবীটা? না?

জয়কালী ডান পা'টা বাড়িয়ে দিয়ে বললে, শুধু জামা ? জুতোটা দেখুন ! এখনও মাসখানেকও হয় নি ।

হুটুবা বু বললেন, তাই তো দেখছি । ব্যাপারটা কি ?

জয়কালী বিরক্ত হয়ে বললে, তবে আর এতক্ষণ শুনলেন কি ? দাঁড়িয়ে দাঁড়িয়ে ঘুমুচ্ছিলেন ?

বিনীতভাবে হুটুবা বু উত্তর করলেন, কিছুই শুনি নি ।

—শোনেন নি ? বললাম না, কেষ্টাকে ধরে রেখেছে ?

—কে ধরে রেখেছে ?

হাতের ঘুঁসি পাকিয়ে জয়কালী বললে, এক কথা একশোবার করে আমি বলতে পারব না । শুনলেন, আর না শুনলেন ।

সকলকে হতভম্ব করে জয়কালী অত্যন্ত ক্রুদ্ধভাবে জুতোর কাদা ধুতে বসল ।

এমন সময়ে কেষ্টা ষাড় ঢুলিয়ে তুড়ি দিতে দিতে এল । মুখ টিপে টিপে হাসছে ।

সবাই তাকে নিয়ে পড়ল ।

—কি রে কেষ্টা ! কি হয়েছে ?

কেষ্টা প্রথমে বললে, কিছুই হয় নাই । তারপর বললে, ধরে রেখেছেল ।

নরহরি ধমক দিয়ে বললে, সেই কথাই একশো বার শুনছি । কে ধরে রেখেছিল ?

আকাশে ছুই হাত তুলে আড়ামোরা ভেঙে কেষ্টা বললে, বললাম তো, সায়েবে ।

নরহরি আবার একটা ধমক দিতে যাচ্ছিল । হুটুবা বু হাতের ইঙ্গিতে তাকে নিরস্ত করে বললেন, থাম থাম । সাহেব ধরেছিল ? কেন ?

কেষ্টা শয়তানের মতো পিটপিট করে আড় চোখে জয়কালীর

দিকে চাইলে। জয়কালী তখন গভীর মনোযোগের সঙ্গে জুতো সাফ করছে।

হুটুবা বু আবার জিগ্যাস করলেন, তোর গালের ওখানটা ছিঁড়ল কি করে ?

কেষ্ঠা এবার আর নিজেকে সম্বরণ করতে পারল না। চীৎকার করে বললে, সেই বেটা ছিঁড়েছে !

—কোন বেটা ?

—সেই বেগুনওয়ালা।

জয়কালী পিছন ফিরে কেষ্ঠার দিকে চেয়ে এক গাল হেসে বললে, বেটাকে দিয়েছি কি রকম গাঁট্টা ? সর্ষের ফুল দেখিয়ে ছেড়েছি। বল ?

কেষ্ঠা দুই হাতে চটাং করে একটা তালি মেরে বললে, আমিও দিয়েছি হারামজাদার কোঁকে দুই রাম-ঘুঁসি। বাপ্ বলে বসে পড়েছিল।

হুটুবা বু জিগ্যাস করলেন, তার পর সাহেব এসে ধরলে ?

কেষ্ঠা নিশ্চিতভাবে বললে, হুঁ।

—সার্জেন্ট সাহেব তো ? তোদের তিনজনকেই ধরলে ?

জয়কালী সংশোধন করে বললে, ওকে আর সেই বেটাকে ধরলে। আমাকে ধরবে ? হুঁ :! আপনাদের ভাবনার বাহাত্তরি আছে !

জয়কালী ঠোট বেঁকিয়ে উপেক্ষাভরে হাসলে।

হুটুবা বু কেষ্ঠাকে পুনরপি জিগ্যাস করলেন, তারপর তুই কি করলি ?

কেষ্ঠা জবাব দিলে, কি আর করব ? বললাম।

—বললি ? বেশ, বেশ। কি বললি ?

অনতিদূরে একটা চড়ুই কিচ্‌মিচ্‌ করছিল। কেষ্ঠা আপন অভ্যাসসারে অভ্যাসবসে সেদিকে একবার তাক করে বললে, সব

কথাই বললাম। আমি কি সায়েবকে ভয় করি নাকি? বরং ওই বেটাই কান্নাকাটি করছিল।

সবাই অতিষ্ঠ হয়ে উঠল।

নরহরি একটা হাত উঁচিয়ে বললে, দোব ছোঁড়ার মাথায় একটা টাটি। আসল কথা ভাঙে না, কেবল প্যাঁচ মারে।

কেষ্ঠা ঝাঁঝিয়ে বললে, কি প্যাঁচ মারি? বললাম তো সব কথা।

ছুটুবাবু নরহরিকে খামিয়ে বললেন, বলছে, বলছে। তা পরে কেষ্ঠা, সাহেবকে বললি সব কথা?

ধমক খেয়ে কেষ্ঠা একটু ক্ষুব্ধ হয়েছিল। বললে, বললাম বই কি!

—কি বললি?

—বললাম, বেগুনওয়ালা আমাকে পেথমে গাল দিয়েছিল।

—খামখা গাল দিলে? কেন গাল দিলে বললি না?

—বললাম বই কি! বললাম, আমি বেগুনের দর করেছিলাম বলে আমাকে গাল দিলে, গালে চড় মারলে।

বলে নিজের গালে একবার হাত বুলোলে। জায়গাটা তখনও লাল হয়ে ছিল। লম্বা লম্বা আঙ্গুলের দাগ বসে গেছে।

ছুটুবাবু মিষ্টি মিষ্টি হেসে বললেন, তাইতেই কি কেউ কাউকে মারে রে বোকা? দর কি কেউ করে না? সাহেব তো আর ঘাস খায় না?

কেষ্ঠ উত্তেজিতভাবে বললে, কি ঘাস খায় না! মাইরি তাই হয়েছিল। বিশ্বাস না হয় জিগ্যাস করুন জয়কালীবাবুকে। ওই তো সামনেই রয়েছেন।

জয়কালীর জুতো পরিষ্কার শেষ হয়েছিল। হাসতে হাসতে বললে, হ্যাঁ, তুমি খুব সাধু। বুঝলেন মশাই, গোটা বাজারে তিন পয়সার নিচে বেগুন নেই, ও বললে, এক পয়সা সের দিবি? দিয়েছেও আচ্ছা এক চড়, মুখখানা বেগুন বানিয়ে ছেড়েছে!

—কি বেগুন বানিয়ে ছেড়েছে! আমি বললাম, এক পয়সা
সের দিবি?

—বললি না?

—বললাম? আমি ছ' পয়সা সের বলিনি?

—বলেছিলি! ব্যাটা নিজেও মার খেলে, আমারও

বলে জয়কালী ছিন্ন জামা ও জুতোর পানে সক্রম দৃষ্টি নিক্ষেপ
করলে।

তারপর ক্রুদ্ধকণ্ঠে বললে, আমি না থাকলে দিত আজ তোমাকে
শেষ করে।

ক্ষুব্ধভাবে কেঁপে বললে, দিত!

মুঠুবা বু বললেন, যাক-গে বাবা! আর সেম-সাইড গোল
করতে হবে না। এখন মাছ-তরকারী কোটিগে। আর সমন-টমন
আসবে না তো? ব্যস্। তাহলেই হল।

তখন সকলে জয়কালীকে নিয়ে পড়ল।

মুঠুবা বু জয়কালীকে জানালার ধারে নিজের বিশেষ স্থানটিতে
বসিয়ে সবাইকে উদ্দেশ্য করে বলতে লাগলেন, তোমরা যে সবাই
জয়কালীকে ডাল-রুটির যম বল, এবারে শিক্ষা হল তো? অত
বড় বাজারে... একা... তোমরা হলে পারতে? আর সম্বলের মধ্যে
তো ওই কেঁপে, — এক ফোঁটা বাঁদর। ওহে রক্ষাকর, তোমাদের
আপিস অঞ্চলে নেপালী-টেপালী পাওয়া যায় না? একটু খবর
নিও দিকি।

রক্ষাকর একখানা ছেড়া কাপড় রিপু করছিল। বিস্মিতভাবে
জিজ্ঞাস্য করলে, নেপালী কি হবে?

—রাখা ভালো। মেসেও রইল, জয়কালীও রইল। কখন কি ঘটে, বুঝলে না?

একটু থেমে বললেন, অবশ্য দরকার হত না। কিন্তু জয়কালীর শরীর তো ভালো নয়। ওষুধটা নিয়মিত খাচ্ছ তো জয়কালী? দেখি তোমার চোখ! হুঁ। ও-চোখ দেখি? হুঁ। একেবারে সাদা! রক্তের চিহ্ন পর্যন্ত নেই। আর জ্বর হয়?

জয়কালী শরীরের দিকে চাইতে চাইতে বললে, ঠিক বুঝতে পারি না।

—সকাল বেলায় মুখ বিস্মদ হয় না?

—একটু হয় বোধ হয়। ঠিক বুঝতে পারি না।

—রাত্রে ঘুম হয়?

—ঘুম তো ভালোই হয়।

—তা হোক। মনটা তো সরল। তার ওপর সমস্ত দিন ছটোপুটি আছে। ঘুম হবে। তুমি এক কাজ কর। সকালে-বিকালে একটা করে কমলালেবু তুমি খাও দিকি। এক মাসের মধ্যে শরীর সেরে যাবে।

রক্ষাকর হেসে বললে, কেন অত হাঙ্গাম করছেন? তার চেয়ে নেপালীই রাখুন। আমি দেখে দোব একটা বেশ তাগড়া গোছের। ভোজালী-ওয়াল।

জিহ্বা নিয়ে তালুতে একটা টোকা মেরে নুতুঁবাবু বললেন, ওই তো তোমাদের দোষ! কিছুতে বিশ্বাস করতে চাও না, জয়কালীর শরীর খারাপ।

রক্ষাকর বললে, খারাপ? ওজন নিয়ে দেখবেন দিকি। দুটি মণের কম হবে না।

—এই, এই! খুঁড়তে আরম্ভ করে দিলে! এই জগেই তো ওর শরীর সারছে না।

জয়কালী চোখ পাকিয়ে রক্ষাকরকে বললে, তোমাকে বার বার নিষেধ করেছি আমার সম্বন্ধে কিছু বলবে না। একদিন ফৌজদারী হয়ে যাবে বলে দিচ্ছি।

হুটুবা বু বাধা দিয়ে বললেন, না, না। এখন ওসব করতে হবে না। শরীর সেরে নাও, তখন ওরাই আর বলতে সাহস করবে না। আমি যা বললাম তাই কর, শ্রেফ দুটি করে কমলালেবু। চোখ-মুখের ফ্যাকাসে ভাব কেটে যাবে। ওর এক একটি ফোঁটায় এক ফোঁটা রক্ত।

ইত্যবসরে হেলতে দুলতে নরহরি এল।

বললে, এ সব চলবে না। জয়কালী যেদিন বাজারে যাবে রাজ্যের জঙ্গল ঝেঁটিয়ে নিয়ে আসবে। ও সব শাক-পাত এ মেসে চলবে না। আজ রাত্রে মাংস হবে। আমি বলছি।

‘আমি’র ওপর নরহরি বিশেষ জোর দিলে। তেরো টাকা চার্জের কথা ইতিমধ্যে সে নিশ্চয় ভুলে গেছে।

নরহরির সঙ্গে জয়কালীর অহি-নকুল সম্পর্ক।

তেলে-বেগুনে জ্বলে উঠে জয়কালী বললে, ওঃ। লাটসাহেব!

গম্ভীর কণ্ঠে নরহরি হাঁকলে, এই কেণ্টা!

কেণ্টা তৈরী চাকর। নরহরির প্রথম চার-পাঁচ ডাক কাণেই তুললে না। অবশেষে যখন নিতান্ত না শুনে পারা গেল না, তখন নিচে থেকেই মিহি কণ্ঠে সাড়া দিলে, কি বলছেন?

ওপর থেকে নরহরি হাঁকলে, শুনে যা।

—কি শুনে যা! আমি মাছ কুটছি যে।

হাল ছেড়ে দিয়ে নরহরি বললে, আচ্ছা বাবা! রক্ষাকর, দাড়িটা কামিয়ে দাও তো হে। তুমিও কামাবে নাকি?

রক্ষাকর দাড়ি কামানোর সরঞ্জাম নিয়ে নিজেই আসছিল। বললে, কামাব বইকি!

নুতুবাবু খুব তীক্ষ্ণদৃষ্টিতে রক্ষাকরের মুখমণ্ডল নিরীক্ষণ করে আস্তে আস্তে বললেন, দাড়ি কি বেরিয়েছে? কালকেই তো কামালে মনে হচ্ছে।

রক্ষাকর মনে মনে লজ্জিত হচ্ছিল। নরহরি তার হয়ে উত্তর দিলে, ও রোজ কামায় কি না!

রক্ষাকরের লজ্জার কারণ ছিল। বেচারা অল্প মাইয়ের একটা ঔষুধের দোকানে কাজ করে। তাও নিয়মিত মাইনে পায় না। অথচ থাকে ওরই মধ্যে একটু পরিষ্কার-পরিচ্ছন্ন। সেটাকে আর সবাই সঙ্গে সঙ্গে ও নিজেও অপরাধ বলে ভাবতে শিখেছে। এখন পরিষ্কার থাকাটা ওর রোগের মধ্যে দাঁড়িয়েছে। প্রত্যহ দাড়ি কামিয়ে কামিয়ে ওর কামানোর হাত গেছে পেকে। মেসের প্রায় সবাই সেই পাকা হাতের সন্ধ্যাবহার করে। রক্ষাকরও সেজন্মে কিছুমাত্র বিরক্তি বোধ করে না।

সে শুধু একবার বললে, দাঁড়াও ভাই। আমি আগে কামিয়ে নিই। কিন্তু নরহরি তাকে আমল দিলে না। ওদের চেয়ে ছ'তিন টাকা কম মাইনে পায় বলে তাকে কেউই আমল দেয় না। ডান হাত দিয়ে দাড়িতে জল বুলোতে বুলোতে নরহরি বললে, আরে নাও, নাও। তোমার তো আর আপিস নয়। দোকানের কাজ, দু-পাঁচ মিনিট দেরি হলে ভাগবত অশুদ্ধ হবে না।

রক্ষাকর নিরীহ মানুষ। অপেক্ষাকৃত অল্পবেতনভোগী বলে সে যথেষ্ট কুণ্ঠিত হয়েই থাকে। তার উপর তার ঠিক আপিস নয়, একটা ঔষুধের দোকানমাত্র। সুতরাং এর পরে আর তার আপত্তি করার কিছু রইল না। নিঃশব্দে নরহরির দাড়ি কামাতে বসল। নরহরি কামানোর শেষে আয়নায় মুখ দেখে গেল চটে।

দাঁত-মুখ খিচিয়ে বললে, দিয়েছ তো কেটে! আমার হয়েছে যত আনাড়ি নিয়ে কারবার!

কুণ্ঠিতভাবে রক্ষাকর বললে, ও কিছু না। বোধ হয় ব্রণ ছিল, তাই।

নরহরি বিরক্ত হয়ে বললে, ছিল ব্রণ! আমার তোমার মতো মুখ কিনা! একটু স্নো দাও।

রক্ষাকর নিয়মিতভাবে স্নো ব্যবহার করে। এই তার একমাত্র নেশা। স্নো'র কোঁটা সর্বদা পকেটেই রাখে। কাজ-কর্মের আড়ালে যখনই একটু অবসর পায়, একবার মেখে নেয়। নরহরির ক্রোধ-শাস্তির জন্তে সে তাড়াতাড়ি কোঁটো এনে দিলে। তাকে অনুগৃহীত করেছে, এইভাবে স্নো মেখে কোঁটোটা ঢাকা না দিয়েই নরহরি স্নান করবার জন্তে নিচে নেমে গেল। বলে গেল, স্নানের পর আর একবার মাখবে।

এর পরে আরও দু'একজন রক্ষাকরের কাছে কামিয়ে গেল। তখন সে নিজের দাড়ি কামাবার ফুরশুও পেলে।

ছাদের একটা কোণে গিয়ে দুই হাঁটুর মধ্যে আয়নাটা রেখে সে বেশ যত্ন করে কামালে। মুখে পরিপাটি করে স্নো মাখলে। সময় কম। তাড়াতাড়ি গামছাখানা কাঁধে ফেলে স্নান করতে যেতে হল। কিন্তু স্নান সেরে ফিরে এসে একবারে মাথায় হাত দিয়ে বসল।

—কি ব্যাপার?

বললে, আমার ধোয়া কাপড়খানা পাচ্ছি না।

—আছে এইখানেই কোথাও। খেয়ে তো এস।

একটু খুঁৎ-খুঁৎ করে রক্ষাকর খেতে গেল। ফিরে এসে সমস্ত ঘর তন্ন তন্ন করে খুঁজলে। কোথাও পেলে না। যেখানে যা ছিল সব আছে, কেবল সেই ধোয়া কাপড়খানিই নেই। সবাই আফিস যাওয়ার আয়োজন করতে লাগল। কিন্তু সে বিষয়টিতে চুপ করে বসেই রইল।

—কি হে যাবে না?

বিমর্ষমুখে রক্ষাকর বললে, কি করে যাই !

—কাপড় পাওয়া গেল না ?

রক্ষাকর জবাব দিলে না।

একজন বললে, কেন ? যেখানা পরে আছ, ওখানাই বা মন্দ কি ! আমাদের চেয়ে ঢের ফর্সা।

কথাটা মিথ্যা নয়। সত্যই যেখানা সে পরে আছে সেখানাও আমাদের কাপড়ের চেয়ে ফর্সা। কিন্তু তাতেও রক্ষাকর মাথা তুললে না, যদিচ সেখানা পরে গেলেও, ওর পদোচিত মর্যাদা ক্ষুণ্ণ হত না।

কিন্তু ও তা পারে না। আফিস যাওয়ার সময় ফর্সা কাপড় একখানা ওর চাই।

অবশ্য কাপড়খানা অবশেষে পাওয়া গেল। কতকগুলো খবরের কাগজের নিচে কে লুকিয়ে রেখেছিল। সুতরাং শেষ পর্যন্ত কাজে যাওয়া আটকাল না। তবে বোধ হয় একটু দেরি হল। কারণ এর পরে আবার একবার স্নো মাখার দরকার পড়ল।

রক্ষাকর যখন স্নো মাখছে, ঠিক সেই সময়ে বটুক ঘোষ পদভরে মেদিনী কাঁপিয়ে আকাশ পানে চাইতে চাইতে ছেলে পড়িয়ে ফিরলেন। প্রায় সবাই তো আফিসে চলে গেছে, সিঁড়ির ধাপে ধাপে জুতোর সমারোহ আর নেই। কেবল নিচে রান্নাঘরের পাশে একটা খালি বালতি ছিল, বটুক ঘোষের পা লেগে সেইটে সশব্দে উল্টে পড়ল।

বটুক ঘোষ হাঁকলেন, এখানে একটা বালতি রাখলে কে ?

কেউ সাড়া দিলে না। তার প্রয়োজনও ছিল না। বটুক নিজেই সেটা কলতলায় যথাস্থানে রেখে উপরে উঠে এলেন। বাইরে থেকে যখনই তিনি ফেরেন, সোজা ছাদে গিয়ে জামা-চাদর রোদে মেলে দিয়ে তবে ঘরে ঢোকেন। তাতে রোগের বীজাণু মরে। আজও তার

বটুক পায়চারি করতে করতে বলতে লাগলেন, আপেল,
নাশপাতি, বেদানা, কমলালেবু, কুল, রাবড়ি, মিষ্টি ..

—কোথায় মশায় ?

—দস্তদের ঠাকুরবাড়ীতে ।

রক্ষাকর বিন্মিতভাবে বললে, সে আবার কোথায় ?

আকাশের দিকে আঙুল তুলে বটুক বললেন, কর্ণোয়ালিশ ষ্টীটে ।
পড়িয়ে ফেরবার রাস্তায় পড়ে কি না । চমৎকার আয়োজন ! নতুন
হয়েছে । চমৎকার মন্দির ! আপনাকে একদিন নিয়ে যাব ।

রক্ষাকরের বিন্ময় ক্রমেই বাড়ছিল । বললে, সে কি মশায় !
আপনার এ দেব-দ্বিজ ভক্তি কবে থেকে উথলে উঠল ? আপনি
গুরুকে প্রণাম করেন না, আর ঠাকুর-বাড়ীতে রোজ যান প্রণাম
করতে ?

—যাই কি সাথে মশাই, প্রসাদের জগে ।

বটুক ঘোষ উচ্ছ্বসিত হয়ে হেসে উঠলেন । তাড়াতাড়ি বাইরে
গিয়ে পাঞ্জাবীটা আর এক ইঞ্চি ডান দিকে এবং খদ্দের গায়ের
কাপড়টা এক ইঞ্চি বাঁ দিকে সরিয়ে দিয়ে ফিরে এলেন ।

বললেন, ভক্তি ? এমন করে গলবস্ত্রে বসে থাকি যে, আমারই
ওপর লোকের ভক্তি হয় । একদিন কোনো কারণে দৈবাৎ না যেতে
পারলে মন্দিরের লোকেরা ব্যস্ত হয়ে ওঠে । কত কৈফিয়ৎ দিতে
হয় ! জানেন না তো ? দেখেন না, রবিবারে ছুটির দিনেও ঠিক
সময়ে এখান থেকে বেরিয়ে পড়ি ? কামাই করার যো টি নেই ।

বলে আর একবার হাসলেন ।

রক্ষাকরের আর দেরি করার সময় ছিল না । কেবল মাথার
টেড়িটা আর একবার বাগিয়ে নেবার অবসরে আর একবার স্নো
মাথার প্রয়োজন আছে কিনা ভাবতে একটু দেরি করলে । অবশেষে
স্নো না মেখেই বেরিয়ে পড়ল ।

বটুক ঘোষেরও অনেক কাজ বাকি। জামা-কাপড় অসম্ভব রকম ময়লা হয়ে গিয়েছে। সাবান না দিলেই নয়। ভদ্রলোক পাঞ্জাবীটা আর একখানা কাপড় কাঁধে ফেলে কলতলায় নেমে গেলেন।

সাবান দেওয়া তাঁর আসে না। আমি ওপর থেকে দেখতে লাগলাম, যত না তিনি সাবান দেন, জিভ বার করেন তার চেয়ে বেশি। কোনো রকমে আলগোছে কেচে, না নিংড়েই ওপরে মেলে দিতে এলেন। নেংড়ালে নাকি কাপড় ছিঁড়ে যায়।

বন্ধু, আমার প্রভাত-কাহিনীর এইখানে হল শেষ। যে ক’টি বান্ধবের কথা লিখলাম তাদের কেমন লাগল জানিও। কেবল একটি অনুরোধ আছে। এদের সম্বন্ধে বিচার করার সময়ে একটি কথা মনে রেখ। তোমার মস্ত বড় ড্রইং-রুমে যাঁরা পায়ের ধূলা দেন তাঁরা বাংলার প্রাণ। তোমার ড্রইং-রুমে তাই বাংলার প্রাণশক্তির পরিচয় পাই। আমার এখানে সে পরিচয় পাবে না ভাই। এরা বাংলার দেহ। ক্রমেই অনাড় ও দুর্বল হয়ে আসছে। স্বাভাবিক অবস্থায় এদের আশা-আকাঙ্ক্ষার সঙ্গে তোমাদের আশা-আকাঙ্ক্ষার এবং এদের দুঃখের সঙ্গে তোমাদের দুঃখের যোগ-সূত্র থাকা উচিত ছিল। কিন্তু তা নেই।

যে সমাজ-ব্যবস্থা আমাদের ছিল, তা অর্থ-নীতিক ভিত্তির উপর উপর প্রতিষ্ঠিত ছিল না। সেই ব্যবস্থায় যাঁরা ছিলেন চূড়ায়, তাঁরা ছিলেন দরিদ্রতম। তাঁদের শ্রেষ্ঠত্ব ছিল বিদ্যায় ও তপস্যায়। সেই ব্যবস্থা ভালো ছিল কি মন্দ ছিল, সে প্রশ্ন তুলে আজ আর লাভ নেই। আজ অনিবার্যভাবে সেই প্রাচীন সমাজ-ব্যবস্থা ভেঙে আসছে, অত্যন্ত দ্রুতবেগে। তাকে প্রতিরোধ করা এখন আর প্রায় অসম্ভব।

তার বদলে প্রতিষ্ঠিত হতে চলেছে অর্থনীতিক ভিত্তির উপর নতুন একটা সমাজ-ব্যবস্থা। আগেকার ব্যবস্থায় এই নিম্ন মধ্যবিত্ত শ্রেণীই ছিল সমাজের প্রাণ। কি রাষ্ট্র, কি শিক্ষা, কি শিল্প, কি বিজ্ঞান, কি সাহিত্য, কি ধর্ম, সকল ক্ষেত্রেই এদেরই দান ছিল সব চেয়ে বেশি। আজকে সামাজিক মর্যাদায় এরা নেমে আসছে। ধীরে ধীরে হাত মেলাতে চলেছে নিম্নতম স্তরের সঙ্গে।

এর ফল বাংলার জীবনক্ষেত্রে ভালো হবে কি মন্দ হবে, এখনই হয়তো তা নিশ্চয় করে বলার সময় আসেনি। কিন্তু ধরে নেওয়া যেতে পারে, এই মেসে ভাবী বাংলার সেই ইতিহাসের একটি পরিচ্ছেদ রচিত হচ্ছে। অদৃশ্য হস্তে লিখে চলেছেন মহাকাল। আমি দর্শক-মাত্র। পরম কৌতুক এবং কৌতূহলের সঙ্গে দেখে চলেছি সেই লিখন। তার বেশি নয়।

॥ দুই ॥

বন্ধু, তোমার অহঙ্কার আছে তুমি জীবন দেখেছ—বহু নর-নারীর জীবনলীলা, জীবন যেখানে লীলাকমলের মতো শতদলে বিকশিত হয়ে উঠেছে। সেখানে আকাশ গাঢ় নীল, ধরণী শস্যশ্যামল, স্বচ্ছ-সলিলা নদী চলেছে খরশ্রোতে বয়ে। আমি দেখি মৃত্যুর অভিনব লীলা। এখানে আকাশ ধূমমলিন, ধরণী উষর, ধমনীর রক্তশ্রোত ধীরে ধীরে ঝিমিয়ে আসছে। নবীন আশায় কারও চোখ মৃত্যুর জগ্গেও উজ্জ্বল হয়ে ওঠে না।

স্বপ্ন ? কোথায় স্বপ্ন ! জীবন-দেবতা মৃত্যুর কোলে এলিয়ে পড়েছে।

এদের কথা ভালো লাগবে তোমার ?

এই মেসের আমি নাম দিয়েছি “মধুচক্র”। কেউ জানে না, শুধু আমার দেওয়া নাম আমিই জানি। তুমি বলবে, নাম তো দিলে কিন্তু মধু কই ? মধুও আছে। সে আমার মনে। এদের মধ্যে বড় আনন্দেই আছি। কিন্তু আমার আনন্দের কথা এখন থাক।

এই সময়টা ঘণ্টাখানেকের জগ্গে আমি একলা থাকি। সাড়ে ন’টার পর থেকেই মেসের বাবুরা একে একে কর্মস্থানের উদ্দেশে ছুটতে থাকে। দশটার কিছু আগেই মেস একেবারে খালি। আমি একা, জানালার বাইরে যে একটুখানি দুর্লভ আকাশ তারই দিকে চেয়ে থাকি।

কাঁচি চড়ুই পাখী দেওয়ালের ফাঁকে ফাঁকে বাসা বেঁধেছে, তাদের কিচমিচ শুনি। মাঝে মাঝে শঙ্খচিলের শীর্ণ তীক্ষ্ণ আওয়াজ

ভেসে আসে। আকাশ-পথে দু'একটি পাখী মন্থর আলম্বে অকারণে ভেসে বেড়ায়।

পাশের বাড়ীতে সেই বেকার ছোকরাটি বায়োস্কোপ দেখতে যাওয়ার হুজুগ এনেছে। হুজুগ তো নয়, যেন দুর্ভিক্ষ পীড়িত জনতার কাছে মুষ্টি-ভিক্ষা এনেছে। -ও-বাড়ীতেও এখন পুরুষ বলতে কেউ নেই, বাদে এই ছোকরাটি। মেয়েদেরই রাজত্ব। এক সঙ্গে সবাই কলরব করে উঠল

—যাব, যাব, যাব।

প্রথমে সবাই চেষ্টা করে উঠল, যাবে, যাবে, যাবে। সবাই যাবে, তিন বছরের ছেলেকে থেকে তিরানী বছরের বুড়ী পর্যন্ত। তারপরে উঠল টাকার প্রশ্ন। কথাটা প্রথম ঝোঁকে কেউ ভেবে দেখবার সময় পায় নি। ভাবতেই দমে গেল।

—টাকা কোথা পাব? টাকা ফলছে।—তরুণীর কণ্ঠস্বর।

—ফলছে কি? কাল তোর বর এসেছিল, তোর হাতে টাকা নেই? আমাকে এমনি বোকা পেয়েছিস?—এবারে সেই বেকার ছোকরার ঝন্ঝনে আওয়াজ।

—বেশি বাজে বকিও না ছোড়দা। আমি যাব না যাও। আমার হাতে একটি পয়সা নেই। দিয়ে-থুয়ে তো রাজা করে রেখেছেন! আবার দাদা? লজ্জা করে না!

ছোড়দা এত বড় অপবাদেও কিছুমাত্র লাজ্জিত হল বলে মনে হল না। বরং গলায় একটু রস মিশিয়ে বললে, আমার চাকরী হোক তখন দেখিস।

—আমার দেখে কাজ নেই।

—নেই তো নেই। দে দিকি পাঁচটা টাকা। চটপট দে। নইলে পরে আর টিকিট পাওয়া যাবে না।

—না যাক।

—আহা !—এবারে বৃদ্ধার ঝাঁঝালো কণ্ঠস্বর—একবারে ঠেকরে ঠেকরে চলেছেন ! তুই দিবি না কে দেবে লা ছুঁড়ি ? তোর আছে তাই চাইছে । আমাকে তো চাইছে না ।

—কেন তুমি দাও না । ও দেবে কেন ? তুমি দাও ।—আর এক বৃদ্ধার কণ্ঠস্বর—মেয়ের কাছে টাকা চাইতে লজ্জা করে না ? অ মা !

তুমুল ঝগড়া লেগে গেল । আলসের আনাচে কানাচে কতক-গুলি পায়রা পাখায় ঠোট গুঁজে ঝিমুচ্ছিল । আচমকা এত লোকের চীৎকারে চমকে উঠে তারা ঝটপট করে উড়ে পালাল । দেখলাম, কাক বড় সেয়ানা । আমাদের ছ'বাড়ির মাঝের দেওয়ালে বসে একটা কাক কি একা জিনিস নখে করে ধরে ঠোট দিয়ে ছিঁড়ছিল । প্রথটা ভয় পেয়ে সে একবার পক্ষ বিস্তার করেই আড়চোখে চেয়ে দেখে নিলে, ব্যাপারটা সম্পূর্ণ অহিংস । সে আবার আপন কাজে মন দিলে ।

কিন্তু আমি অত সহজে নিষ্কৃতি পেলাম না । বাক্যের ঝড় আর তর্কের ধুলো আমার মস্তিষ্কে তখন রণ-কুয়াশা সৃষ্টি করেছে । মনে হল, দেহের আর সব লাইন বন্ধ হয়ে গেছে, একমাত্র যোগ রয়েছে কানের সঙ্গে মস্তিষ্কের । সেখানে টেলিগ্রাফ যন্ত্রের মতো কেবল বেজে চলেছে :

অ মা...দরদ দেখে বাঁচিনে...

আমার কাপড়খানা কোথায় গো ..

লজ্জা-ঘেন্না কি আছে ? তারাও দেশ ছেড়ে পালিয়েছে ..

ওরে আমার দরদীয়ে...

নেকী ! কিছু তো জানেন না...

আঃ থাম না বাপু । হয়েছে...

দেবে বই কি, আছে দেবে না...

ভারী তো টাকা ! অমন টাকার মুখে.

ভাবছিলাম,

কি ভাবছিলাম জানিনে। অনেক কথাই ভাবছিলাম নিশ্চয়। ও বাড়ীর কোলাহল অনেকক্ষণ পর যখন থেমে গেল তখন মনে একটি চমৎকার প্রশান্তি এসেছে, ঢাকের বাজ থামলে যেমন হয়। সেই শান্ত মুহূর্তে মনে হচ্ছিল, অনেক অজানা জানা হল, আর কত জানা ছবি গেল হারিয়ে।

বহুকালের সেই ছোট্ট পল্লীভবন, তুলসীমঞ্চ, দীপালোকে মায়ের স্নিগ্ধ চোখ কই মনে পড়ে ! কই আর মনে পড়ে, ছেলেবেলায় পাঠশালাে সেই ছড়োছড়ি, বটের ছায়ায় নামতা পড়া।

শীতের ছপূর, ছপূর বলেই মনে হয় না।

এগারটা বাজে নিশ্চয়, কি বেজে গেছে। কিন্তু মনেই হয় না বেলা হয়েছে। জানালার কাছে একফালি রোদ এসেছে। তারও তেজ নেই তেমন।

সেইখানে পিঠ দিয়ে অর্কসেবন করছিলাম। একটু গরম জল হলে স্নানের সুবিধা হয়। যেখানে স্নানের চৌবাচ্চা, দিনের কোনো সময়েই সেখানে রোদ আসে না। জল স্পর্শ করা দূরের কথা, চৌবাচ্চার ধারে দাঁড়ালেই হাড়ের ভেতর পর্যন্ত কেঁপে ওঠে।

কিন্তু গরম জলের ব্যবস্থা হওয়া অসম্ভব। উল্লুনের আঁচ কি আর আছে ? এখানে এক টুকরো কয়লা বাজে খরচ হওয়ার পাঠ নেই। আর যদি বা কোনো প্রকারে ব্যবস্থা করা যায়, কে এই নিয়ে বিকেলে কুরুক্ষেত্র করে ! তার চেয়ে অর্ক-সেবনেই যতটা হয়।

সিঁড়িতে দুম্‌দাম্‌ পায়ের শব্দ পাওয়া গেল।

খালি পায়ে এমন করে ঠাকুর ছাড়া আর কেউ আসে না। বোধ

হয় স্নানাহারের তাগিদ দিতে আসছে। ভেবে আমি কেবল মনে মনে বিরক্ত হয়ে উঠছিলাম, কিন্তু ঠাকুর যে ভাবে ঘনিষ্ঠ হয়ে আমার কাছে ঘেঁসে বসল তাতে আশঙ্কা দূর হল।

—কি খবর ঠাকুর মশাই ?

উড়িয়া ঠাকুর।

যক্ষ্মা রোগীর মত শীর্ণ, হাড়-বের-করা চেহারা। মাথার চুল ছোট-ছোট করে ছাঁটা। মধ্যস্থলে সুপুষ্ট শিখা। বয়স হয়েছে। স্নমুখের ক'টি দাঁতই ভেঙে গেছে। যে ক'টা আছে তাও আর দাঁত বলে চেনবার উপায় নেই। মনে হয়, মাড়িতে কতকগুলো তরমুজের বিচি আটকে গেছে। পান খেয়ে এমন অবস্থা হয়েছে।

ঠাকুর আমার কথার উত্তর না দিয়ে কীর্তনীয়ার ঢঙে হাঁটু গেড়ে বসল। তারপর, যেন অত্যন্ত সতর্কভাবে, প্রসারিত বাঁ হাতের তালুর ওপর ডান হাতের তর্জনী আর মধ্যমা আঙ্গুলের ডগা ঠেকিয়ে গম্ভীর-ভাবে আমার দিকে চাইলে।

বললে, বাবু সকল গরুর মাথায় টিক্ থাকে না।

—থাকে না ?

—না। লাখো গরুর মধ্যরে একটির মাথায় থাকে। এ মেসে বাবু বলিতে আপুনি।

অর্থাৎ আমিই একমাত্র গরু যার মাথায় টিকা আছে! যাইহোক, ব্যাপারটা বোধগম্য হল। বিশেষ কারণে সম্প্রতি একমাত্র আমাকেই ঠাকুর মশায় বাবু ঠাউরেছেন। এবং সকলের মধ্যে আমার কপালেই টিকা আবিষ্কার করেছেন।

বললাম, কি হল ?

—কিছু না — বলে ঠাকুর নিশ্চেষ্টভাবে বসে রইল।

মিনিট পাঁচেক আমাকে দ্বিধায় ঝুলিয়ে রেখে ঠাকুর বললে, আপনি মনিব, মোর বাপ অছি। দু'টি কথা আপনাকে বলিব।

—বলুন।

এ মেসে ঠাকুরকে তুমি বলার পাঠ নাই, ‘আপনি’ বলি।
জাত্যংশে ব্রাহ্মণ তো বটে। আর কর্ম? তা ভাতরাঁধা কি ডাঙ্গ
ক্লিনিং-এর দোকানে কাজ করার চেয়ে খারাপ?

ঠাকুর বললে, কেণ্টা মুনিব অছি, কি চাকর অছি?

এ আবার কি প্রশ্ন!

বিস্মিতভাবে বললাম, চাকর অছি!

—এই কথা আর কিছু নয়।

বলে ঠাকুর যেমন ধুকতে ধুকতে এসেছিল, তেমনি ধুকতে
ধুকতে নেমে গেল।

এত বড় একটা গুরুতর প্রশ্ন করবার জন্যে কেন কষ্ট করে জরা-
জীর্ণ দেহ ওপর পর্যন্ত টেনে এনেছিল সেই জানে।

ব্যাপারটা কি হতে পারে বিস্মিতভাবে ভাবছি, এমন সময় দাসুর
কণ্ঠস্বর:

এই যে! বসে আছেন? বেশ আছেন মশাই! হা-হা-হা।

চমকে উঠলাম।

দাসুবাবু সিঁড়ির মাঝখানে দাঁড়িয়ে জুতোর ফিতে খুলতেলাগল।

দাসুবাবুর বয়স বেশি নয়। ছেলেও ভালো। নানা কারণে
স্কুলের পড়া অসময়ে সাস্র করে বছর খানেক আগে কলকাতায় আসে
অর্থোপার্জনর চেষ্টায়। বছ কষ্টে গড়পাড়ের দিকে একটা মদের
দোকানে কাজ মিলেছে। সকালে বেরিয়ে যায়, এগারোটায় ফেরে।
আবার দুটোয় বেরিয়ে যায়, ফিরতে রাত নটা-দশটা।

দাসু কথা বেশি বলে না, কেবল হা হা করে হাসে। আর
যতটুকুও বা কথা বলে, হাত নাড়ে তার চেয়ে বেশি। মাথা নাড়ে
আরও বেশি, আশী বছরের বুড়োর মতো। ওই থেকেই কি বলতে
চায় বুঝে নিতে হবে।

বললে, দাদা ফেরেনি তো ?

দাদা মানে অবধূত। দাসুর মাসতুতো ভাই। রেলের কাজ করে। বিকেল তিনটে থেকে রাত দশটা পর্যন্ত কাজ।

ঘাড় নেড়ে বললাম, ফেরে নি।

দাসু গায়ের নীল রঙের আলোয়ানটা আর ছাই রঙের গরম কোট আলনায় টাঙিয়ে রাখলে। গেঞ্জিটা বাইরে ছাদে রোদে দিলে।

মাথা নেড়ে বললে, আচ্ছা লোক বটে ! পাছে সকালে খেতে হয় বলে ন'টার সময় বেরিয়ে যাবে। হা-হা-হা।

দাসু মাথা দোলাতে দোলাতে নেমে গেল। একটু পরেই নিচে বাঁয়া-তবলার শব্দ পাওয়া গেল।

দাসুর বাজনার সখ আছে, সময় নেই। এই সময় আধ ঘণ্টাটেক বাজিয়ে হাতের আড় ভেঙে নেয়। কিন্তু ওর শত্রু অনেক। গোবর্ধন তো প্রথম নম্বর।

গোবর্ধন কর্পোরেশনে রাস্তা সম্পর্কে কি কাজ করে। সন্ধ্যা হতে না হতে ঠাকুরকে খাওয়ার তাগিদ দেবে। সকলের আগে খাওয়া সেরে, মাথার কাছে একটা দেশলাই রেখে, আপাদমস্তক একটা রাগ মুড়ি দিয়ে ঘুমুবে।

তারপর সবার যখন ঘুম আসবে, ও তখন একবার করে দেশলাই জ্বালবে আর ঘড়ি দেখবে। চারটের সময় ওর বোধ হয় কাজ আরম্ভ।

আগে দেশলাই রাখত না, ঘড়িও ছিলনা। কিন্তু একবার অন্ধকারে কাজে বেরোবার সময় দাসুর মাথায় পা দেওয়ায় ভীষণ গোলমাল বাধে। তারপর অনেক খরচ কমিয়ে ঘড়ি কিনতে বাধ্য হয়েছে। দেশলাইও একটা করে রাখে।

ছোটখাটো মানুষটি।

খুট খুট করে আসতে আসতে তবলার আওয়াজ পেয়ে বললে, বাবা, ও ঢেঁড়ি পিটোনো রাখ। খেয়ে-দেয়ে নিয়ে একটু সুস্থ হয়ে শোও বরং।

দাসু তবলায় একটা তেহাই দিয়ে বললে, এই যে ড্রাইভার এসেছে! তিনটের সময় গাড়ি ঠিক করে রেখ। আমাকে বেরুতে হবে।

এইটে ওদের ছ'জনের মধ্যে মামুলী সম্ভাষণ বিনিময়!

দাসুর তবলা-বাজানোকে গোবর্ধন বাঘ বলে আমল দিতে চায় না। ওটাকে সে ঢেঁড়ি-পোটার সগোত্র বলে মনে করে। পক্ষান্তরে, যে-গাড়ি নেই, যার আশাও দাসুর দূরতম কল্পনাতেও নেই, গোবর্ধনকে দাসু তার সেই নিতান্ত কাল্পনিক গাড়ির ড্রাইভার বানিয়েছে!

গোবর্ধন সিঁড়ি দিয়ে উঠতে উঠতে বললে, গাড়ি দেখছ কখনও?

সঙ্গে সঙ্গে পিছনে দুপ দুপ শব্দ শুনে ফিরে তাকিয়ে বললে, কোথায় গিয়েছিলেন মশাই? খান নি যে এখনও? ওহে দাসু, আজ বটুক বাবুর হল কি? এগারোটা বেজে গেছে এখনও বটুক বাবুর খাওয়া হয়নি?

বটুক ঘোষ পাশ কাটিয়ে চলতে চলতে বললেন, কাজ থাকলে এক-আধদিন দেরি হয় মশাই।

বটুক ঘোষের কাজ ছিল।

কোথায় একটা টুইশান খালি পড়েছে তার সন্ধান নিতে গিয়েছিলেন। নইলে ব্রহ্মাণ্ড উলটে গেলেও দশটার মধ্যে খাওয়ার অস্থি থাকে না।

বটুক ঘোষ তখন যেভাবে ছাদে মাত্র, বালিশ, চাদর, জামা রোদ্দুরে দিলেন, ভেবেছিলাম আর কোথাও ভদ্রলোক বেরুবেন না।

তারপরে কখন আবার জামা গায়ে দিয়ে বেরিয়ে গিয়েছিলেন টের পাইনি।

ভদ্রলোকের বেশের বাহাছরী আছে। কাপড় যত লম্বাই হোক, এমনভাবে পরবেন যাতে হাঁটুর নিচে না নামে। ডান দিকটা যদি একটু নামে, কোঁচা পকেটে গুঁজলেই সে ক্রটি শুধরে যায়। তার ওপর একটা লম্বা বুলের খয়ের রঙের পাঞ্জাবী। এক জোড়া জুতোও আছে। এখনও মনোযোগের সঙ্গে লক্ষ্য করলে বোঝা যায় আদিতে তার রং ব্রাউন ছিল।

বটুক ঘোষ কেমিষ্টীতে অনাস' নিয়ে বি, এস-সি পাশ করেছেন আজ বছর বারো হল। এখনও পর্যন্ত কোনো স্থায়ী কাজের যোগাড় হয়নি। ছ'বেলা ছুটো ট্রাইশান করেন। ছপুরে আর একটা যদি পাওয়া যায় সেই চেষ্টায় বাইরে গিয়েছিলেন।

জিগ্যেস করলাম, কি হল?

খাওয়ার তাড়াতাড়ি আছে। বটুকবাবু সংক্ষেপে উত্তর দিলেন, সুবিধে নয়।

পাঞ্জাবীটা আলনায় মেলে দিয়েই তাড়াতাড়ি নিচে ছুটলেন। কিছুকাল থেকে ম্যালেরিয়ায় ভুগছেন, সুতরাং স্নানের বালাই নেই। গামছা প'রে কাপড়টা কেচে আর ওপরে তোলেন না। তাতে অনাবশ্যক খানিকটা সময়ের অপব্যয় হয়। সময় সম্বন্ধে ভদ্রলোক অত্যন্ত সতর্ক। গামছা প'রেই খেতে বসলেন।

বটুক ঘোষের খাওয়াও একটা দেখবার ব্যাপার। এক মিনিটের বেশি লাগে না। ভাতে ডালে মাখা আর সঙ্গে সঙ্গে গলাধঃকরণ। চর্বণের পণ্ডিত্রম নেই।

সুতরাং দেখতে দেখতে বটুক ঘোষ আহালাদি সেরে ফিরে এলেন। কাপড়টা বাইরে মেলে দিয়ে, এক খাবল্য মসলা মুখে দিয়ে জাবর কাটতে লাগলেন।

গোবর্ধন বললে, না দেখেই খেলেন তো ? ওর মধ্যে ছারপোকা থাকে জানেন ?

নিশ্চিতভাবে মেঝেয় মাত্রটা পাততে পাততে বটুক বললেন, থাক না। রাতকানা হবার ভয় থাকবে না। কতদিন খেয়েছি।

ছারপোকা খেলে যে রাতকানা হবার ভয় থাকে না, এত বড় বৈজ্ঞানিক তত্ত্বের ক'জন খবর রাখে ?

বটুক একখানা খররের কাগজ খুলে বসলেন।

আমরা নিচে স্নান করতে নামছি এমন সময় অবধূত এল।

—এত করে জল নষ্ট করিস না। নাইতে হবে, এখনও অনেককে নাইতে হবে।...এখানে মগটা রাখলে কে ? এখুনি যাবে বটুকবাবুর পায়ে লেগে।...আবার এইখানে দরজার সামনে ঝাঁটা রেখেছিস ? এ ছোঁড়াকে একদিন এমন প্রহার দোব...

এটা অবধূতের বাতিক,—জল আর ঘর-পরিষ্কার।

এ মেসে কলের জল যে কম আসে তা নয়। তার নিজের স্নান এবং কাপড়-চোপড় সাবান দেওয়ার জলের অভাবও বড় একটা ঘটে না। অথচ সব সময়েই তার আশঙ্কা জল ফুরিয়ে যাবে। তার স্নানের জল থাকবে না। কিংবা যদি কাপড়-চোপড়ে সাবান দিতে হয়, তাহলে জলের অভাব ঘটবে। সুতরাং প্রাতঃভ্রমণ সেরে বারোটা-একটায় যখন সে ফেরে, তখন প্রথমেই উদ্বিগ্নের সঙ্গে দৃষ্টি দেয় জলের চৌবাচ্চার দিকে। এবং তার আশে-পাশে কাউকে দেখলেই জলের সদ্যবহার সম্বন্ধে সতর্ক করে দেয়। বোধ করি তার অবচেতন মনে এই বিশ্বাস বদ্ধমূল হয়ে আছে যে, কলকাতা কর্পোরেশনের জলের কল একমাত্র তারই জগ্নে খোলা হয়েছে এবং একমাত্র তারই স্নান এবং অন্যান্য আবশ্যিক-অনাবশ্যিক প্রয়োজন সাধনেই তার যথার্থ সদ্যবহার।

ঘর-পরিষ্কার সম্বন্ধেও এমনি কথা বলা চলে।

কেষ্ঠার অনেক দোষ সন্দেহ নেই। প্রয়োজনের সময় তাকে পাওয়া যাবে না। নতুন নতুন কৈফিয়ৎ আবিষ্কারে সে অতুলনীয়। সে অবাধা। তার কাজের একটা পদ্ধতি আছে। যে যতই বকুক সেই পদ্ধতির ব্যতিক্রম সে সহজে করে না। এ সমস্তই সত্য। কিন্তু নিজের সময়মতো নিজের কাজ সে ঠিক করে যায়। সেই সময়টিতে ঘরও সে ঠিক ঝাঁট দেয়।

আর ঘর মানে তো একখানি ঘর আর তার সামনেই একফালি বারান্দা আর সিঁড়ি। তাতে কতক্ষণই বা লাগে!

কিন্তু অবধূতের ধারণা ঘর সে পরিষ্কার করে না। করলেও ভালোমতো পরিষ্কার করে না! ধূলা-বালি কিছু কিছু থেকে যায়। সুতরাং দিন অথবা রাত্রির যে সময়েই সে আসুক,—যত বেলায় অথবা যত অবেলাই হোক,—নিজের হাতে একবার ঝাঁট না দিলে সে পরিচ্ছন্নতা সম্বন্ধে নিঃসংশয় হতে পারে না।

কিছুদিনের চর্চায় এটা অভ্যাসে দাঁড়ায়। আরও কিছু দিনের চেষ্টায় এখন এটা বাতিকে পরিণত হয়েছে!

—এসেই ফুদ্ ফুদ্ আরম্ভ করেছেন তো?—দাসু বললে।

—তোমাদের কি? তোমাদের কি? খালি খাওয়া আর শোয়া। মেসের কি হচ্ছে না হচ্ছে সে তো আর দেখবে না?

অবধূত আপন মনে বিড় বিড় করতে করতে ওপরে চলে গেল। চাকরের জল নষ্ট করার কাজ আগেই শেষ হয়েছিল, এবারে আমাদের আর একবার সে কথা স্মরণ করিয়ে দিয়ে গেল।

গোবর্ধন ঝাঁঝের সঙ্গে বললে, শীগগির যদি এস তো জল পাবে, নইলে পাবে না। খালি জল নষ্ট হবে, জল নষ্ট হবে!

কিন্তু শাসানি যত বড়ই হোক, বাতিক তারও চেয়ে বড়। সুতরাং গোবর্ধনের শাসানি সে গ্রোহের মধ্যেই আনলে না।

গায়ের পাঞ্জাবীটা খুলে ছাদে রোদে মেলে দিয়ে এল। শুকনো গামছাটা দিয়ে সর্বাঙ্গ মুছলে। তারপর ঝাঁটাটা নিয়ে ঘর ঝাঁট দিতে বসল।

দাসু বললে, এমন গঁতো ভু-ভারতে পাবে না।

গঁতো বটে! আমরা স্নান সেরে যখন খাওয়ার জন্তে নিচে নামছি, ও তখন ঘর পরিষ্কার সেরে সিঁড়ি ঝাঁট দিচ্ছে। এর পরে স্নান করবে, হয়তো ছ'একখানা কাপড়-জামায় সাবানও দেবে। তারপরে খেতে বসবে!

অবধূতের জন্তে অপেক্ষা করে লাভ নেই। ওর এখনও অনেক দেরি। আমরা তিনজনে খেতে বসলাম,—আমি, গোবর্ধন আর দাসু।

ঠাকুর আমাদের সকলকে এনামেলের থালায় যত্ন করে ভাত বেড়ে দিলে।

দাসু আমাকে বললে, আপনি জানেন না বোধ হয়, ঠাকুর আমাদের খুব পণ্ডিত লোক। গীতগোবিন্দ কণ্ঠস্থ। গোড়া থেকে শেষ পর্যন্ত।

ঠাকুর সবিনয়ে বললে, না না বাবু, পণ্ডিত নই। পণ্ডিত কাছাকে বলে? তবে সময় পাইলে কিছু কিছু লিখাপড়া করি, এই আর কি।

বলে সম্মিত দৃষ্টিতে সকলের দিকে চাইলে।

গোবর্ধন জিগোস করলে, ঠাকুর মশাই, শাকে বুঝি ঘি দিয়েছেন?

ঠাকুর সহাস্তে বললে, টিকে দিউছি। কুলাক-না কুলাক সবতে টিকে টিকে ঘি দিই।

—বেশ! বেশ!—আমি পুলকিত হয়ে উঠলাম। বললাম, দেবেন, দেবেন। ঘি না দিলে

ঠাকুর সোম্লাসে হাতা উঁচিয়ে বললে, হ্যাঁ, ‘টোস’ হয় না। টিকে ঘি বললাম, দেবেন। না কুলুলেও ঘি একটু দেবেন। ‘টোস’ হবে। আপনার পেঁপের তরকারীটা তো চমৎকার হয়েছে। আছে আর? দিন তো একটু।

আহ্লাদে ঠাকুরের মুখ উজ্জ্বল হয়ে উঠল। তার মনোহর রান্না সাধারণত কেউ চেয়ে খায় না। কিন্তু এক চামচ তরকারী তুলেই থমকে দ্বিধাভরে বললে, আজ্ঞা, এটা পপেয়া নয়, লাউ অছি।

—লাউ? তাহলে থাক। আমি ভেবেছিলাম...যাকগে, তাহলে বরং ফুলকপির তরকারীই একটু দিন।

—টিকে নিবেন না?

—না, কম পড়ে যাবে হয়তো। বরং ফুলকপিই দিন। ওটাও খুব চমৎকার হয়েছে।

ঠাকুর সে তরকারীটা নামিয়ে রেখে বিস্মিতভাবে বললে, আজ্ঞা ফুলকপি তো নাই!

—নাই?—একটা তরকারীর দিকে অঙ্গুলি নির্দেশ করে বললাম,
—এটা কি তাহলে?

—ওইটা?

ঠাকুর একটা চামচ দিয়ে সেই তরকারী খানিকটা তুলে একগাল হেসে বললে, ওটা বাঁধাকপি।

বাঁধাকপি! আমি ভাবছিলাম...ঠিক ফুলকপির মতো 'টেম'।
বাঃ থাক, থাক, আর দেবেন না। আপনার জন্যে রইল কি?

ঠাকুর ঠোঁট উলটে পরম ঔদাস্তভরে উত্তর দিল, আমি কি ওই খাই বাবুমশাই?

খায় না! তাতেই...

বললাম, খান না?

ডান হাতের চামচখানা নেড়ে বললে, না। টিকে ভাত নিই, ছুই পয়সার দহি আনি, ব্যস।

দাসু বললে, লোভ নেই যে! লোভ একেবারে নেই।

ঠাকুর এবার চোখ পাকিয়ে হাতা উঁচু করলে। রাগে নয়, অহুরাগে স্তব্ধ করে বললে :

বিপিনের পীণ উরজা
অপূর্ব দ্রব্য দেখি ন মাগিবু ।
বিনা সহোদর মধ্যরে অদর
বিপথকু করি থিবু গো-ও-ও ।

তারপর নিজেই তার ব্যাখ্যা করতে লাগল :

মানে কি ? কৌশল্যা বলিছন্তি । কাকে ? সীতাকে । কি বলিছন্তি ?
দাসু মাথা নেড়ে বললে, বেশ, বেশ !

কিন্তু শেষ রক্ষা করতে পারলে না । একেবারে হো হো করে
অট্টহাস্য করে উঠল ।

ঠাকুর রাগে গড় গড় করতে করতে হাতা দিয়ে অকারণে ডাল
নাড়তে লাগল । তারপর আড়চোখে আমার দিকে চেয়ে বাঁ-হাতের
তর্জনী তুলে বললে, আপনাকে তখনই বলেছি বাবু, সকল গল্প
মাথায় টিক্ থাকে না ।

বললাম, হ্যাঁ । যা বলেছেন !

ঠাকুর এক দিকের ওষ্ঠপ্রান্ত কাণের কাছ পর্যন্ত প্রসারিত করে
অপূর্ব ভঙ্গিতে হেসে হেসে নাথা নাড়তে লাগল ।

আহারান্তে বিছানাটা পেতে একটু গা গড়াবার আয়োজন করছি,
হাবুল এল ।

হাবুল কলেজে পড়ে । ফর্সা, দোহারা চেহারা মাথার চুল
থেকে পায়ের চটি পর্যন্ত আপ-টু-ডেট । আগে কিছুদিন এই মেসে
ছিল । এখনও মায়া কাটাতে পারেনি । প্রত্যহ এই সময় একবার
করে আসে । না এলে মুন্সিল হত, এই কোর্টরে বসে বাইরের
জগতের কোন খবরই পাওয়া সম্ভব হত না । হাবুলের এই একটি
গুণ আছে, সমস্ত কলকাতা শহরটা ঠুক ঠুক করে পায়ে-পায়ে একবার
ঘুরে না এলেই নয় । নইলে ভাত হজম হয় না ।

গোবর্ধনের সঙ্গেই ওর ভাব বেশি। জানালায় তো ছিটকিনির বালাই নেই। একটা ভারী কাঠের ছড়কো আছে, রাত্রে সেইটে জানালায় কোণাকূর্ণি ঠেকা দেওয়া হয়। গোবর্ধন বেচারি অত্যন্ত ঘুমকাতুরে। আড়াইটার সময় ফের তাকে বেরুতে হয়। তবু ইতিমধ্যে একবার, —যতক্ষণের জন্মেই হোক—ছপুরে একটু নিজা দেওয়াই চাই। এটা তার বিলাস।

গোবর্ধন খেয়ে এসেই আপাদমস্তক রাগ মুড়ি দিয়েছিল। হাবুল এসে সেই ভারী কাঠখানা নিঃশব্দে দিলে তার বকের ওপর চাপিয়ে। গোবর্ধন চমকে লাফিয়ে উঠল। চট্‌বার উছোঁগ করছিল, কিন্তু হাবুলের মুখের হাসি দেখে আর চটতে পারল না। আপনার শীর্ণ বিছানায় কাৎ হয়ে তার জন্মে একটু স্থান করে দিলে। তার ধারণা বিশ্বশুদ্ধ সকলেই তার মতো একটু ঘুমুতে চায়। অস্তুত শুতে।

হেসে বললে, এই যে, হাবুলচন্দ্র! তা নইলে আর কে হবে! শোও। বটুক ঘোষ খবরের কাগজ থেকে মুখ তুলে জিগ্যেস করলেন, কি খবর?

গোবর্ধনের বিছানায় বসে হাবুল বললে, কাল বিছোদয় গার্লস্‌ স্কুলের থিয়েটার আছে। ইউনিভারসিটি ইন্সটিটিউটে। সন্ধ্যা ছ'টায়। যাবেন?

—টিকিট পেয়েছেন নাকি?

—ঘোগাড় করলাম। আমার এক ফ্রেণ্ডের মামা ওদের স্কুলের মাষ্টার। ভবানীপুরে থাকেন। তার কাছ থেকে বাগালাম। এই কিরছি সেখান থেকে।

—ক'খানা টিকিট পেয়েছেন?

—ছ'খানা। বালীগঞ্জ গেলে আরও একখানা পেতে পারতাম। আমার ছাত্রের ভগ্নিপতি আবার ওদের স্কুলের মেম্বার কিনা। যাবেন আপনি?

খবরের কাগজ ভাঁজ করতে করতে বটুক উৎসাহের সঙ্গে বললেন,
তা আবার যাব না কেন ?

একটু থুঁৎ থুঁৎ করে হাবলু বললে, ওরা কিন্তু তেমন ভাল করে
না। গেলবারেও গিয়েছিলাম কি না।

বটুক মাথার দিকের তাকে খবরের কাগজগুলো রাখবার জন্তে
উঠে দাঁড়াচ্ছিলেন, দাসু হাঁ হাঁ করে বাধা দিয়ে বললে, উঠবেন না,
উঠবেন না। কাপড়টা পরুন আগে।

বটুক কাপড়ের দিকে দৃষ্টি দিয়ে দাসুর উক্তির সারবত্তা উপলব্ধি
করলেন। কিন্তু কিছু বললেন না।

কাপড়টা সামলে নিয়ে বললেন, বিনা পয়সায় যাব মশাই, ভাল
আর মন্দ। ভিড়ের মধ্যে দাঁড়িয়ে রাস্তার রেডিও শোনার চেয়ে তো
ভালো। তাহলেই হল।

হাবলু বললে, বিষ্ময়বাবে ভালো থিয়েটার আছে। বাগবাজার
নাট্যসমাজের। মিনার্ভায় হবে। দেখেছেন ? দেখেননি ? Marvel-
lous ! পুরুষে যে অমন মেয়ের পাঠ করতে পারে, না দেখলে
বিশ্বাস হয় না।

একটু চুপ করে থেকে আবার বললে, পারি খান কয়েক টিকিট
বাগাতে। কিন্তু হাঁটতে হবে অনেক মশাই,—টালা পর্যন্ত। সে
অনেক ঝামেলা।

—তা যান না কেন ঠুক ঠুক করে। টালা আর কতদূর ?—বটুক
ঘোষ বিরক্তভাবেই বললেন। আলস্য তিনি সহ করতে পারেন না।

—দেখি তো।

হাবলু বোধ হয় মনে মনে ভাবতে লাগলো, এই সামান্য মাইল
ছয়েক পথ যাবে, কি যাবে না।

বটুক বললেন, আর ক্যালেণ্ডার ? আমার সেই ক্যালেণ্ডারের কি
করলেন ?

—এই যে সেদিন কোথা থেকে নিয়ে এলেন মশাই, অনেকগুলো।

—অনেকগুলো আবার কোথায় দেখলেন?

—অনেকগুলো বই কি! এক গাদা দেখলাম যেন।

—একগাদা আবার কখন দেখলেন? মোটে তো খান কুড়ি যোগাড় হয়েছে।

—তবে?

উদ্ভার সঙ্গে বটুক বললেন, তবে আবার কি মশাই! চাই যে চল্লিশখানা।

বিস্মিতভাবে হাবলু জিগ্যেস করলে, চল্লিশখানা নিয়ে কি করবেন?

—করব আবার কি? ছবি তো বটে, টাঙ্গিয়ে রাখব। দেবেন কিনা বলুন।

—আচ্ছা দোব একখানা। কিন্তু আবার হারিসন রোড পর্যন্ত হাঁটতে হয়।

গম্ভীরভাবে বটুক ঘোষ বললেন, ওই তো আপনাদের দোষ। একটু হাঁটতে হলেই পিছিয়ে যান। ইয়ংম্যান আপনারা, হাঁটতে ভয় পেলে চলবে কেন? আমার দেখুন না,

কিন্তু কথাটা আর শেষ করতে পারলেন না। হঠাৎ চমকে থেমে গেলেন।

শুধু তিনি নন, অকস্মাৎ নিচে একটা কোলাহল শুনে আমরা সবাই চমকে উঠলাম।

অবধূতের গলা যেন।

অবধূত নিজের মনে কি বিড় বিড় করে বকে, কিন্তু উত্তেজিত হয়ে বড় একটা চিৎকার করে না। ঠাকুরও কিছু যেন উত্তেজিতভাবে বলছে না? কি হল আবার!

বটুক ঘোষ জানালা দিয়ে উঁকি মেরে ব্যস্তভাবে বললেন, এই দেখুন, আবার কি কৈজং!

বটুক যেভাবে তাড়াতাড়ি নেমে গেলেন, তাতে আমরাও আর নিশ্চেষ্টভাবে বসে থাকতে পারলাম না।

নিচে গিয়ে দেখি, উত্তেজনার আধিক্যে অবধূত পিঁড়ির ওপর সোজা হয়ে উঠে দাঁড়িয়েছে। ওর খাওয়া তখনও শেষ হয় নি। এমনিতেই ওর কথা জড়ানো, বুঝতে কষ্ট হয়। তার ওপর রেগেছে। এঁটো ডান হাতখানা নেড়ে নেড়ে ও যে কি বলছে, এক বিন্দুও বুঝলাম না।

আর ঠাকুর? ঠাকুর দাঁড়ায়নি বটে, কিন্তু সেও উত্তেজিত কম হয়নি। কোমরে ফিক ব্যাথার জগ্গে ঠাকুর তাড়াতাড়ি দাঁড়াতে পারে না। পিঁড়ির ওপরে বসেই উত্তেজনায় এক একটা কথা বলবার চেষ্টা করছে। কিন্তু বিধি বিরূপ, কাশির ধমকে শেষ করতে পারছে না।

—কি হল কি? আরে হল কি তাই বলুন না! চোঁচাচ্ছেন তো খুব।

বটুক ঘোষ মধ্যস্থ হলেন।

হলেন বটে, কিন্তু ব্যাপার তবু পরিষ্কার হল না। কিন্তু মেসের ব্যাপারে বটুক ঘোষের তিনটে চোখ। বটুক কিছু শুনে আর কিছু দেখে ব্যাপারটা একরূপ অশুমান করে নিলেন।

বললেন, ঠাকুর মশাই, অবধূতবাবুকে মাছ দেননি?

অনেক লোকের সমাগম দেখে ঠাকুর তখন অনেকখানি সাহস পেয়েছে। এমন কি, ফিক ব্যাথা সত্ত্বেও কোমরে হাত দিয়ে উঠে দাঁড়িয়েছে।

সদন্তে বললে, দেল, কি নিজে খাইল!

অবধূত ঝাঁঝিয়ে উঠল। বললে, ফের মিথ্যে কথা! দিয়েছেন? একখানা মাছের জগ্গে আমি মিথ্যে কথা বলছি বলতে চান? হুঁ!

রাগে অবধূতের সর্বশরীর কাঁপছিল। সবাই জানে, মিথ্যা কথা বলবার লোক সে নয়।

ঠাকুর এবার অবধূতকে আড়াল করে বটুক ঘোষের সম্মুখে এসে দাঁড়াল।

আস্তে আস্তে বললে, আক্ষার মাছ গণতি অছি। আপনি দেখন্তু, ছুই খণ্ড রহিছি। যদি ন দেইছি তবে গেলা কোয়াড়কু? আক্ষি তো খাই নাছ!

বলে পেটে হাত দিয়ে দেখাল। অর্থাৎ খেলে পেটের মধ্যেই থাকত এবং দেখাও যেত নিশ্চয়।

তারপর বললে, আউ অতিরিক্ত মাছ আক্ষি কোয়াড়ু পাইব?

বিড় বিড় করে অবধূত ঠাকুরের কথা পুনরাবৃত্তি করে বললে, কোয়াড়ু পাইব!

ঠাকুর তার দিকে ফিরে বললে, আউ!

তারপর বটুকের সামনে এঁটো হাত নাড়তে নাড়তে বললে, আক্ষি কহুছু তেবে বিড়াড়ি খাইছি।

বাধা দিয়ে দাসু বললে, বেড়ালে খেয়ে গেলে উনি দেখতে পেতেন না?

ঠাকুর আরও সূরে এসে ফিস্ ফিস্ করে বললে, টিকে ঘুম করি-ছিলে। খাইতে খাইতে প্রত্যহ অবধূত বাবু টিকে ঘুম করিছন্তি। সেহি অবসরে,

নাক সিটকে অবধূত বললে, আরে না মশাই! ঘুম কিসের! মাঝে মাঝে চোখ বন্ধ করে ভাবি হয়তো।

ঠাকুর বললে আউ থরা পায়খানা যাই ছিলে!

— খেতে খেতেই?

ঠাকুর হাত নেড়ে বললে, হাঁ-আ-আ। প্রত্যহ একবার করি। পায়খানা, আউ টিকে ঘুম।

অবধূত জিভে একটা টাকান্ দিয়ে বললে, আরে সে কতক্ষণের জন্তে মশাই? গেলাম আর এলাম।

বটুক ঘোষ বললেন, খেতে বসেছেন তো এখন নয়! এক ঘণ্টার ওপর হল। ওই হয়েছে মশাই, বেড়ালেই নিয়ে গেছে আপনি যখন পায়খানায় গিয়েছিলেন।

মাথা নেড়ে অবধূত বললে, তা হবে কি করে মশাই? তা হলে আমার মনে থাকত না? দেখে যেতাম মাছ, এসে দেখতাম নেই। বুঝতেই পারতাম।

—তবে মশাই, যখন ঘুমিয়েছিলেন তখনই খেয়ে গেছে। ওর আর কথা নেই।

অবধূত সে কথাও বিশ্বাস করতে চাইল না। তীব্রকণ্ঠে প্রতিবাদ করে বললে, কী যে বলেন! তাই যায় কখনও? কোনো দিন খায় না, আজই খেলে?

দাস্তু বললে, এখন থেকে রোজই খাবে দেখবেন। এতদিন ধরতে পারিনি। এখন চিনে ফেলেছে আপনাকে।

কেষ্টা ভিড় ঠেলে এতক্ষণ পর্যন্ত ভেতরে আসবার সুবিধা পায় নি। এখন ভেতরে এসেই এমন এক কাণ্ড করে বসল যাতে সমস্ত ঘটনা জলের মতো পরিষ্কার হয়ে গেল।

অবধূতের থালার কাছে হাঁটু গেড়ে বসে তার পাতের নিচে নজর দিয়েই কেষ্টা চোঁচিয়ে উঠল, ওই তো মাছের কাঁটা। দেখসিয়েন, দেখসিয়েন।

সত্যিই বটে! অবধূতের পাতের নিচে সরু-সরু ক'টি কাঁটা রয়েছে। নিশ্চয় বেড়ালে খায়নি।

সবাই অবাক অবধূত নিজেও।

কয়েক মুহূর্ত পরে পিঁড়িতে পুনরায় বসে একটু অপ্রস্তুতভাবে অবধূত বললে, তাহলে বোধ হয় ঘুমের ঘোরে আমিই খেয়েছি। মনে নেই।

দান্ন দাদার কাণ্ডকারখানায় মনে মনে বিরক্ত হচ্ছিল। বললে, আর বসতে হবে না। খুব খাওয়া হয়েছে। ঘণ্টা দুই হল। উঠুন এইবার।

অবধূত মুখ ভেঙে বললে, না বসতে হবে না! আমি কি খেয়েছি না কি? সবে মাত্র বসেছি। খুব খাওয়া হয়েছে!

অবধূত ভাতে ডাল মাখতে লাগল। আর ঠাকুর দিঘিজয়ী বীরের মতো রান্নাঘর মাতিয়ে বেড়াতে লাগল।

সবাই ওপরে উঠে এল।

বটুক ঘোষের দিবানিদ্রার অভ্যাস নেই। সমস্ত দুপুর বেলা ঠায় বসে হয় খবরের কাগজ, নয় একখানা নভেল, নয়তো আর কিছু পড়েন। খবরের কাগজ কেনার পাঠ এখানে নেই। অবধূত একখানা করে মফঃস্বল সংস্করণের ইংরিজি খবরের কাগজ পায়, তাই রেল-অফিস থেকে নিয়ে আসে। সেখানাও কারও উলটে দেখার সময় নেই। এক বটুক ঘোষই পড়েন, এই সময়। বাকি সবাই নিদ্রা যায়।

আরও আধঘণ্টা পরে অবধূত এল। খাওয়ার পরে তার আবার অনেক তুকতাক আছে। সোজা ছাদে গিয়ে প্রথমে মটমট করে আঙুল মট্‌কালে, সূর্যের পানে তাকিয়ে প্রণাম করলে, বার কয়েক তুড়ি দিলে, অবশেষে বাঁ নাক টিপে ডান নাক দিয়ে জোরে জোরে নিশ্বাস নিতে লাগল। মিনিট তিনেক। পেটে বার কয়েক হাত বুলোলে।

ওতে নাকি হজম ভালো হয়।

তারপরে ঘরে এল।

মুখশুদ্ধির জন্তে কাগজে মোড়া মসলা থাকে। খানিকটা মসলা

হাতে নিয়ে অবধূত জানালার ধারে আলোর কাছ গেল। সযত্নে ধূলা-বালি-ময়লা বেছে ফেলে দিলে।

আপন মনেই একবার বললে, মসলাটা কিছুতে মুড়ে রাখবে না। খোলা কাগজে পড়ে রয়েছে। যত ধূলা-বালি, আরগুলার নাদি। একদিন দেখেছি ছারপোকা ঘুরে বেড়াচ্ছে। হুঁঃ!

ঘরের ভিতর থেকে গোবর্ধন বললে, চোখ বুঁজে খেয়ে নাও। রাতকানা সেরে যাবে।

অবধূত হেসে ফেললে। বললে, তাহলে ঠাকুর মশাইকে খাওয়াও ছারপোকা মুঠো মুঠো করে। আমাদেরও ছারপোকা মরুক, ওরও রাতকানা ভালো হোক!

বটুক ঘোষ চমকে উঠলেন।

বললেন, উনি রাতকানা নাকি?

অবধূত হেসে বললে, রাতকানা দিনকানা সবই। নইলে অমন বাহারের রান্না হয়!

—যা বলেছেন!—বটুক ঘোষও হাসলেন।

আশ্চর্য! অবধূতের মনে কিন্তু ঠাকুরের সম্বন্ধে বিন্দুমাত্র রাগ নেই। সে বড় একটা রাগেই না। মেসের সবাই তার পিছনে লাগে। অধিকাংশ সময়ই রাগে না। তাদের ঠাট্টা বিক্রপ গায়েই মাখে না। যদি কখনও রাগে-ও, তখনই তা জল হয়ে যায়। কিছুই মনের মধ্যে পুষে রাখে না। ঠাকুরের সঙ্গে এত বড় যে একটা কলহ হয়ে গেল, যাতে এতখানি সে অপদস্থ হল, সে রাগও কখন নিভে গেছে। রাগও নেই, অপদস্থ হওয়ার লজ্জাও নেই। এখন যে সে হাসছে, পরিহাস করছে,—তাও বিন্দুমাত্র বিদ্বেষের সঙ্গে নয়, অত্যন্ত স্বাভাবিক এবং সরলভাবে।

হাসতে হাসতে ঘেরা বারান্দায় সে একখানা মাছুর পাতলে।

অবধূতের হুঁখানা মাছুর আছে। একখানা আটপৌরে, একখানা

পোষাকী। প্রথমখানা যে-কোন লোকের বসবার জন্তে। তার নিচের পিঠটা কালো হয়ে গেছে, বহু দিনের ব্যবহারে, ধুলায়-মলায়।

দ্বিতীয়খানির অবস্থাও যে খুব রাজকীয় তা নয়। তবে প্রথম-খানির মতো অত জরাজীর্ণ হয়নি। এইখানি ছুপুরে এবং রাত্রে তার নিজের শোবার জন্তে মসলন্দরূপে ব্যবহৃত হয়। এটিও অতি ব্যবহারে পাছে ময়লা হয়ে যায় বলে এর উপর কখনও একখানা পুরোণো কাপড়, অভাবে খবরের কাগজও পাতে।

আজ পাতলে একখানা পুরোনো কাপড়। জায়গায় জায়গায় ছিঁড়ে গেছে। এবং পাছে আরও ছিঁড়ে যায় সেই ভয়ে খুব আলতোভাবে এক পাশে গুল। তারপরে একখানা খবরের কাগজ নিয়ে তার বিজ্ঞাপনের পাতা গম্ভীরভাবে নাতিউচ্চ স্বরে টেনে টেনে পড়তে লাগল :

— নব নাট্যসমাজ - অগ্নিশিখা--- মহাসমারোহে তৃতীয় রজনী—
বাসুকীর ভূমিকায় বিখ্যাত অভিনেতা কালোবরণ অধিকারী—
অসামান্য নৃত্যপটীয়সী শ্রীমতী ছায়ারাণীর অগ্নিনৃত্য দেখিয়া নয়ন
সার্থক করুন—ইত্যাদি ইত্যাদি।

একবার অবধূত আপন মনেই বললে, ভালো হয়েছে।

এর মানে কিন্তু এ নয় যে, অবধূত নাটকটা দেখে এসেছে, এবং তার ভালো লেগেছে। ছাপার হরফ কোনো কিছু বেকলেই ও ধরে নেয় যে সেটা ভালো।

মিনিট দুয়েক আপন মনে বিড় বিড় করে এমনি পড়তে লাগল এবং সঙ্গে সঙ্গে মন্তব্য করতে লাগল। তারপরই আর কোন সাড়া না পেয়ে দেখি, হাতের ওপর মাথা রেখে ও দিব্যি ঘুমুচ্ছে !

হাসলে এই পড়াটা ওর ঘুমের ওষুধ। সেজন্যে সব সময়ে যে খবরের কাগজই চাই, এমন কোন কথা নেই। রাস্তায় যে সমস্ত বিজ্ঞাপন বিলি হয় তাই, এমন কি মুড়ি মুড়কির ঠোঙা হলেও তার চলে যায়।

পড়তে পড়তে তার ফুস আসে। ঘুম ঠিক নয়,—অবধূত বলে,—
আবিল্য।

বোধ হয় একটু নিজাকর্ষণ হয়েছিল। হঠাৎ একটা অস্বাভাবিক
চীৎকারে এবং বহু লোকের পদশব্দে লাফিয়ে উঠলাম। ঘুমের
ঘোরে প্রথমে যেন শুনলাম, পোস্ট। তারপরে নিচে গিয়ে শুনি, পোস্ট
নয়,—পোস্টকার্ড।

কেষ্টা একটা ভাঙা বাঁটি উঁচিয়ে বীরদর্পে দাঁড়িয়ে আছে, আর বৃদ্ধ
ঠাকুর মশাইও দেওয়ালে পিঠ দিয়ে বজ্রকণ্ঠে অনর্গল বিগুচ্ছ উড়িয়া
বলে যাচ্ছেন।

ব্যাপারটা কি ?

নিচের ঘরে ঠাকুর আর চাকর শোয়। কেষ্ট আজ সকালে
একখানা পোস্টকার্ড তার মাতুরের নিচে রেখে দিয়েছিল। সেখানা
পাওয়া যাচ্ছে না।

কেষ্ট বলে এর মধ্যে ঘরে আব কেউ ঢোকে নি। এ নিশ্চয়
ঠাকুরের কাজ। ঠাকুর আজ একখানা চিঠিও লিখেছে।

ঠাকুর চিঠি লেখার কথা অস্বীকার করছে না। বলছে, সে-পোস্ট-
কার্ড সে কিনে এনেছে, কেষ্টার নয়। চিঠিখানা এখনও সে ফেলেনি।
আমাদের দেখাল।

কেষ্টার যদি বা কিছু সন্দেহ ছিল, পোস্টকার্ড দেখার পরে
নিঃসংশয়ে বললে, ওইখানাই তার।

ঠাকুর চিঠিখানা তার নাকের গোড়ায় ধরে জিগ্যেস করলে, তুম্বার
এহিখণ্ড কি ?

কেষ্টা পোস্টকার্ডের দিকে ভালো করে চাওয়ার প্রয়োজন পর্যন্ত
বোধ করলে না। দ্বিধাহীন স্বরে উত্তর করলে, হাঁ, আমার।

ঠাকুর পোষ্টকার্ডখানা বটুক ঘোষের হাতে দিয়ে বললেন, দেখত বাবু, এহিটা নৌতুন, কি পুরুণ ?

এ মামলার কি রায় দেওয়া যায় বটুক ঘোষের মাথায় এল না। সমস্তা খুবই জটিল। কয়েক ঘণ্টার আগে-পিছু কেনা ছ'খামা পোষ্টকার্ড। তার মধ্যে একখানি অমুপস্থিত। অপরাধানিকে দেখে নির্ণয় করতে হবে, সেটি নতুন, না পুরোণো। এবং রায় দিতে হবে সেটি ঠাকুরের, না কেষ্ঠার !

বটুক ঘোষের অঙ্ক-কষা মাথাও বিচার করতে গিয়ে ঘেমে উঠল। কিন্তু তখনই তাঁর মস্তিষ্কের মধ্যে একটা তরঙ্গ খেলে গেল।

নিচের ঘর অত্যন্ত অন্ধকার। বাইরে থেকে ঘরে ঢুকলে ভো প্রথমে কিছুই দেখা যায় না। ক্রমে বোধ হয় বটুকের চোখ অনেকটা অভ্যস্ত হয়ে এসেছে।

কেষ্ঠার বিছানার দিকে অঙ্গুলিনির্দেশ করে বললেন, এখানে কেউ ঘুমিয়ে আছে, না কি ?

কেষ্ঠা বললে, ও আমার মামা।

—হলই বা মামা ? এত গোলমালে ঘুম ভাঙে না সে কেমন মামা ?—বটুক বাবু রেগে গেলেন।

জিজ্ঞেস করলেন, বাড়ী কোথায় ?

—মুর্শিদাবাদে।

—তাই হবে। এমন নবাবী ঘুম অশ্রু জেলার লোক পাবে কি করে ?

বটুক কিন্তু মুর্শিদাবাদী ঘুমের মর্ষাদা রাখলেন না। হিন্দিতে হুকুম দিলেন, উঠাও উস্কো।

কেষ্ঠা প্রথমে বার কয়েক সকাভরে 'মামা, মামা' বলে ডাকলে। সাড়া পেলো না। শেষে ঠেলতে লাগল। অনেক ঠেলাঠেলির পর মামা উঠে বসে চোখ রগড়াতে লাগল।

হ্যাঁ মামা বটে! মাথায় কেঁচু-ঠাকুরের মতো এক রাশ কাঁকড়া কাঁকড়া চুল। কাঁচা ঘুম ভেঙে যাওয়ায় চোখ লাল। যাকে বলে করঞ্জাক্ষ।

ব্রেন-ওয়েভ বোধ হয় একেই বলে। বটুক ঘোষের কি খেয়াল হল কে জানে, রুক্ষ কণ্ঠে জিজ্ঞেস করলেন, পোস্টকার্ড কোথায়?

মামা চোখ মেললে না। কেবল বাঁ হাতটা মাতুরের ভেতর চালিয়ে দিলে।

বটুক আবার এক ধমক দিয়ে জিজ্ঞেস করলেন, আরে পোস্ট কার্ড, পোস্ট কার্ড। কোথায়?

মামা বিরক্তভাবে উত্তর করলে, দিচ্ছি তো মশাই।

বাঁ হাত দিয়ে মাতুরের ভেতর থেকে মামা বের করলে একখান পোস্টকার্ড। তেলে মলিন হয়ে গেছে।

হাঁই তুলে বললে, চৌকির নিচে পড়েছিল। তুলে রেখেছি।

বটুকবাবু গম্ভীরভাবে হুকুম দিলেন, কেঁচু, তুমি আজকে থাক, কাল সকালে মাইনে মিটিয়ে চলে যাবে।

কেঁচু বললে, আমি কি করব? আমি কি জানি, মামা তুলে রেখেছে? আচ্ছা লোক বটে!

বলে মামার দিকে কোপকটাক্ষ নিক্ষেপ করলে। কিন্তু মামার তখনও চোখ রক্তবর্ণ। ঘুমের ঘোর কাটেনি। সে ভাগ্নের কটাক্ষ গ্রাহ্যই করলে না।

ঠাকুর এতক্ষণ পর্যন্ত চুপ করেই ছিল। হঠাৎ লাফিয়ে উঠে কেঁচুর জামার কলার চেপে ধরে চিংকার করে উঠল, সড়া, মারিবি? আয় সড়া, মারিবি আয়!

কেঁচু বেকুব বনে গিয়েছিল, বলবার কিছু ছিল না। তবু একবার সকলের সহানুভূতি আকর্ষণের জন্তে বললে, দেখুন বাবু, দেখুন!

অবধূত ঠাকুরকে সরিয়ে দিলে। কিন্তু বটুক ঘোষের কিছুমাত্র

সঁহানুভূতি জাগ্রত হল না।

বললেন, আর দেখাতে হবে না, আমি অনেক দেখিছি। তোমার
আস্পর্শা যথেষ্ট বেড়েছে।

কাঁদ কাঁদ হয়ে কেঁটা বললে, আমি কি করলাম বাবু?

—তুমি বাঁটি নিয়ে ঠাকুরকে মারতে যাও? আমরা না এলে তো,
কেঁটা হাতের বাঁটি আগেই ফেলে দিয়েছিল। বটুকবাবুর কথায়
বাধা দিয়ে বললে, মাইরি মারতে যাইনি। শুধোন সবাইকে বাঁটি
আমার হাতে ছেল।

—ছেল! স্পষ্ট দেখলাম,

—শুধোন ঠাকুর মশাইকে, আমি ওইখানে বসে তরকারী
কুটছিলাম কি না?

কেঁটার বাহাদুরী আছে! একেবারে ঠাকুর মশাইকেই কেঁটা সাক্ষী
মেনে বসল! আর এত তাড়াতাড়ি যে, ঠাকুর ভড়কে গিয়ে কি যে
উত্তর দেবে ভেবেই পেল না।

কেঁষ্ট আবার জোর দিয়ে কাঁদ কাঁদ সুরে বললে, শুধোন না
ঠাকুর মশাইকে! ছোট ছেলে পেয়ে আমার উপর দোষ দিতে সবাই
পারে! হ্যাঁ।

কেঁটা হাত দিয়ে চোখ মুছলে।

কেঁটার চোখের জলে ঠাকুর বিগলিত হল। অনেক ভেবে-চিন্তে
বললে, তা সম্ভব হতে পারে।

বটুকবাবু অপ্রস্তুত। তবু ধমক দিয়ে বললেন, যাঃ! যাঃ! আমি
নিজের চোখে দেখলাম!

কেঁটা তবু বলে, শুধোন না ঠাকুর মশাইকে!

—আমি অত শুধোনার ধার ধারি না। তোমার চাকরী খতম
হল। কালু মাইনে মিটিয়ে নিয়ে চলে যাবে।

বটুকবাবু আর দাঁড়ালেন না। হন্ হন্ করে উপরের বারান্দায়
চলে গেলেন।

কিন্তু অবধূত ধীর, স্থির ছেলে। সে অত সহজে রাগ দিড়ে পারলে না। আর একবার নতুন করে সমস্ত ঘটনা খুঁটিয়ে খুঁটিয়ে জেনে নিলে। তখন কেঁটা অনর্গল মিথ্যে কথা বলে আর কেঁদে এমন ভাবে ঘটনার মোড় ফিরিয়ে দিয়েছে যে, কার দোষ বোঝার উপায় নেই। তাঁর কান্নায় ঠাকুরও হতচকিত হয়ে গেছে। সে কখনও রুখে উঠছে, কখনও কেঁটার কথাই সমর্থন করছে। অবধূত এক কথা একশোবার জিজ্ঞাস করে, ছ'পক্ষের সকল কথা বার বার শুনে এক মিনিট শুন্ হয়ে রইল।

অবশেষে কেঁটাকে বললে, যাক্গে। বাঁটিটা এঙ্কুনি ওপরে গিয়ে রেখে দিয়ে আয়।

কেঁটা বললে, কি রেখে দিয়ে আয়। তরকারী কুটব কিসে?

অবধূত বললে, যখন কুটবি তখন নামিয়ে আনবি। আবার কোটা শেষ হলেই ওপরে দিয়ে আসবি।

দাম্ বিস্মিতভাবে বললে, আপনার যত অনাম্‌ষ্টি। বাঁটিটা কি দোষ করলে?

অবধূত জিভে একটা টাকান্ দিয়ে বললে, তুমি বোঝ না। ও কেঁটাও থাকবে, ঠাকুরও থাকবে, ঝগড়াও থাকবে। বাঁটিটা সরানোই ভালো।

অবধূত ফিক্ ফিক্ করে আপন মনেই হাসতে হাসতে উপরে চলে এল।

এমস থেকে কেউ যায় না। বহুদিন থেকে অবধূত দেখে আসছে, এ মেসে যে একবার আসে সে আর যায় না। এইখানেই থেকে যায়। কি বাবু, কি ঠাকুর-চাকর।

এখানে ছুঁথের এবং অসুবিধার অস্ত নেই। একখানা মাত্র ঘর, তারও জানালা নেই, শুধু একটি দরজা। আলো বাতাসের প্রবেশপথ শূন্য। নিতাস্ত্ অনাস্ব্যকর। খাওয়া-দাওয়া তো ওই। ঠাকুর কি যে

রাখে, বোঝবার উপায় নেই কোনটা কপির তরকারী আর কোনটা পোঁপের।

অথচ সবাই আছে। বাবুয়া কেউ যাবার নামও করে না। ঠাকুর আছে তার অবশ্য উপায় নেই। ও রান্না আর তো কোনোখানে চলবে না। কিন্তু বাজারে কেঁটার মতো চাকরের চাহিদা আছে। অনেকে ছুটাকামাইনে বেশি দেবার লোভও দেখায়। সেও যায় না। তাড়িয়ে দেবার কথায় কেঁদে ভাসিয়ে দেয়।

অবধূত জানে। সুতরাং সতর্কতার জগ্লে বঁটিটা সরিয়ে রাখার রায় দিলে !

॥ তিন ॥

কলে জল এল। সাড়ে তিনটে বাজে।

অবধূত, দাসু, গোবর্ধন আগেই বেরিয়ে গেছে। বটুক ঘোষও তাঁর খয়ের রঙের পাঞ্জাবীটা গায়ে চড়াচ্ছেন দেখছি। বোধ হয় আর একবার দিগ্বিজয়ে বের হবেন। কেষ্ঠা আর ঠাকুর এই একটু আগে কাটাকাটি করছিল। দেখি দিব্যি ছাদের উপর এক বিছানায় ছ'জনে পরম শাস্তিতে ঘুমোচ্ছে।

শীতকালের তিনটে।

রোদ পড়ে এলেও ছাদে যথেষ্টই রয়েছে। সেই রোদদূরে ছ'জনে দুখানা কম্বল আপাদমস্তক মুড়ি দিয়ে সুখসুপ্ত। একটু চা-পানের প্রয়োজন অনুভব করছিলাম। কিন্তু ওদের কাউকে জাগাতে আর ইচ্ছা করল না। অবধূত পোষাকী মাদুরটা তুলে নিয়ে গিয়েছিল, আটপৌরেটা পড়েই ছিল। লেপের মমতা কাটিয়ে আলোয়ানখানা গায়ে দিয়ে সেইখানে গিয়ে বসলাম।

বন্ধু, তোমাকে সত্যি কথা বলি, এই কলকাতা শহরের সঙ্গে এতদিনেও আমার মনের মিতালি হয়নি। কলকাতাকে আমি চিনেছি মন দিয়ে নয়, বুদ্ধি দিয়ে। এর বড় বড় বাড়ী, বড় বড় কলকারখানা, ভালো রাস্তা, অসংখ্য ট্রাম-মোটর-জুড়ি আমার পৌরুষকে জাগ্রত করে, বুদ্ধিকে অঙ্কুশ মারে। মনকে স্নিগ্ধ করবার জন্তে এখানে না আছে নির্মল নীল আকাশ, না আছে ঘনবিশুদ্ধ সবুজ গাছের শ্রেণী। পাখী এখানেও মাঝে মাঝে ডাকে বটে, কিন্তু সে খাঁচার পাখী। আর ফুল পাওয়া যায় মিউনিসিপাল মার্কেটে।

এ কথা মনে পড়ে কেঁটাকে দেখে ।

কেঁটা আমার চোখে পল্লী-ভুবনের স্বপ্ন বয়ে আনে । ভাবি, বাংলার কোন দূর নিভৃত পল্লীতে ওর নীড় । মহানগরী ওকেও টেনে এনেছে । কতই বা বয়স ! এই বয়সেই ভাঙতে হয়েছে মমুরাক্ষীর বালুতটের বালির খেলাঘর, ছেড়ে আসতে হয়েছে বটের ছায়ায় কড়ি খেলা, আতুল গায়ে মাঠে মাঠে গোচারণ, বনে বনে বনফুল তোলা, আরও কত কি ।

শহরের কারখানায় ওকে ঢালিয়ে পিটিয়ে নতুন করে তৈরী করা হচ্ছে । এখন ও পাথরে রস পেয়েছে । মমুরাক্ষীর তীর আর বোধ হয় ওর ভাল লাগবে না । ভালো লাগবে না বুড়ো বটের শ্রামচ্ছায়া, বিস্তৃত উদার মাঠ ।

সেজন্তে কেঁটাকে দেখে আমার তেমন দুঃখ হয় না । মহানগরীর আবহাওয়ায় এসে ও শুধু বদলে যায় নি, নিজেকে বেশ মানিয়েও নিয়েছে ।

কষ্ট হয় জয়কালীকে দেখে । ওর নিজের দেশের আবেষ্টনীতে ওকে কখনও দোখনি । কিন্তু কল্পনা করতে পারি । উর্বর মাটির চারাগাছ, এখানে এসে ঝলসে গেছে । সতেজ শিকড় দিয়ে যে রস ও টানতে চায়, এখানকার পিচঢালা মাটিতে তা তুল'ভ । ওরই মুন্সিল হয়েছে । পাড়াগাঁয়ে মানুষকে হতে হয় সহজ, এখানে বিচক্ষণ হওয়া দরকার । সেই বিচক্ষণতা এই এক বছরের মধ্যে ও সংগ্রহ করতে পারেনি ।

ওই তো জয়কালী ! নাম করতেই হাজির । ছোকরা বাঁচবে অনেকদিন । হয়তো অনেকক্ষণ থেকেই গলির মোড়ে দাঁড়িয়ে আছে, আর ইসারা করে আমার দৃষ্টি আকর্ষণের চেষ্টা করছে ।

—কি হে ! ওখানে দাঁড়িয়ে কি করছ ?

জয়কালী কথা বলে না । কেবল হাসে, আর আতুল দিয়ে

সাইরার কি জিজ্ঞাস করে।

অবশেষে জানালাম কাছে সরে গিয়ে বললাম, কি বলছ বুঝতে পারছি না।

জয়কালীও আরও একটু সরে এল। ফিস্ ফিস্ করে জিজ্ঞেস করলে, দাদা আছেন?

দাদা মানে বটুক ঘোষ।

বললাম, না। তিনি তো এই মাত্র বেরিয়ে গেলেন।

খবরটা পেয়েই জয়কালী পুলকিত হয়ে উঠল। তিন লাখে সিঁড়ি টপকে ভেতরে এসে উপস্থিত হল। ওর এক হাতে একটা কমলা-লেবু। খানিকটা খেয়েছে, আর বাকীটা খাওয়ার আয়োজন করছে।

হাঁপাতে হাঁপাতে মাছুরে বসে বাকী কমলা লেবুটা আমার দিকে এগিয়ে দিয়ে জিজ্ঞেস করলে, খাবেন?

মাথা নেড়ে জানালাম, ইচ্ছে নেই। জিজ্ঞেস করলাম, এত সকালে যে!

জয়কালী হাসতে লাগল। আমার কথার জবাব না দিয়ে জিজ্ঞেস করলে, দাদা কখন গেলেন, কখন?

বললাম, আধ ঘণ্টা হবে।

জয়কালী আবার একবার ফিক্ ফিক্ করে আপনমনেই হাসলে, চক্ চক্ করে লেবুটা চুষলে।

তারপর বললে, আজ দাদা আমাকে ঠিক তাড়িয়ে দেবেন।

—কেন?

—এক কাণ্ড করে এসেছি।

জয়কালী সকালে এক কাণ্ড করে এসেছিল। আবার এরই মধ্যে নতুন কি কাণ্ড করলে ভেবে আমার ভয় হল।

সন্দেহকারে জিজ্ঞেস করলাম, মারধোর করে আসনি তো?

—না, মারধোর কেন করব? মারধোর নয়।

মোলায়েম কঠে জয়কালী আখাস দিলে ।

—তবে ?

জয়কালী আবার একবার কিঙ্ করে হাসলে । বললে, দিয়ে
এলাম সব উলটে ।

—সব উলটে দিয়ে এসেছ ? কী উলটে দিয়ে এসেছ ?
কোথায় ?

চক্ চক্ করে লেবু চুষতে চুষতে নিরুদ্ভিগ্গচিত্তে জয়কালী বললে,
প্রেসে ।

জয়কালী এই দিকেই কি একটা প্রেসে কম্পোজিটারী করে ।
কাণ্ডটা সেই প্রেসেই ঘটেছে । মারধোর করে নি, কেবল সব উলটে
দিয়ে এসেছে ।

সভয়ে বললাম, কি উলটে দিয়ে এলে জয়কালী ? বিশেষ গুরুতর
কিছু বাধা দিয়ে বললে, বিশেষ কিছু নয় মশাই ! কতকগুলো কেস,
তাই দিয়ে এসেছি প্রিন্টারের ঘাড়ের ওপর উলটে ।

জয়কালী পরম তচ্ছিল্যের সঙ্গে এক কোয়া চোষা-লেবু বাইরের
দিকে ছুঁড়ে ফেলে দিলে ।

এ আর এমন কি ব্যাপার !

যার মাথায় কেসগুলো উলটে দিয়ে এসেছে তার মাথার অবস্থা
না হয় নাই জিজ্ঞেস করলাম । হয় তো খানিকটা কেটে, কি হয়তো
কেটেই গেছে । হাসপাতালে নিয়ে গিয়ে শেলাই করিয়ে আনলেই
রক্ত বন্ধ হয়ে যাবে । ওতে মানুষ কিছু মরে না ।

আর টাইপগুলো বড় জোড় একাকার হয়ে গেছে । সেও এমন
কিছু নয় । সেগুলোকে আবার ঘরে ঘরে সাজাতে একটা দিনই
যথেষ্ট । একটা দিন প্রেসের কাজ বন্ধ থাকলে কিছু আর প্রেস উঠে
যায় না ।

সুতরাং এ পর্বস্ত চিন্তার কিছু নয় । আমার ভয় হল, এই শেষ ?

না আরও কিছু আছে ?

জিঙ্গেস করলাম তারপর ?

—তারপরে আর কি মশাই, সটান বেরিয়ে এসে দিলাম এক ছুট, একেবারে মেসের গোড়ায় এসে থামলাম

গলার শিরা ফুটিয়ে জয়কালী সগর্বে বললে, আমার সঙ্গে ছুটে ওরা পারে ? সোনাটিকুরীর বিলের নাম শুনেছেন ? সোনাটিকুরীর বিল ? একবার আখ ভাঙতে গিয়ে তাড়া করছিল। একছুটে সেই বিল পেরিয়ে বাড়ী এসেছিলাম। কি বলব, শরীর ভালো নয়, নইলে প্রেসের ও-ক'জনকে চিবিয়ে খেতে পারি।

বললাম, যাকগে। সে ভালোই করেছে। মানুষ চিবিয়ে সব হবে ! কিন্তু হয়েছিল কি ?

—হয় নাই কিছুই। তিন মাসের মাইনে বাকী। রোজই আজ দোব, কাল দোব করে। চাইতে যদি গ্যালাম, বললে তোমার পোষায় তো থাক, না পোষায় তো চলে যাও। মশাই, ওর লাল-চোখের আমি ধার ধারি ! বললাম, বেশ। কাল থেকে আর আসব না। মাইনে মিটিয়ে দিন। বললে কি জানেন ?

ঘাড় নেড়ে জানালাম, জানি না।

—বললে, সন্তোহে আট আনা করে দোব, ইচ্ছে হয় নিও, নইলে নিও না।

জয়কালী কটমট করে আমার দিকে চাইলে। যেন আমিই তার মাইনে আটকেছি আমারই দোষ।

গর্জন করে বললে, দিলাম সব শুদ্ধা উলটে। মরগা কেঁদে মাঠে মাঠে।

বলে আবার নিশ্চিন্তে লেবু খাওয়ায় মন দিল। আমি নিঃশব্দে বসে রইলাম।

ভাবতে লাগলাম, প্রেসের লোকেরা জয়কালীর মেস চেনে

কিনা, ওরা পুলিশ-টুলিস নিয়ে আসবে কি না। ভাবতে গিয়ে ভয়ে
এক ছশ্চিন্তায় সমস্ত দেহ কাঠের মতো শক্ত হয়ে উঠল। জয়কালী
তো যাবেই, আমাদেরও থানা-পুলিশের হয়রানি কম পোয়াতে হবে
বলে মনে হয় না।

একটি একটি করে সমস্ত লেবুটা খাওয়া শেষ করে জয়কালী হঠাৎ
ডান হাতটা আমার দিকে বাড়িয়ে দিয়ে ক্লান্তকণ্ঠে বলল, দেখুন তো
হাতটা।

বললাম, আমি তো হাত দেখতে জানি না।

জয়কালীও ছাড়বে না। মাথায় একটা ঝাঁকি দিয়ে বললে, দেখুন
না মশাই।

দেখতে হল। অনেকক্ষণ ধরে নাড়ী টিপে জিজ্ঞেস করলাম,
তোমার কি হয় বল দেখি ?

—রোজ একটু করে জ্বর হয়।

—সে কি ! আজ সকালে যে বললে জ্বর হয় না !

—না, হয়। আজ হয়েছিল।

বললাম, হুঁ। আর কি হয় ?

—আর চোখ জ্বালা করে।

গম্ভীরভাবে জিজ্ঞেস করলাম, কোন চোখ ?

জয়কালী প্রথমে ডান চোখে হাত দিয়ে বললে, ডান চোখ।
তারপরে বাঁ চোখে হাত দিয়ে বললে, বাঁ চোখ। অবশেষে দুই চোখই
হাত দিয়ে পরীক্ষা করে বললে, না, না, দুই চোখই।

জিজ্ঞেস করলাম, আর ?

—আর গায়ে-হাতে-পায়ে বেদনা তো আছেই। আপনাকে
বলিনি ?

বললাম, বলেছ ! আর কিছু ?

—আর কিছু না।

তারপর সকাতরে বললে, এখানে আর কিছু দিন থাকলে আমি

দেখ বাব মশাই। দেখছেন না, এই ক'দিনে কি চেহারা হয়েছে ?
বা খাই তার কিছুই হজম হয় না। দিন রাত্তির কেবল পেট-কুটকাট
করে।

আমি কোনো উত্তর করলাম না।

জয়কালী বললে, বড়দিনে ওই ক'দিন ছুটি ছিল, প্রেসে যেতে হয়
নাই, দেখেছিলেন কি রকম চেহারা হয়েছিল ?

বড়দিনের চেহারার স্বরূপ ঠিক স্মরণ করতে পারলাম না। তবু
বললাম, ভালো চেহারা হয়েছিল !

উৎসাহিত হয়ে জয়কালী বললে, ও আর কি ভালো মশাই !
দেশে থাকতে ইয়া বৃকের পাটা ছিল। আর তেমনি রং ! গোলাপ
ফুলের মতন। এখানে কিই বা খেতে পাই মশাই ? সমস্ত দিন
খেটে একটা কমলা লেবু ! অমন বিশ গণ্ডা কমলা লেবু হলে তবে
আমার পেটের একটা কোণ ভরে। হাসছেন ?

বললাম, না। হাসিনি।

—সেখানে কি খেতাম জানেন ? সকালে উঠেই সের দুই মুড়ি,
আধ সের গুড় আর আধ সের দই। সাঁটিয়ে মেরে সকাল বেলা
বেকুতাম। সমস্ত গাঁ চষে বারোটায়ে বাড়ী ফিরতাম। ফিরেই এক
খাবোল তেল গায়ে মেখে জলে গিয়ে পড়তাম, সাঁতার দিয়ে দিয়ে
যখন হাতের তেলো শাদা হয়ে যেত, চোখ লাল হত তখন উঠে
আসতাম। আমাদের গাঁয়ের বাণেশ্বর দীঘির নাম শুনেছেন ? সেই
দীঘি বিশ্ববার না পার হলে...হাসছেন ?

আবার বললাম, না হাসি নি। তুমি বল।

—এসে কি খেতাম জানেন ? থাক্গে। সে সব কি আর এখানে
মেলে মশাই ? দীঘিতে পদ্মফুলেরই বাহার কি।

জয়কালী সশব্দে একটা বড় রকম দীর্ঘশ্বাস ফেললে।

জয়কালীর হৃৎক এর। কেউ বোঝে না। জয়কালী নিজেই কি বোঝে ?

বললে, শরীরটা যদি ভালো থাকত মশাই, আমি কিছুই গ্রাহ্য করি না। যদিকে হুই চোখ যেত চলে যেতাম। বেটা ছেলে, মাটি কুপিয়েও হুঁবেলা হুঁমুঠো ভাতের সংস্থান করতে পারতাম। কিন্তু ভগবান যে মেরে রেখেছেন!

আমি উত্তর দিলাম না।

আবার বললে, তাও যদি নিয়মিত মাইনেটা পেতাম, এত হুঁখ কি থাকত! ও-বেটাদের চাকরী ছেড়ে দিয়ে ভালোই করেছি, কি বলেন?

কিছুই বললাম না।

—দাদা এসে কি বলবে বলুন তো?

দাদাকে নিয়েই জয়কালীর যত দুর্ভাবনা। পুলিশও নয়, অস্ত্র কিছুই নয়। এবং দাদা এসে যে কি বলবে সে আমি জানি। ইতিপূর্বে আরও একবার এ-রকম কাণ্ড হয়ে গেছে। দাদা বলবেন, চাকরী ছেড়ে দিয়ে খাবে কি শুনি? বলবেন, গরীবের ছেলের আবার তেজ কি?

নিজের মনেই জয়কালী সে কথা ভেবে নিয়ে বললে, বলুক গে দাদা যা খুসী। পরশু দিন ছেলে পড়ানোর মাইনে পাব। তাই নিয়ে পরদিন সকালে উধাও হব, আর কিরব না।

আমি নিরুত্তর রইলাম।

নিজের মনে আবার কি-খানিক ভেবে জয়কালী কিষ্ কিষ্ করে হাসলে।

বললে, এখন আর দাদাকে চাকরী ছাড়ার কথা জানিরে কাজ নেই। কি বলেন?

বললাম, সেই ভালো।

—ইতিমধ্যে আর একটা দেখে নিতে পারব না?

—নিশ্চয় পারবে!

উৎকল হয়ে জয়কালী হাঁকলে, কেঠা ! 'এই কেঠা !

—কেঠা তো নেই বাবু।—ঠাকুর সাড়া দিলে।

দেখি বেলা পড়ে এসেছে। শীতের বিকাল দেখতে দেখতে সন্ধ্যা হয়ে আসে। ঠাকুর উঠে একখানা ছেঁড়া কাপড় সেলাই করছে। পাশে তার পানের বটুয়াটা পড়ে আছে। কিন্তু কেঠা সেখানে নেই।

—কেঠা গেল কোথায় ?

—এই যে বাবু।—নিচে কলতলা থেকে কেঠা সাড়া দিলে।

—ওখানে কি করছিস ?

জানালা দিয়ে নিচে চেয়ে দেখি, কেঠার জামা, কাপড় কর্দমাক্ত। আর পা দিয়ে ঝর ঝর করে রক্ত পড়ছে। হাঁটুর কাপড় সেই রক্তে রাঙা হয়ে গিয়েছে। কেঠা কলতলায় সেই রক্ত ধুয়ে ক্ষতস্থান পরিষ্কার করছে।

আমার কথার উত্তরে কেঠা নির্লিপ্ত গম্ভীরকণ্ঠে বললে, কিছু করি নাই।

—কিছু করিসনি ! তোর পা কাটল কি করে রে ? কোথায় গিয়েছিলি ?

কেঠা ওপর দিকে না চেয়েই তেমনি শাস্তকণ্ঠে উত্তর করলে, কোথু যাই নাই।

—যাস নি ? ওপরে উঠে আয় তো দেখি।

কেঠা ল্যাটাতে ল্যাটাতে ওপরে উঠে এল। দেখা গেল, হাঁটুর কাছে খামিকটা চামড়া উড়ে গেছে। ডান পায়ের বুড়ো আঙুলটাও জখম হয়েছে, ঝর ঝর করে রক্ত পড়ছে। আর দুই হাতের তালু রক্তে লাল হয়ে উঠেছে।

জয়কালীকে বললাম, আমার বাস্ন থেকে আইডিনের শিশিটা বের কর তো। আর একখানা ফর্সা কাপড়। এ যে বেশ জখম হয়েছে !

জয়কালী সেগুলো আনতে গেল।

কেষ্টা মাথার পিছনটায় হাত দিয়ে বললে, এখানটাও ফুলে উঠেছে।

বললাম, ঠিক হয়েছে! তুমি যেমন বাঁদর, তার তেমনি শাস্তি হয়েছে! কার সঙ্গে মারামারি করতে গিয়েছিলি?

কেষ্টা দাঁত বের করে বললে, মারামারি লয়।

—তবে?

—টেরামে।

—বিনা পয়সায় ট্রামে উঠতে গিয়েছিলি?

এক গাল হেসে কেষ্টা বললে, হুঁ। যেমন টিকিট চাইতে এয়েছে আমি অমনি দেলাম এক লাফ। ব্যাকায়দায় এমন পড়লাম! আবার সেই সময়,—জানেন?—একটা সাইকেল পেছন থেকে ছড়মুড় করে এসে পড়ল আমার এমন জায়গায়।

বলে কোমরটা দেখালে।

জয়কালী আইডিন নিয়ে ফিরে আসতে আসতে সাইকেলের কথাটা শুনতে পেলে

গর্জন করে বললে, দিলি না কেন বেটার গালে দুই চড়।
তুই যে নিতান্ত ভাত-ঢোসা!

গালে চড় মারাটা জয়কালীর কাছে অতি তৃতীয় শ্রেণীর মার। ওটা কিছুই নয়। যে-কেউ যে-কাউকে যখন খুলি নির্বিবাদে মারতে পারে।

কিন্তু কেষ্টাও কারও কাছে ছোট হবার পাত্র নয়। মুখ বেঁকিয়ে বললে, আমার মানে অনেক বড় যে।

অর্থাৎ নইলে সেও দুই চড় দিতে কন্সুর করত না।

জয়কালী বললে, বড় হল তো কি হয়েছে? ছ'ঘা দিতিস, ছ'ঘা খেতিস।

মারামারির ক্ষেত্রে শিশুকাল থেকেই জয়কালী অত্যন্ত উৎসাহিত। ছ'ঘা দিতেও উৎসাহ আছে, ছ'ঘা খেলেও আপত্তি নেই। তার এখন শরীর ভালো নয়, বিকেলে একটু অর হয়, চোখ জ্বালা করে, তথাপি

কিন্তু ছ'ঘা খাওয়া সম্বন্ধে কেঁটা ঘোরতর আপত্তি ছিল। একটা চুমকুড়ি কেটে বললে, উঁ। ভারী সুখ !

আমি ওদের কথা শুনছিলাম আর ব্যাণ্ডেজ বাঁধছিলাম। কিন্তু বাঁধব কার ? হতভাগা এক জায়গায় পাঁচ মিনিট স্থিতির হয়ে বসতে পারে না। ব্যাণ্ডেজ বাঁধা না হতেই দশ বার বললে, ওই হয়েছে। ওভেই হবে। আর থাক। বাঁধা শেষ হওয়া মাত্র খোঁড়াতে খোঁড়াতে সরে পড়ল।

খানিক পরে নিচে নামতে গিয়ে দেখি শিল-নোড়া সামনে পড়ে রয়েছে। মসলা বাঁটতে আর বাঁটা হয় নি। কেঁটা বাঁ হাতটা কানে দিয়ে, আর ডান হাত আকাশে তুলে কালোয়াংজনোচিত নানাপ্রকার বিকট মুখভঙ্গি করে অত্যন্ত অস্পষ্ট সুরে বড় রকমের কিছু একটা রাগিনী আপনমনেই বিনয়ে বিনয়ে ভাঁজছে। আমি অনেকক্ষণ দাঁড়িয়ে রইলাম। কিন্তু ও তখন এমনই আত্মহারা যে আমার উপস্থিতি টেরই পেল না।

সন্ধ্যো হতে দেরী আছে।

পাশের বাড়ী আবার সরগরম হয়ে উঠল। সকালের সেই বায়োস্কোপের প্রসঙ্গ। ভেবেছিলাম ও প্রসঙ্গের ওইখানেই যবনিকা পড়েছে। এখন বোঝা গেল, যবনিকা তো পড়েইনি, বরং উলটো।

সেই বেকার ছোকরাটি টিকিট পর্যন্ত কিনে এনেছে। টাকাটা শেষ পর্যন্ত কে দিয়েছে ভগবান জানেন।

আমি শুনলাম, ছোকরাটি এসেই চীৎকার আরম্ভ করেছে, ও ছুঁ, তোরা এখনও তৈরী হয়ে নিস নি ? তাহলে যাবিনে বল।

—বাবাঃ! বাবাঃ! তুমি একেবারে পায়ে ঘোড়া বেঁধে হাজির হও। এই তো তৈরী হচ্ছি। ও বৌদি! সেরে নাও বাপু।

বৌদিদির যত্নগুণন শোনা গেল, ছোটঠাকুরপোর সব বিষয়ে তাড়াতাড়ি। সেইজন্মে কোথাও ওর সঙ্গে যেতে চাইনে।

ছোকরা আবার চীৎকার করে উঠল। বললে, গাড়ী ডেকে এনেছি যে! সে কি তোমাদের জন্মে দশঘণ্টা বাইরে বসে থাকবে সমস্ত দিন?

—থাকলই বা!

—ভাড়া নেবে না? কে দেবে কে? তুই দিবি?

—আমি কেন দোব? আমার কি দায় পড়েছে? তুমি যখন তখন আমার পেছনে কেন লাগ বল তো? আমার বড় টাকা দেখেছ, না?

ছোকরা এবারে আকাশ ফাটিয়ে চীৎকার করে উঠল, আরে, গাড়ী দাঁড়িয়ে রয়েছে যে! গাড়ী, গাড়ী! তোমাদের জন্মে কি আমি মাথা খুঁড়ে মরব, না কি? ভালো মুস্কলে পড়েছি!

ছুট সমানে পালটা চীৎকার করে বললে, আমরা তৈরী হচ্ছি তো! বৌদিদিরা লোষ্ট্রাহত মৌমাছির মতো গুণন করে উঠল।

—আরে, গাড়ী যে দাঁড়িয়ে রয়েছে!

—জানি, জানি।

—জানিস তো তৈরী হয়ে নে! দেরী করছিস কেন?

—দেরী আবার কখন করলাম! তৈরী হচ্ছি তো! ও বৌদি, তৈরী হয়ে নাও না! আমার ব্লাউজটা এইখানে রাখলাম, গেল কোথায়, ও বৌদি?

—ওইখানেই আছে তো।

—কই এখানে? বাবাঃ! ছোড়দা আমার মাথা খারাপ করে দেবে। ই ব্লাউজটা?

—ছোড়া মাথা খারাপ করলে। আরে গাড়ী দাঁড়িয়ে রয়েছে যে! এ কি তোর স্বপ্নের বাড়ীর ঘরের গাড়ী? আলাদা ভাড়া নেবে যে! দিবি তুই?

—ও যাবে না

নীচের থেকে খন্থনে বুড়ী হাঁফাতে হাঁফাতে এসে বললে, ও যাবে না। তোরা যা, ও যাবেও না, ভাড়াও দেবে না!

—তো, তাই বলুক!

—হাঁ তাই বলছে। ও যাবে না, তোরা যা। অবাক করলে মা! যত রোখ ওর ওপরে? যা, তোরা যা, ও যাবে না। তোরা যা। তোমার পায়ে সাত পেল্লাম বাবা, তোমার মতো ভাই যেন কারও না হয়!

—আরে গাড়ী দাঁড়িয়ে রয়েছে যে! সে ভাড়া নেবে না?

বুড়ী তখনও ওপরে ওঠার পরিশ্রমে হাঁফাচ্ছে। ছোকরার কথা সে কানেই তুলল না। আপন মনেই চেষ্টাতে লাগল : এমন ভাই যেন কন্ঠিনকালে কারও না হয়। তুমি সহজ মানুষের হাড়ে পোকা পাড়তে পার বাবা। বোনের ওপর এমন যোশ্ ত্রিভুবনে কারও দোখনি।

—আরে গাড়ী দাঁড়িয়ে রয়েছে যে!

—বিদেয় করে দে! বিদেয় করে দে!

আরও তিন বুড়ী কলহের গন্ধ পেয়ে নীচে থেকে ছুটতে ছুটতে এল। কলরব করে বললে, বিদেয় করে দে! এত লোকের নেন্জারেও কি তুই থাকতে পারিস?

বেধে গেল।

কোলাহলে দিগ্গুণ্ডল মুখর হয়ে উঠল। কোলাহলেরও বৈচিত্র্য আছে। লহরে-লহরে উঠতে উঠতে হঠাৎ এমনভাবে থেমে যায় যে, মানুষ চমকে ওঠে। সে চমক কাটতে না কাটতে আবার

চীৎকার ওঠে। ছেলের্তে-মেয়েতে, বুড়োভে-বুড়ীতে, সে এক হট্টগোল। কেউ কারও কথা শোনে না, নিজেকে নিজেকেই চেষ্টা করে যায়। মাঝে মাঝে হঠাৎ থামে। আশা হয় এইবার গোলমাল থামল। কিন্তু তখনই আবার দ্বিগুণবেগে জ্বলে ওঠে।

ভাবলাম, আজকের সিনেমায় যাওয়া তো চুলোয় গেলই, শেষে ফাটাফাটি না হয়। ঘটনাটা সেই রকমেরই।

জয়কালী বিরক্ত হয়ে বললে, মার, মার! ওদের না পারিস আমাদের এসে মেরে যা। আমরা আর পারছি না।

না পারারই মতন। কান ঝালাপালা হয়ে গেল। লোকে ভাববে, এ কলহ আর থামবে না, অনন্তকাল চলবে এবং মেস না বদলালে এরা সমস্তলোক কালা হয়ে যাবে। কিন্তু এরা এতে অভ্যস্ত হয়ে গেছে। এমন কি, কোনোদিন দৈবাৎ যদি গোলমাল না শোনে, নিজেকে মধ্যস্থ হয়ে বলাবলি করে, কি হল! কারও অসুখ-বিসুখ হল নাকি! বেরি-বেরির যে রকম উৎপাত। দেখবেন মশাই!

মন খারাপ হয়ে যায়। যেন একটা অত্যন্ত অভ্যস্ত বস্তু, যা সব সময় হাতের কাছে থাকে, সেটা নেই। তাকে খুঁজে পাওয়া যাচ্ছে না। কি রকম অস্বস্তি বোধ হয়।

তোমার মনে আছে কি না জানি না, আমার দোতলার শোবার ঘরের জানালার সামনেই একটা কৃষ্ণচূড়া গাছ ছিল। সেটা আমাকে আকাশ দেখতে দিত না। সে জন্মে অত্যন্ত রাগ ছিল গাছটার উপর। কিন্তু উপায় ছিল না সেটাকে সরিয়ে দেবার। কারণ সেটা ছিল আমাদের সীমানার মধ্যে নয়, পাশের বাড়ির সীমানার মধ্যে। সুতরাং গাছটার দিকে চাইলেই রাগে মনের মধ্যে গজ গজ করতাম। নিরুপায় আক্রোশে ফুলে উঠতাম।

তারপর অনেক বছর পরে সেবারের সেই বড় ঝড়ে গাছটা একরাতে উপড়ে পড়ে গেল। ভোর বেলায় জানালার দিকে চাইতেই

একবারে প্রভাত আকাশের মুখোমুখি !

প্রথমে, কিছু বোঝবার আগেই, মনটা আনন্দে ভরে উঠল। তারপরেই কি রকম গোলমাল লাগল : আকাশ দেখা যায় ! কি হল ব্যাপারটা !

পরে খেয়াল হল, কৃষ্ণচূড়া গাছটা নেই। অনুমান করলাম, ঝড়েই পড়ে গেছে নিশ্চয়।

তুমি শুনলে অবাক হবে, গাছটার অনস্তিত্বে অভ্যস্ত হতে বেশ কিছু দিন সময় লেগেছিল। যেটার উপর অত রাগ, জানালার বাইরে চেয়ে সেইটেকে না দেখতে পেয়েই মনটা খারাপ হয়ে যেত। যে গাছটা দাঁড়িয়ে থাকতে আমার চোখে বিঁধত, পড়ে গিয়ে সেটা বিঁধত মনের মধ্যে, খচ্ খচ্ করে।

বস্তুতঃ পক্ষে কলহ-কোলাহলের মারফৎ ওই অদৃশ্য প্রতিবেশীর সঙ্গে এদের জীবনের যোগ ঘটেছে। কেমন করে তা কেউ জানে না। ও বাড়ী নিস্তক্ হলে এদেরও জীবনের এক জায়গায় যেন কঁাক পড়ে যায়। এমন কি, শুনে সবাই আশ্চর্য হয়ে যাবে, ওদের কলহের বহর শুনে এরা অনুমান করতে পারে, কি রকম ওদের আহ্বারের আয়োজন হয়েছে। ও-বাড়ীর প্রায় সকলকেই এরা মাঝে মাঝে দেখেছে। কিন্তু দেখলেও ঠিক চিনতে পারে না কোনটা কে ? সত্যকার পরিচয় ঘটেছে কণ্ঠস্বর সূত্রে।

তুমি বলবে, সে আবার কী পরিচয়। যাদের মাঝে মাঝে চোখে দেখেছ কণ্ঠস্বরসূত্রে এমন দেখা যে, রাস্তায় দেখলে চিনতে পার না, তাদের সঙ্গে আবার পরিচয়টা কি ? কণ্ঠস্বরসূত্রে পরিচয়ের মানে আছে ?

আমি বলব, আছে। এবং সে পরিচয় দৃষ্টি সূত্রে পরিচয়ের মতো অর্থবান। কেন, গান শোননি :

‘‘...তখনও তারে চোখে দেখিনি,

শুধু বাঁশী শুনেছি।

মুচক্

তেমনি আর কি !

তা সে যাই হোক, কলরব তখনই ধামে, পর মুহূর্তে আবার দ্বিগুণ তেজে গর্জে ওঠে। আমরা অতিষ্ঠ হয়ে উঠলাম।

বললাম, চল বেরুনো যাক জয়কালী। এরা আর সিনেমায় যাবে না। স্তূতরাং সমস্তক্ষণ চৈতাবে।

জয়কালী গালে হাত দিয়ে অশ্রুমনস্কভাবে কি যেন ভাবছিল। বললে, এখুনি যাবে, দেখুন তো !

—পাগল ! সবাই কি রকম ‘যাব না, যাব না’ করছে শুনছ না ? আর যাওয়া হল না। টাকা ক’টাই লোকসান।

জয়কালী উত্তর দিলে না।

বললাম, চল, ওদের টিকিট ক’খানা নিয়ে আমরাই বরং দেখে আসি। কি বল ?

জয়কালী হাসলে।

বললে, দেখুন না কি হয় !

জয়কালীর কথা সত্যি। হঠাৎ এক সময়ে গোলমাল থেমে গেল। এক মিনিট...দু’মিনিট...তিন মিনিট...

সভয়ে জিগ্যেস করলাম, কি হল হে ?

জয়কালী উঠতে উঠতে বললে, সিনেমায় গেল, আবার কি হল।

নিচে থেকে হৈ হৈ করতে করতে গোবর্ধন এল : কেণ্টা ! কেণ্টা !

জয়কালী উঠছিল, ফের বসল।

কেণ্টার অদ্ভুত একটা intuition আছে। ডাক শোনা মাত্র বুঝতে পারে কি জগ্গে ডাকছে। বুঝলে, এবার গোবর্ধনের চা আনতে যেতে হবে। তার চা-পানের সময় হয়েছে সঙ্গে সঙ্গে গম্ভীরভাবে মশলা পিষতে বসল !

এবং আবৃত্ত কয়েক ডাকের পর মিহিকণ্ঠে ভালোমা বর মতো বললে, কি বলছেন ?

গোবর্ধন বললে, চা নিয়ে আয়।

—আমি মশলা পিষছি যে!

গোবর্ধন গর্জন ক'রে বললে, আগে চা নিয়ে আয়, তারপর মশলা পিষবি।

কেষ্টা ভারিকির স্বরে বললে, তাই হয় কখনো?

—তবে রে শূয়ার!

বলে গোবর্ধন গট্ গট্ করে নেমে যেতেই কেষ্টা ভালোমানুষের মতো হাত পেতে বললে, পয়সা দিন।

—মারতে না যাওয়া পর্যন্ত তুমি কথা শুনবে না, না?

কেষ্টা সে কথায় অক্ষিপ না করে বললে, দিন পয়সা। ক' কাপ?

গোবর্ধন তার হাতে তিনটি পয়সা দিলে। বললে, তিন পয়সার। একটা বড় গেলাস নিয়ে যা। নইলে কম দেবে।

চা এখানে কাপের মাপে আসে না, পয়সার হিসাবে আসে। চা ও ঠিক নয়। কালো এক রকম তরল পদার্থ,--না দুধ না কিছু। কতকালের চা, সিদ্ধ হয়ে-হয়ে ওই রকম রং হচ্ছে। তবে তিন পয়সায় দেয় অনেকখানি।

কেষ্টা ছোটো এলুমিনিয়ামের গ্লাসে গ্লাসে করে চা নিয়ে এল। আর তিনটে এনামেলের বাটি নিয়ে এল। প্লেট নেই। বাটিগুলো প্লেটের কাজ করবে।

জয়কালী তৃপ্তির সঙ্গে চায়ে চুমুক দিয়ে বললে, এই যে একটু আগে বললেন পয়সা নাই, এখন এল কোথেকে?

—মাইরি ছিল না। এখন পেলাম।

বলে গোবর্ধন পা ছুলিয়ে হাসতে লাগল।

জয়কালী বিশ্বাস করলে না। বললে, হ্যাঁ পেলেন!

—মাইরি পেলাম। ছোটো মোষ পড়েছিল জলে। কুলিদের বললাম, পাকড়ো। ছুটতে ছুটতে গাড়োয়ান এসে চার আনা পয়সা

দিয়ে মোষ ছুটো ছাড়িয়ে নিলে। ছ'আনা কুলিদের দিলাম, আর ছ' আনা...

বলে গোবর্ধন হাতের পাঁচটা পয়সা দেখালে।

—ছুটো মোষে চার আনা?

গোবর্ধন নাক সিটকে বললে, আবার কত?

জয়কালী জিগ্যেস করলে, আপনি পয়সা তো মন্দ পান না। কি করেন?

গোবর্ধন হা হা করে হেসে বললে, খরচ হয়ে যায়। এই চায়েই আমাকে খেলে জয়কালী। চায়ে আর ট্রামে রোজ চারটি গুণ্ডা পয়সা যায়।

জয়কালী বিজ্ঞের মতো বললে, ওই তো আপনার দোষ কি না! একটি পা হাঁটতে চাইবেন না।

গোবর্ধন ঠোট কুঁচকে বললে, হাঁটতে পারি না।

গৌরব করে নয়, একটু লজ্জিত ভাবেই কথাটা বললে। কর্পোরেশনে একটা সামান্য চাকরী সে করে। সামান্য কিছু মাইনে এবং সামান্যতর উপরি, এই দিয়ে সে কোনো রকমে চালায়। কিন্তু হাঁটতে পারে না।

নিজের কথা বড় একটা সে বলে না। কিন্তু একদিন সন্ধ্যার পরে ছাদে বসে থাকতে থাকতে একটা অসতর্ক মুহূর্তে বলে ফেলেছিল। ওর বাবা বিহারের একটা ছোট শহরে কণ্ট্রাক্টরী করতেন। পয়সাও বেশ কিছু করেছিলেন। তাঁর ছিল ঘোড়ার শখ। ব্যবসায়ের জন্তে ঘোড়ার প্রয়োজনও ছিল অবশ্য।

পাঠ্যপুস্তকের চেয়ে ঘোড়ার উপরই গোবর্ধনের আকর্ষণ ছিল বেশি। ছেলে-বয়সেই শহরের মধ্যে শ্রেষ্ঠ ঘোড়সোয়ার হিসাবে সে নাম করেছিল। সেই প্রকাণ্ড প্রকাণ্ড ঘোড়াগুলোই তাকে খোঁড়া করে দিয়ে গেছে। পায়ের দিক দিয়েও, লেখাপড়ার দিক দিয়েও।

হাঁটার অভ্যাস তার এখনও ছিল না। সে সব পারে, শুধু হাঁটতে পারে না।

নরহরি হেলে ছলে আসছিল। গোবর্ধনের কথাটা তার কানে গেল।

আভিজাত্যের দিক দিয়ে সে যে কারও চেয়ে ছোট নয়, এটা প্রমাণ করবার জন্তে নরহরি সব সময়ই তৎপর।

জুতোর ফিতে খুলতে খুলতে বললে, যা বলেছ! আমার যে ড্রামে কত পয়সা যায় তার ঠিক-ঠিকানা নেই।

নরহরির সঙ্গে জয়কালীর একদণ্ড বনে না। ছুঁজনেই সমান তেজী। একজনের ঔদ্ধত্য আর একজন সহ্য করতে পারে না। জয়কালী নরহরির কথায় মুখ হাঁড়ির মতো করে বসে রইল।

গোবর্ধন নরহরিকে তোয়াজ করে বললে, তোমার আর কি, বল? মোটা টাকা মাইনে পাও।

নরহরি সে কথা নীরবে স্বীকার করে নিলে। মাথা নেড়ে বললে, টাকা পয়সা কি সঙ্গে যাবে হে! ডান হাতে রোজগার কর, আর বাঁ হাতে উড়িয়ে দাও, ব্যস।

জয়কালী অসহিষ্ণুভাবে বললে, হুঁ!

নরহরির ক্রোধান্বিতে ঘুতাজ্জ্বলিত পড়ল।

ফিরে দাঁড়িয়ে বললে, তার মানে? আমাকে কি তোমাদের মতো বাবু পেয়েছ না কি, যে পেটে কিল মেরে পড়ে থাকব? রোজ ছ' পয়সা তো পাণেরই খরচ, তা জান?

জয়কালী হাত নেড়ে বললে, ও সব গল্প অন্য, লোকের কাছে কোরো। আমাকে বেশি ঘাঁটিও না।

নরহরিও হটবার পাত্র নয়। চোখ পাকিয়ে বললে, ঘাঁটিও না মানে? এই দেখ, নরহরিবাবু টাকাকে হাতের-ময়লা জ্ঞান করে। বুঝলে? তোমার মতো কেবল রুমালে গিঁট মারে না।

বসে জয়কালীর সুবিধা হয় না। সে কি কথা বলবার জন্তে উঠে দাঁড়াচ্ছিল। গোবর্ধন তার পিঠে হাত বুলিয়ে বসালে।

বললে, সময় এখন তোমারই ভালো চলছে জয়কালী।

জয়কালী এই কথাটা সহিতে পারে না। তার বন্ধমূল ধারণা, তার উপার্জনের উপর লোকের চোখ পড়লে কমে যাবে।

চোখ পাকিয়ে বললে, কি রকম ?

গোবর্ধন হাসতে হাসতে বললে, তা বটে বই কি ! ছেলে পড়িয়ে পাঁচটা টাকাও তো পাও। প্রেসে গোটা পনেরোর কম নয়। এ কি কম হল ?

জয়কালীর আর না বলার উপায় রইল না। মুখ নামিয়ে গজ্-গজ্ করতে লাগল।

নরহরি বললে, তোমাকে ছেলে পড়াতে কে রেখেছে হে ? কই ‘দণ্ড’ মানে বল দেখি ?

—তুমি বল দেখি ?

—‘দণ্ড’ মানে প্রহর। একটা বলে দিলাম। আর কি হয় বল ?

জয়কালী দেওয়ালে ঠেস দিয়ে এলিয়ে পড়ল। ক্লান্তভাবে বললে, অভিধান দেখলেই হয়।

গোবর্ধন অনেকক্ষণ ভেবে বললে, ‘দণ্ড’ মানে প্রহর তো ঠিক নয়, প্রহরের অংশ।

নরহরি তাচ্ছিল্যের সঙ্গে বললে, ওই হল।

জয়কালী এতক্ষণে জোর পেলে। দেওয়ালের ঠেস ছেড়ে সোজা হয়ে উঠে বসে বললে, তবে ? তুমিও জান না।

বুড়ো আঙুল উঁচিয়ে নরহরি বললে, তুমি তো আর ধরতে পারনি ! পণ্ডিত !

জয়কালী বললে, তুমি বললে কেন ?

—বেশ করেছি।

জয়কালী একটু থেমে হঠাৎ বললে, তুমি বল দেখি—

অনাদি কারণ তুমি জ্ঞানের অতীত,

রেখেছ আমার বোধ করে আচ্ছাদিত।

মানে কি ?

উত্তর না দিয়ে নরহরি শুধু বললে, হুঁ।

জয়কালীর আর বসবার উপায় ছিল না। বটুক ঘোষ বেরিয়েছেন বটে, কিন্তু যে কোনো মুহূর্তে ফিরে আসতে পারেন। ফিরে এসে জয়কালীকে এমনি নিশ্চেষ্টভাবে বসে থাকতে দেখলে আর রক্ষা রাখবেন না। তার কাজ কিছুই নেই, তবু জয়কালীকে বেরুতে হবে। এর আগে আর একবার যখন তার চাকরী গিয়েছিল তখনও এই রকম হয়েছিল।

তখন গ্রীষ্মকাল। চনচনে রোদে মাথা পুড়ে যায়। বটুক ঘোষ হুকুম জারি করলেন, দশটার পরে যেন তোমাকে মেসে দেখতে না পাই।

মেসের কয়েকজন বটুক ঘোষের কাছে জয়কালীর পক্ষ থেকে অনুযোগ জানালে, এই রোদে ওঁ'ভাবে কোথায়? রাস্তায় রাস্তায় ঘুরলে কি চাকরী পাওয়া যাবে?

তাদের হাঁকিয়ে দিয়ে বটুক ঘোষ বললেন, সে কি আর আমিও জানি না মশাই? জানি। কিন্তু ওকে তে' চেনেন না, ও বসে থাকতে পেলে আর কিছু চায় না। কত ফন্দি করে কত চাকরী ছেড়েছে জানেন?

চাকরী করতে জয়কালীর ভালো লাগে না কলকাতায় থাকতেই ভালো লাগে না। এ কথা সবাই জানে। কিন্তু সে ক্ষেত্রে বটুক ঘোষ জয়কালীকে জব্দ করতে পারেন নি। সেই সময় 'ছপু'রে তিনি কোথায় একটা কাজ পেয়েছিলেন। জয়কালী ঠিক দশটার সময় খেয়ে-দেয়ে কাপড়-জামা প'রে সমারোহ করে বেরিয়ে যেত। কিছুক্ষণ

কলেজ স্কোয়ারে বসে থেকে যেই বুঝত দাদা এইবার বেরিয়ে গেছেন, সেই ফিরে আসত। বেলা চারটে পর্য্যন্ত দিব্যি নিজা দিয়ে বটুক ঘোষ রেরবার আগেই সরে পড়ত। সন্ধ্যার পর মুখ কালো করে ক্লান্তদেহে ফিরত।

মেসের আর সবাই ঠাট্টা করে বলত, কি হে কলেজ স্কোয়ারের আফিসে চললে না কি ?

জয়কালী চটত, কিন্তু এ নিয়ে হৈ চৈ করতে সাহস করত না। পাছে ব্যাপারটা দাদার কানে যায়। সেই থেকে আজও তার ভয় যায়নি। এখনও দাদা ফেরবার আগেই বেরিয়ে পড়ে।

জয়কালী উঠে সিঁড়ি দিয়ে কেবল নামছে, এমন সময় নরহরি বললে কি হে জয়কালী, চললে না কি ?

জয়কালী থমকে দাঁড়াল।

চোখ পাকিয়ে বললে, পিছু ডাকলে তো ? যেই কোথাও বেরুব অমনি কেউ না কেউ পিছু ডাকবেই।

বেচারি সেইখানেই সিঁড়ির উপরই বসল।

মেসের সবাই প্রায়ই এই নিয়ে আমোদ করে। নরহরিও তুটু মি করেই পিছু ডেকেছিল।

নিরীহভাবে বললে, না, বেরুচ্ছি কি না তাই জিজ্ঞাস করছিলাম।

—হাঁ বেরুচ্ছি। কিছু দরকার আছে তোমার ?

—না, এমনিই জিজ্ঞাস করছিলাম ! যাও, যাও।

জয়কালী কটমট করে তার দিকে একবার চেয়ে বেরিয়ে গেল।

বেচারি জয়কালী শহরে এসে কি মুন্সিলেই না পড়েছে ! সবাই লেগেছে তার পিছনে !

দাদা বটুক ঘোষ তো রোদে রুষ্টিতে ভোর থেকে সন্ধ্যা পর্য্যন্ত তাকে ঘোড়দৌড় করাচ্ছেন ! বহু কৌশলে সে ধাক্কা যদি বা কাটাচ্ছে তো কেউ বা স্বাস্থ্য কেউ বা তার উপার্জনের উপর চোখ দিচ্ছে।

নয়তো বাইরে বেরুবার সময় পিছু ডাকছে !

জয়কালী আর পারে না ? গ্রামের ছেলে এরা প্রায় সবাই ।
কিন্তু তার মতো করে গ্রামের মাটি, পুকুর বাগান ধানের জমিকে
কেউ ভালোবাসেনি । কলকাতায় তার চলেছে, কারাগারের-বন্দী
জীবন,—অসহ্য, তিক্ত ।

বটুক ঘোষ যদি তাকে বলেন, যাও তুমি মুক্ত, তার গ্রাম পর্যন্ত
দেড়শো মাইল পথ সে হেঁটেই সেরে দিতে পারে ! এমন তার
মানসিক অবস্থা !

॥ চার ॥

সন্ধ্যা হয়ে গেছে।

একটু বাইরে গিয়েছিলাম। কলেজ স্কোয়ারে বার কয়েক চক্র দিয়ে ফিরে এলাম। বেশ শীত পড়েছে আজ। কলেজ স্কোয়ারে তো কাঁপিয়ে দিচ্ছিল। অনেক দিন এরকম শীত পড়েনি। সেখানে দেখি বটুক ঘোষ উর্ধ্বমুখে একটা নাক টিপে এমন জোরে বিশুদ্ধ-হাওয়া নিচ্ছেন যে, ভিড় জমে যাবার উপক্রম। আমি আর ওদিক দিয়ে, গেলাম না। বটুক ঘোষের দৃষ্টি এড়িয়ে ঘাসের উপর একটা অঙ্ককার কোণে গিয়ে বসলাম।

শেষ অপরাহ্নের কলেজ স্কোয়ার পরীক্ষার্থী ছাত্রদের আর ছোট ছোট ছেলেমেয়েরা মেসের অঙ্ককার ঘরে সমস্ত দিন পরীক্ষার পড়া তৈরী করে বেরিয়ে পড়ে। স্বাস্থ্যের জন্যে বিশুদ্ধ হাওয়া দরকার। একটু ব্যায়ামও দরকার। পরীক্ষা পাসের জন্যে মাথায় ঠাণ্ডা হাওয়া লাগানো দরকার। তাই মেসের কোর্টর থেকে এই সময়টা তারা কাঁকে কাঁকে বেরিয়ে পড়ে। পৌঁ পৌঁ করে পার্কের চারদিকে কয়েক বার চক্র দেয়। তারপর একটুক্ষণ বেঞ্চের উপর বসে আবার মেসে ফিরে যায়।

এখন তারা চলে গেছে। বেঞ্চ দখল করেছেন এখন অবসর প্রাপ্ত বৃদ্ধের দল। তাঁদের দল বাঁধা আছে, বেঞ্চও বাঁধা আছে। নিজের নিজের দলের নির্দিষ্ট বেঞ্চের উপর তাঁরা আসর জমিয়েছেন। রোমন্থন করছেন অতীত জীবনের কথা এবং একালের ধঃপতনে শিউরে উঠছেন।

একটু রাত হতেই আরম্ভ হল গৃহস্থ বধূদের আগমন। বেশি নয়, অল্প কয়েকজন। যাদের স্বাস্থ্য একেবারে ভেঙে গেছে তারাই।

বাড়ির পুরুষদের সঙ্গে তারা ঘুরতে লাগল। মধ্যবিস্তৃত গৃহস্থ বধু।

এদের দেখলে স্পষ্ট বোঝা যায় কোথায় নেমে আসছে মধ্যবিস্তৃত সম্প্রদায়। গহনার বালাই নেই বললেই চলে। হাতে সরু সরু ছুঁগাছি করে ব্রোঞ্চে বাঁধানো চুড়ি। গলায় পিট পিট করছে সরু হার। পরণে বছকালের কেনা জমকালো একখানা শাড়ি, যা রাত্রে অন্ধকারেই পরা চলে।

ঘোরার চেয়ে বিশ্রাম নেবার আগ্রহই তাদের বেশি। সন্দের পুরুষটির জন্মে নিতে পারছে না। এর উপর বাড়ি ফেরারও তাড়া আছে। রান্না হয়তো সেরে এসেছে। কিন্তু ঘরে রোগা-পটকা ছেলে আছে। ঘুমিয়ে পড়ার আগেই তাদের খাইয়ে দেওয়া দরকার।

আর এসেছে সেই রকম কয়েকটি তরুণী যাদের রূপ গেছে, স্বাস্থ্য গেছে, কিন্তু চোখ থেকে রোমান্স এখনও একেবারে যায়নি। অনেক লোকের মধ্যে সমস্ত দিন কাটিয়ে তারা স্বামী-স্ত্রী এইখানে, একটা অন্ধকার নিরিবিলি জায়গা দেখে নিশ্চিন্তে কিছুক্ষণ বসতে চায়। পরস্পর কথা হয়তো বলে, হয়তো বলেই না। তবু নিরিবিলিতে বসে যেন পুরোনো সন্ধাকে একটুখানি অনুভব করতে পারে।

তাদেরও ফেরার তাড়া আছে। একটুখানি বসেই উঠে যায়।

আমার তাড়া নেই। তবু বেশিক্ষণ বসতে যেন ভালো লাগে না। আমার সমাজের জরাজীর্ণ প্রতিনিধিরা মনটাকে কেমন বিষিয়ে দিয়ে যায়।

বটুক বাবু ঘুরছিলেন। কিন্তু তাঁকে আর দেখা যাচ্ছে না। সন্ধ্যার দিকে টাইশান আছে। বোধ হয় সেইখানে চলে গেছেন।

আমিও উঠলাম। ধীরে ধীরে মেসের দিকে পা বাড়ালাম !)

মেসে ঢোকরার সরু গলিটা দিনেই অন্ধকার থাকে। রাত্রে তো পা টিপে টিপে হাঁটতে হয়। সম্মুখেই কলতলা; সর্বদা পিছল হয়ে আছে। একটু অসাবধান হলেই অধঃপতনের আশঙ্কা। সেইখান

থেকেই শুনতে পেলাম, নিচের ঘরে গান-বাজনা হচ্ছে।

গান-বাজনা, অর্থাৎ আমি জানি বলে। বাইরের লোকে হঠাৎ এসে ভয় পেয়ে যাবে। অন্ধকার ঘর। মিহি গলায় গান। এবং তদুপযোগী বাজনা। আচমকা মনে হলে হয়, ভূতের কীর্তন হচ্ছে !

—কে ? দাসু আর জয়কালী বুঝি ?

কিন্তু ওরা তখন তন্দ্রায়। আমার কথা হয়তো শুনতেই পেলো না। আর ফিরেছে নরহরি। কতকগুলো সিকি, ছয়ানি, আনি একটা নিভৃত কোণে বসে ঠুন ঠুন করে শুনছে। জামা কাপড়ও ছাড়ে নি তখন পর্যন্ত।

—কি হে, কখন ফিরলে ?

আমার দিকে না ফিরেই নরহরি উত্তর দিলে, এই এক মিনিট। আশুন। কত দূর গিয়েছিলেন ?

—কাছেই। আরে ঠাকুরে চাকরে আজ তুমুল কাণ্ড, একেবারে বাঁটি নিয়ে।

নরহরি সমস্তটা শোনারও প্রয়োজন বোধ করলে না। ওর সবই Summary trial (সরাসরি বিচার)।

ছকুম দিলে, দূর ক'রে দিন ছটোকেই। আমার এখানে ও সব আদিখ্যেতা চলবে না। এ মেসের কাউকে আমি গ্রাহ্য করি না। আপনি নতুন লোক, জানেন না। রক্ষাকর জানে। কি বলছে রক্ষাকর।

ঠিক সেই মুহূর্তেই রক্ষাকর এল।

কিন্তু রক্ষাকরের কিছুমাত্র বলার আগ্রহ দেখা গেল না। বেচারার মুখ শুকনো। জামাটা আলনার দিকে ছুঁড়ে ফেলে দিয়ে রক্ষাকর সটান শুয়ে পড়ল।

—তোমার আবার কি হল ? —নরহরি জিগ্যেস করলে।

—বাড়ী যাওয়া হল না।

রক্ষাকর সশব্দে একটা দীর্ঘশ্বাস ফেললে ।

—সে কি !

রক্ষাকর ঘাড় নেড়ে বললে, হুঁ, মাইনে পেলাম না ।

দুঃখ করবার মতোই কথা । বেচারী বহু সাধ্যসাধনায় সাত দিনের ছুটি পেয়েছে আজ এক বৎসর পরে । কিন্তু মাইনে পেলে না । এদিকে ওর কে এক বন্ধু রেলের কাজ করে, তার মারফৎ শিলেট থেকে কমলালেবু আনিচ্ছে এক বাস্কেট । আনতে দিয়েছিল দেড়শোটা এসে পৌঁছেছে বাহান্নটা । তাতেও দুঃখ ছিল না, যদি ছুটি পেত ।

বললে, তিনটে টাকার অভাব পড়ছে ।

নরহরি বিরক্ত হয়ে বললে, তোমারও দোষ আছে । ট্রেন ভাড়াটা রেখেই জিনিষ কিনতে হয় ! শিলেট থেকে ও-ছাই লেবু আনবার কি দরকার ছিল ? কলকাতায় কি লেবু পাওয়া যায় না ? সবাই শিলেট থেকেই আনাচ্ছে ?

কী যে দরকার ছিল রক্ষাকর ও তা জানে না । কেবল জানে, এক বৎসর পরে বহু সাধ্যসাধনায় সাত দিনের ছুটি মিলেছে । ছুটি যে দেয়, সে কি আর পাওনা মাইনেটা মিটিয়ে না দেবে ? বাড়ী যাওয়ার আনন্দে ওর মন ভরে উঠেছিল । ইতিমধ্যে হয়তো সেই রেলের বন্ধুটির সঙ্গে দেখা হ'য়েছিল । উৎসাহের আধিক্যে তাকে আনতে দিয়েছিল কমলালেবু । এক বৎসর পরে সে বাড়ী যাচ্ছে সেই আনন্দে বোধ হয় কিছু করতে চেয়েছিল । আমি নিজে দেখেছি, রক্ষাকর ওই বাস্কেট নিজে মাথায় করে শেয়ালদা স্টেশন থেকে ব'য়ে এনেছিল এখন ওটার দিকে চাইতেও রাগে ওর গা গড় গড় করছে । লেবু যদি না আনতে দিত কি বুদ্ধিমানের কাজই হত ! কি নিবুজ্জিতাই যে মাথায় চেপেছিল !

নরহরি গম্ভীরভাবে বললে, আচ্ছা, তিনটে টাকা ।

রক্ষাকর লাফিয়ে উঠল । চীৎকার করে বললে, মাইরি !

ঠোট উলটে নরহরি বললে, নিও তিনটে টাকা। ভারী তো টাকা।
রক্ষাকর যেন আকাশের চাঁদ হাতে পেল।

বললে, তাহ'লে আর আট আনা দিও ভাই। ছোট ভাইটির,
জন্মে একখানা শেলেট নিয়ে যাব।

নরহরি তেমনি ভারিক্কি চালে বললে, নিও। ছ-পাঁচটা টাকার
জন্মে কাজ আটকাবে না, বুঝলে? অস্তুত নরহরিবাবু যতক্ষণ আছে।

রক্ষাকর আর উৎসাহ ধরে রাখতে পারছিল না।

বললে, তাহলে কাল সকালের গাড়ীতেই চলে যাই। কি বল?

—বেশ তো।

রক্ষাকর চটপট জামাটা গায়ে দিয়ে নিলে। বললে, কই দাও তো
টাকা।

—এখুনি?

—শেলেট কিনতে হবে যে!

নরহরি সাড়ে তিন টাকা বের করে দিলে। বললে, বাজিয়ে নাও।

কিন্তু রক্ষাকরের তখন বাজাবার ফুরসুৎ নেই। টাকা ক'টা
পকেটে পুরে বললে, ঠিক আছে।

সঙ্গে সঙ্গে নিরীহ রক্ষাকর লড়ায়ের ঘোড়ার মতো সবেগে বেরিয়ে
গেল।

নরহরি হেসে বললে, ট্রাম চাপা না পড়ে তো ভালো।

আধ ঘণ্টাও হয় নি। নিচে ছুটুবাবুর গলা শোনা গেল, সরে যাও,
সরে যাও—সিঁড়িতে কে আছ সরে যাও।

সচকিত হ'য়ে সিঁড়ির মাথায় যেতেই দেখি, ছুটুবাবুর কাঁধে ভর
দিয়ে ঘোষাল মশাই প্রায় অর্ধমৃত অবস্থায় ওপরে ওঠে আসছেন।

আমাদের দেখে ছুটুবাবু চোঁচিয়ে বললেন, বিছানাটাই পেতে দাও,
ঘোষাল মশাই খুন হয়েছেন!

খুন! নরহরির হাত-পা ভয়ে ঠক্ ঠক্ করে কাঁপতে লাগল।

তাড়াতাড়ি মুটুবাবুর বিছানটা যেমন-তেমন-করে পেতে দিলে। ঘোষাল মশাই এসেই নিঃশব্দে ধুপ্ করে শুয়ে পড়লেন। মুটুবাবু আকণ্ঠ লেপটা চাপিয়ে ছিলেন।

নরহরি সভয়ে জিগ্যেস করলে, রক্ত-টক্কর।

মুটুবাবু গম্ভীরভাবে বললেন, রক্ত আবার কি ! জখম হয়েছেন।

মুটুবাবু ব্যস্তভাবে পোষাক ছাড়তে লাগলেন।

একমিনিট চুপ করে থেকে নরহরি বললে, Always time আপনাদের আমি বলি, ট্রামে চড়বেন না। তা ছেলেমানুষ বলে আমার কথা আপনারা গেরাছির মধ্যেই আনেন না।

উত্তেজিত হলে নরহরি মাঝে মাঝে ইংরাজি বলে। এবং ওই রকম ইংরাজি বলে।

মুটুবাবু বাধা দিয়ে বললেন, ট্রাম আবার কোথায় পেলো ? সাইকেল। ভীষণ সাইকেল এক্সিডেন্ট।

ট্রাম নয় ? সাইকেল ? নরহরি ঈষৎ আশ্বস্ত হল। জিগ্যেস করলে কি হয়েছিল ?

মুটুবাবু বললেন, আমরা দুজনে স্কটস্ লেন থেকে বেরিয়ে কেবল আমহাষ্ট' স্ট্রীটে পড়েছি, এমন সময়।

ঘোষাল মশাই এতক্ষণ পর্যন্ত চোখ বুঁজেই ছিলেন। চোখ মেলে হাতের ইঙ্গিতে মুটুবাবুকে বাধা দিয়ে বললেন, উঁহঁ। সাইকেলটা তখন বোঁবাজারের মোড়ে।

ঘোষাল মশাই ঝেড়ে উঠে বসলেন। চোখ পাকিয়ে বলতে লাগলেন, আমার সব টাইম বাঁধা কিনা ! হিসেব করে দেখেছি পাঁচ মিনিটে একবার রেড রোড পার হওয়ার chance পাওয়া যায়। ও সব বোঁবাজারের মোড়-টোড় মিনিট ছুই লাগে। সেই হিসেব করে, মুটুবাবু আমহাষ্ট' স্ট্রীট পার হতে যাচ্ছিলেন, আমিই আটকালাম। আটকালাম কি না ?

হুটুবা বু ঘাড় নেড়ে সায় দিলেন।

ঘোষাল মশাই পরবর্তী কাহিনী বলতে গিয়ে থেমে গেলেন।
পেটে ছোটো কিল মেরে বললেন, দাঁড়ান, পায়খানা থেকে আসি।

নরহরি ভয়ে ভয়ে জিগোস করলে, যেতে পারবেন তো? না,
ধরে নিয়ে যাব?

হাত নেড়ে ঘোষাল মশাই বললেন, কিছু দরকার হবে না।
এইখান থেকে এইটুকু তো!

ঘোষাল মশাই চলে গেলেন।

হুটুবা বু তো হেসেই অস্থির। বললেন, এ ভক্তলোকের সঙ্গে আর
যদি রাস্তায় বেরুই!

—কি হয়েছিল?

—আরে, সাইকেলটা তখন বৌবাজারের মোড়ে, আমরা স্কটস্
লেনের মোড়ে। ঘোষাল মশাই হাত চেপে ধরে বললেন, দাঁড়ান,
দাঁড়ান সাইকেলটা যাক। এখুনি চাপা পড়বেন যে! আধ মিনিট
কেটে গেল, সাইকেল আর আসে না। তখন বললেন, নাঃ! যাওয়াই
যাক। বলে হু'পা এগিয়েই ঠিক যেন বাইকের চাকার নিচে মাথাটা
বাড়িয়ে দিলেন। সাইক্লিষ্টটা ভালো। কোনো রকমে সামলে নিলে।
আর ঘোষাল মশাই গড়াতে গড়াতে ফুটপাথের ধারে গিয়ে পড়লেন
তো আর ডাকাডাকিতেও সাড়া দেন না। এমন ভয় হয়েছিল!

—লেগেছিল নাকি খুব?

—বিশেষ নয়। তবে ভয় পেয়েছিলেন খুব।

হুটুবা বু তামাক সাজতে বসলেন। তারপরে কলকেটা হুঁকোয়
বসিয়ে ছোটো টান দিয়ে বললেন, আর একদিনের কথা তোমাদের
বলি নি?

—না।

—এই গলিটার মোড়ে। ছুজনে আসছি। আমি আগে, ঘোষাল

মশাই পেছনে। তার ক'দিন আগে উনি নতুন জুতোয় নাল বসিয়েছেন। আপন মনে চলছি, হঠাৎ উনি জুতোসমেত লাফিয়ে পড়লেন আমার পায়ের গোছের ওপর। আমি তো উল্টে পড়লাম। উনি আমার ওপরে। ছুজনে জড়াজড়ি করে গোটা রাস্তা গড়াগড়ি দিচ্ছি। কি ব্যাপার জানি নে। যদি একবার উঠেছি, ওঁর টানে আবার পড়ছি। আর পা দিয়ে অঝোরে রক্ত পড়ছে। রাস্তার লোকে তো দৌড়ে এসে শেষে আমাদের ওঠালে। আমি তো হতভম্ব, আর ঘোষাল মশাই থর থর করে কাঁপছেন। কি হল? কি হ'ল? ঘোষালমশাই তবু কথা বলেন না। আমার একখানা হাত ধরে কেবল থর থর ক'রে কাঁপেন! আমি তো অবাক! যন্ত্রণায় পা টনটন করছে, অথচ কি যে হয়েছে জানি না। বহু কষ্টে ঘোষাল মশাই বললেন, ভূত! ভূত! কলকাতার রাস্তায় সন্ধ্যাবেলায় ভূত! লোকজনের হাসি তো থামে না। কোথায় মশাই? ওই সরু গলিটার মোড়ে যে ডাষ্টবিন, ঘোষাল মশাই সেই দিকে আঙুল দিয়ে দেখালেন।

ছুটাবা আপন মনেই হাসতে হাসতে হুকোয় টান দিতে লাগলেন।

—কিছু দেখা গেল?

—গেল। হামাগুড়ি দিয়ে চলে সেই ভিখিরীটা। সে বেটাও ওঁর কাণ্ডে ভয় পেয়ে ডাষ্টবিনের আড়ালে লুকিয়েছে। চূপ কর। ঘোষাল মশাই আসছেন।

ছুটাবা তামাকে মনোনিবেশ করলেন।

ঘোষাল মশাই নীচে থেকেই চোঁচাতে চোঁচাতে এলেন, একটা কথা আপনাকে বলা হয় নি, ছুটাবা।

ছুটাবা জিজ্ঞাসু দৃষ্টিতে ঘোষাল মশায়ের মুখের দিকে চাইলেন।

—কালকে আর-

কথাটা শেষ হতে পেল না। ঘোষাল মশায়ের পায়ে লেগে হারিকেন শেষ হতে পেল না। ঘোষাল মশায়ের পায়ে লেগে হারিকেন গেল উলটে মুটুবাবু তাড়াতাড়ি আলোটা তুললেন। বিশেষ কিছু হয় নি।

বিরক্তভাবে বললেন, এখানে অন্ধকারে আলোটা জ্বলে রাখলে কে রে ?

ঘোষাল মশাই শাস্ত কণ্ঠে বললেন, ও সব চাকরবাকরের কাণ্ড আর কি ! যাক গে। কালকের কথাটা বলি। কাল আর আফিস যাওয়া হয় নি।

—কি হয়েছিল ?

ট্রেন ফেল। আমাদের গুঁচা স্টেশনের কথা বলেন কেন ? আসা-যাওয়া তো প্রায়ই করি। জানি কি না ! ট্রেন আসামাত্র সবাইকে সাবধান করে দিলাম, উঠে পড়, উঠে পড়, গাড়ি বেশি দাঁড়াবে না। সবাই উঠল মশাই, শেষ পর্যন্ত আমারই আর গুঁচা হল না।

ঘোষাল মশাই ফৌকলা দাঁত বের করে শিশুর মতো হাসতে লাগলেন।

মুটুবাবু তামাক খাওয়া শেষ করে ছাঁকোটা ঠেসিয়ে রেখে উঠলেন। গামছাখানা কাঁধে ফেলে বললেন, এখুনি যাবেন না, ঘোষাল মশাই। আমি হাত-মুখ ধুয়ে আসছি। এইখানেই আফিস সেরে খাওয়া-দাওয়া করে তারপর যাবেন। এখনও আপনার শরীর দুর্বল কি না !

কথাটা ঘোষাল মশায়ের মনঃপুত হল। তিনি মাঝখানে আসর জাঁকিয়ে বসলেন। তাঁর মধুর কণ্ঠের সাড়া পেয়ে দাসু এবং জয়কালীও গান-বাজনা ফেলে উঠে এল।

দাসু জিগ্যেস করলে, ঘোষাল মশাই, মিষ্টির দোকানটা উঠিয়ে দিলেন ? বেশ ছিল !

অর্থাৎ মেসের পক্ষে বেশই ছিল। নানা কারণে। বৈকালিক

জলযোগের জন্তে আর কাকেও গাঁটের পয়সা ব্যয় করতে হত না।
অশ্রুমনস্কভাবে বেড়াতে বেড়াতে ওই পাড়ায় গিয়ে ঘোষাল মশায়ের
সামনে পড়লেই হল। ব্যস্। একটি ঠোঙা খাবার বহু অনুরোধে
তার হাতে গুঁজে দিয়ে তবে ঘোষাল মশায়ের অশ্রু কাজ।

ঘোষাল মশাই দুঃখিতভাবে বললেন, বেশ তো ছিল মশাই, কিন্তু
চলল কই? আমার luck খারাপ। বুঝলেন? জামাতা বাবা-
জীবনের যা বুদ্ধি, ওঁর চেয়ে ওঁর শাশুড়ীঠাকরুণকে বসিয়ে দিলে তিনি
দোকান ভালো চালাতেন।

নরহরি বললে, শুনলাম কারিগর যা রেখেছিলেন তারা তেমন
ভালো নয়। অথচ মাইনে বেশী নিত। যত আনাড়ি কারিগর আপনার
দোকানে এসে হাত পাকিয়ে নিয়েছে। আমার অবশ্য শোনা কথা।

উদ্বেজিতভাবে ঘোষাল মশাই বললেন, দূর থেকে অমন অনেক
কথাই শুনবেন মশাই। যত-টত নয়, তবে দু'জন কারিগরের সম্বন্ধে
আমার অবশ্য কিছু সন্দেহ ছিল। তাদের হাত তেমন পাকা ছিল না।
কিন্তু মাইনে বেশি দেওয়া বিশ্বাস করবেন না। ত্রিশ থেকে চল্লিশ।
সে কি আর মেঠায়ের কারিগরের যুগি মাইনে মশাই? শুনবেন
অমন অনেক কথা!

কুটিস্বীকারের ভঙ্গীতে নরহরি বললে, কি জানি মশাই? বললাম
তো, আমাদের শোনা কথা। বটুকবাবু বলছিলেন, তাই শুনেছি।

বটুকবাবুর কথায় ঘোষাল মশাই ভীষণ ক্ষুব্ধ হলেন। বটুক ঘোষ
ছিলেন তাঁর মিষ্টান্ন-ভাণ্ডারের অশ্রুতম ম্যানেজার। তাঁরই মুখে এই
কথা।

ঘোষাল মশাই উদ্বেজিতভাবে হাত নেড়ে বললেন ওঃ! বটুকবাবু।
আর তাঁর কীর্তি শোনে নি বুঝি?

—না তো!

—আমি উপস্থিত না থাকলেই তো হয়েছিল!

—কি রকম ?

ঘোষাল মশাই ভালো করে নড়ে চড়ে বসলেন। বললেন, ও রকম সময়ে কোনোদিন দোকানে বড় একটা যেতাম না। ভগবানের চক্র, ঠিক সেইদিনই গিয়ে উপস্থিত !

ঘোষাল মশায়ের ক্রোধ জল হয়ে গেছে। তিনি কৌকলা দাঁত বের করে হাসছেন।

বললেন, একজন খদ্দের এসে জিগ্যেস করলে, টাটকা রসগোল্লা আছে ? বটুকবাবু অম্লান বদনে বললেন, আছে। দিতে যাচ্ছিলেন মশাই, আমি বললাম, টাটকা রসগোল্লা কি করে থাকবে বটুকবাবু কাল তো ছানা আসে নি !

ঘোষাল মশাই হো হো করে হেসে উঠে বললেন, আমি জানি কি না ! বললাম, আপনাদের লোকসান হতে পারে, তাই বলে লোকের স্বাস্থ্য নষ্ট করার আপনাদের কোনো moral right নেই। লোকটি বটুকবাবুর মুখের ওপর শুনিয়ে দিয়ে গেল উনি না থাকলে ঠকাতেন তো ?

ওঁর হাসি আর থামে না। শব্দ নেই, শুধু গলাটা নাচছে।

হাসি থামিয়ে বললেন, তবে হ্যাঁ, এইটে চলবে।

—কাটা-কাপড়ের দোকানটা ?

—হ্যাঁ।

ডান করতল হারিকেনের স্বল্পালোকেই চোখের স্রুমুখে মেলে ধরলেন।

বললেন, শনির দশাটা এইবার কাটছে। আমি আগেই জানতাম কি না, আটচল্লিশ বছরের আগে আর সুসময় আসছে না।

আটচল্লিশের আর কত বাকী ?—নরহরি জিগ্যেস করলে। ঘোষাল মশাই আবার হো হো করে হেসে উঠলেন।

বললেন, আপনারা আমাকে ছেলেমানুষ ঠাউরেছেন না কি ? আটচল্লিশও পোছে নি ?

একটু থেমে আবার বললেন, তবে এটাতেও একটু মুন্সিল হচ্ছে।

—মুন্সিল আবার কি ?

কবিওয়ালার মতো গালে একটা হাত দিয়ে ঘোষাল মশাই ভব্যযুক্ত হয়ে বললেন, একটা দিনের ঘটনা বলি শুধুন : অনেক হিসেব করে দেখিছি, পাঁচ সিকেতে যে শার্ট বাজারে বিক্রি হয়, তা বারো আনায় দিলেও লাভ থাকে।

—পাঁচ সিকের জিনিস বারো আনায় ?

—আজ্ঞে হ্যাঁ মশাই ! আপনারা তো বিশ্বাস করবেন না। আমার খন্দেরও দাম শুনে পিছিয়ে যায়। বিশ্বাস করে না। অথচ সেই জিনিস পাশের দোকান থেকে পাঁচ সিকিতে নিয়ে যায় চাঁদপানা মুখ করে।

ঘোষাল মশাই হাসতে লাগলেন।

—তাই হয় মশাই !

—হয় মানে ? হয়েছে। আমার দোকান থেকে খন্দের ফিরে গেছে। পাশের দোকানদার আমারই কাছ থেকে সেই জিনিস নিয়ে গিয়ে পাঁচ সিকেয় বেচেছে।

ঘোষাল মশাই ললাটে করাঘাত করলেন।

বললেন, এত ছুঃখেও হাসি আসে মশাই। আমার দোকানের শার্টের দাম দেখে পাশের দোকানদার বললে কি জানেন ? বললে, বারো আনা ! কাটুন, কাটুন। পাঁচসিকে করুন। বারো আনায় নেবে কেন মশাই ? নতুন ব্যবসা করছেন বুঝি ? রীতিমত অপমান করে গেল।

ঘোষাল মশাই সকলের মুখের দিকে পর্যায়ক্রমে চাইতে লাগলেন।

হুটুবা বু ফিরে এলেন।

—আমুন ঘোষাল মশাই ! আহ্নিকের জায়গা করা যাক।

ইয়া।

বলে ঘোষাল মশাই লাফিয়ে উঠলেন। সাইকেল ছর্ঘটনার কথা ভুলেই গেছেন বোধ হয়।

হুটুবাবু যত্ন সহকারে ছ'জনের জন্তে ছ'খানা কুশাসন পাতলেন। কোশাকুশী বের করলেন। নিজে একখানা ছোট ন'হাত কাপড় পরলেন এবং ঘোষালমশাইকেও একখানা দিলেন। তারপর ছ'জনে আফ্রিকে বসলেন।

হুটুবাবু গণ্ডুষ করতে না করতে ঘোষাল মশাই সে সমস্ত সেরে চোখ বন্ধ করে ঢুলতে লাগলেন। সে বড় সহজ দোলা নয়, পাঠশালে কিস্বা মজুবে বই পড়তে পড়তে ছেলেরা যেমন করে দোলে তেমনি দোলা।

হুটুবাবু চোখ বুঁজতে গিয়ে থমকে গেলেন। অবাক হয়ে একবার সে দৃশ্য দেখে ধীরে ধীরে চোখ বন্ধ করলেন। আফ্রিকের মস্ত তখন তাঁর স্মৃতিপট থেকে বেমালাম মুছে গেছে। হুটুবাবু তাই নিয়ে স্মৃতিশক্তির সঙ্গে রীতিমত যুদ্ধ আরম্ভ করে দিয়েছেন।

এমন সময়ে কেণ্টা এসে ডাকলে, ভাত খাবেন, না রুটি খাবেন?

হুটুবাবু কপাল কুঞ্চিত করলেন। সাড়া দিলেন না।

কেণ্টা আবার জিগোস করলে, হুটুবাবুকে বলছি। ভাত খাবেন, না রুটি খাবেন?

হুটুবাবু আর ক্রোধ সম্বরণ করতে পারলেন না। তড়াক করে লাফিয়ে উঠলেন। ভয় পেয়ে ঘোষাল মশাইও সঙ্গে সঙ্গে লাফিয়ে উঠলেন।

—বলছি।

বলে একটা ছাতা নিয়ে হুটুবাবু কেণ্টাকে তাড়া করলেন।

কেণ্টা বোধ হয় এ জন্তে তৈরী হয়েই ছিল। হুটুবাবু লাফিয়ে ওঠার সঙ্গে সঙ্গে এক ছুটে রাস্তায় গিয়ে দাঁড়াল।

মুটুবাবু তখন রাগে কাঁপছেন। কেঁটাকে কি যে গাল দিচ্ছেন, সে আর বোঝা যাচ্ছে না। সবাই মিলে তাঁকে বহু কষ্টে শান্ত করবার চেষ্টা করলে।

নরহরি বললে, ছেলেমানুষ ! হয় তো জানতো না !

—ছেলেমানুষ ! জানতো না ! আজ ওর হাড় এক জায়গায় মাংস এক জায়গায় করব তবে আমার নাম মুটুবিহারী।

ছাতাটা যথাস্থানে রাখতে রাখতে বললেন, জানতো না ! ওর সব বদমাইসী !

—না, না।

—আর না, না। তুমি আমার চেয়ে বেশী জান ? পায়খানায় গিয়েছি। জানে, আমি পায়খানায় গিয়ে কথা বলি না, সেইখানে জিগ্যেস করতে গিয়েছে, ভাত খাব, না রুটি খাব। যখন ফিরে এলাম, একটি কথাও জিগ্যেস করলে না। পাশ কাটিয়ে পালাল। তাকে তাকে ছিল, কখন আফ্রিকে বসি। যেই বসেছি অমনি এসে উপস্থিত। বেটা হারামজাদা !

ঘোষাল মশাই এতক্ষণ পর্যন্ত চুপ করে ছিলেন। মুটুবাবু চুপ করতে বললেন, তাই হোক ! আপনি যে রকম চমকে উঠলেন, ভাবলাম সাপ !

সাপের কথা বলেই ওঁর অণ্ড একটা কথা মনে পড়ে গেল। বললেন, আরে মশাই, ক’দিন থেকেই সাপের স্বপ্ন দেখছি। বলে, সাপের স্বপ্ন দেখলে টাকা পাওয়া যায়। এবারের লটারিটা লেগে যায় বুঝি।

ঘোষাল মশাই হো-হো করে হেসে উঠলেন। কিন্তু তখনই তাড়াতাড়ি সশব্দে গণ্ডুষ করে বললেন, যাক গে। আজ কেবলই আফ্রিকের বিপ্লব হচ্ছে। বসুন মুটুবাবু !

বলে আর একবার গণ্ডুষ করে মাথায় গজাজল ছিটিয়ে আবার চোখ বন্ধ করলেন।

ছ'জনে আবার জপে বসলেন।

রক্ষাকর তখনও ফেরে নি। ছোটরা দলে মাত্র তিন জন। রক্ষাকরের ফিরতে দেরী আছে। তার ভরসা কম। এখন মুটুবাবুর আঙ্গিক শেষ হলোই তাসে বসতে পারে।

মুটুবাবুর দিকে বার কয়েক উৎসুকভাবে চেয়ে তারা ইতিমধ্যে মাতুর বিছিয়ে ফেললে এবং আগ্রহ দমনের জন্তে অকারণেই তাস পিটতে লাগল।

দল পর্যন্ত ভাগ হয়ে গেছে। তিন জনে তিন কোণে বসেছে। মুটুবাবুর জায়গাটা খালি। তিনি জপ সেরে উঠলেই খেলা আরম্ভ হবে।

হঠাৎ ঘোষাল মশাই জপ করতে করতেই সোয়েটারের এ-পকেট ও-পকেট খুঁজে মুটুবাবুকে এক ঠেলা দিয়ে লাফিয়ে উঠে বললেন, সর্বনাশ হয়েছে !

মুটুবাবু এবারে বোধ হয় অথও মনোযোগের সঙ্গে জপ করছিলেন। ঠেলা খেয়ে কনুই গেড়ে উপর হয়ে পড়ে আর্তনাদ করে উঠলেন, মলাম রে !

ঘোষাল মশায়ের তখন সেদিকে মনোযোগ দেবার সময় নেই। তিনি লাফিয়ে উঠে আলনা থেকে কোট পেড়ে উম্মাদের মতো সেটা যেদিক সেদিক দিয়ে গায়ে দেবার চেষ্টা করছেন, আর ছটফট করছেন। পা লেগে কোশা-কুশী গেছে উলটে। গঙ্গাজলেব ধারা বয়ে চলেছে।

—কী হল ? কি হল ?

জয়কালী তাড়াতাড়ি এসে মুটুবাবুকে তুললে। দাসু আর নরহরি ঘোষাল মশাইকে শাস্ত করার প্রয়াস পেতে লাগল।

—কি হল কি ?

ঘোষাল মশাই তখন মাথার চুল ছিঁড়ছেন আর ঘরময় দাপাদাপি করে বেড়াচ্ছেন। তাঁর অবস্থা দেখে মুটুবাবু ঘেসটাতে ঘেসটাতে এক কোণে গিয়ে পুঁটলির মতো জড় হয়ে বসেছেন।

—কি ব্যাপার কি বলুন না ?

ভগ্নকণ্ঠে ঘোষাল মশাই বললেন, সর্বনাশ হ'য়েছে ! টিকিট দিয়ে আসা হয় নি। গায়ের কাপড়টা দিন তো ?

টিকিট কি ?

টিকিট ! টিকিট ! আমার ছোট ছেলেটার টিকিট ! জানেন না ?

টিকিটের কথা সকলেই জানে। ঘোষাল মশাই সম্প্রতি দেশ থেকে তাঁর ছোট ছেলেটিকে কলকাতায় এনেছেন। ছেলেমানুষ, যদি কলকাতার রাস্তায় কোনোদিন হারিয়ে যায় সেজ্ঞে তার পকেটে একখানা টিকিট আছে : এটি আমার পুত্র শ্রীমান অমুক, মৃতন কলিকাতায় আসিয়াছে। যদি দৈবদুর্বিপাকে কোনদিন হারাইয়া যায়, বা গাড়ি চাপা পড়ে, কিংবা অন্য কোনো দুর্ঘটনায় মৃত্যু ঘটে, দয়া করিয়া সকাল ছয়টা হইতে সাড়ে নয়টার মধ্যে ও অপরাহ্ন ছয়টার পর অমুক ঠিকানায় এবং দশটা হইতে সাড়ে পাঁচটা পর্য্যন্ত অমুক (আফিসের) ঠিকানায় আমাকে সংবাদ দিলে অনুগৃহীত হইব। ইতি বিনীত শ্রীঅপরেণচন্দ্র ঘোষাল।

সেই টিকিটখানা আজ আফিস যাওয়ার সময় ছেলেটির পকেটে রেখে যেতে মনে ছিল না। মনে পড়ল এখন, আফিসে করার সময়। দেখেন টিকিট রয়েছে সোয়েটারের পকেটে।

ঘোষাল মশাই ব্যস্তভাবে বললেন, দিন না গায়ের কাপড় খানা ! আঃ

ওদের আর দিতে হল না। তিনি নিজেই এক লাফে সেটা পেড়ে নিয়ে ঝড়ের বেগে বেরিয়ে গেলেন। বলতে বলতে গেলেন, ছেলেটা যদি ভগবানের ইচ্ছায় বেঁচে থাকে তবেই রাত্রে ফিরব, নইলে নয় !

সবাই জানে, ঘোষাল মশাই ব্যস্তবাগীশ লোক। তাঁর কোনো কাজে সেজ্ঞে কেউই ব্যস্তও হয় না, বিস্থিতও হয় না। ছেলেরা আবার এসে তিন কোণে তিন জন বসল।

এতক্ষণ পরে হুটুবা বু নিশব্দে উঠলেন। আহ্নিকের আসন কোশাকুশী তুলে রাখলেন। মাথায় একটু গঙ্গাজল ছিটিয়ে, মাথুলির জল গণ্ডুষ করে, ঘরের যাবতীয় দেবদেবীর ছবির নিচে দেওয়ালে মাথা ঠেকিয়ে প্রণাম করলেন। তাঁর মাথার তেলে সে জায়গাগুলো কালো হয়ে গেছে।

এ সব সেরে কৌথাতে কৌথাতে আপন মনেই বিড় বিড় করে বলতে লাগলেন, আহ্নিক তো ভালোই হল! কার মুখ দেখে উঠেছিলাম কে জানে! ওদিকে আপিসে ওই! এদিকে শরীরের অবস্থাও এই! সারা রাত কেবল মরা মানুষের স্বপ্ন দেখি এইবার হয়ে এসেছে আর কি! বাড়ীর চিঠিও অনেক দিন পেলাম না। তারাই বা সব কেমন আছে ভগবান জানে! যাক্গে। আপিসে তো বেচাকেনা বন্ধ। বড় বাবুকে বললাম...যাক্গে! কনুইটাও চিন্চিন্ করছে। রক্ত টক্ট পড়ল কি না দোখ! তাস পেড়েছ নাকি? বাঁটো বাঁটো। তোমাদের সঙ্গে খেলতেও ইচ্ছে করে না। হাঁটুর বয়সী সব। লোকে দেখলেই বা বলবে কি।

হুটুবা বু কাপড়ের খুঁটটা অনাবশ্যক একবার ফট ফট করে ঝেড়ে তাসের আসরে এসে বসলেন। বলতে লাগলেন :

—চুপ চাপ বসে থাকলেই নানা হুশিস্তা আসে কি না। তাই একটু বসি। নাও, গুণে ছ'বাজি খেলব। কত ডাক হল? কুড়ি? কে ডাকলে? আচ্ছা, আমি পাশ। ওরে কেণ্টা।

কেণ্টা নিচে থেকে মোলায়েম সুরে সাড়া দিলে, কি বলছেন?

—আরে, আমার ত্রিফলা ভিজুতে দিয়েছিস।

—দিয়েছি।

—বেশ, বেশ। কাপড়টা নীচে রেখে এসেছি, কেচে দিস তো বাবা। একটু জ্বরের মতো হয়েছে। আর জল ঘাঁটতে পারলাম না। গোলাম কার? ওদের? রং কি হয়েছে? নেই! যাক বাঁচা গেল।

কি করতে ডাকতে গেলে ? খেলা হবে না । ফেলে দাও । বটুক বাবুকে দেখছি না তা ? গেলেন কোথায় ?

জয়কালী সশব্দে একটা তুরুপ করে বললে, নেমস্তন্ন ।

মুটুবাবু খুশি হয়ে বললেন, তুরুপ করলে ? বেশ বেশ । এমনি খেল দেখি বারকয়েক ! কোথায় নেমস্তন্ন ?

দাসু হেসে বললে, অবধূতের সবাঙ্কবে নেমস্তন্ন ? সেই সূত্রে বটুক বাবুও গেছেন ।

আর একটা পিঠ তুলতে মুটুবাবু বললেন, আজ তাহলে খাঁচি বোঝাই করবে বল ? ভালোতে মন্দতে, অঁ্যা ? পেট নিটোল করে ফিরবে । কিসের নেমস্তন্ন বটে ?

জয়কালী বিরক্ত ভাবে বললে, কে জানে মশাই । বলছিল বিয়ের নেমস্তন্ন তাই শুনলাম ।

একটা গোলাম খেলে মুটুবাবু জিগোস করলেন, বরযাত্রী ? না বৌভাত ? তুমিও গেলে না কেন ?

পিঠ তুলতে তুলতে জয়কালী বললে, আমি কি করতে যাব ?

—কি করতে ! ভালটা মন্দটা খেতে । শরীর খারাপ, শরীর খারাপ কর, শীতের স্নতপক্ক জিনিস খেলে গায়ে বল হত কত !

জয়কালী জবাব দিলে না । ফোঁটা গুণতে লাগল । গোণা শেষ হলে সশব্দে মেঝেয় একটা চাঁটি দিয়ে বললে, লাল বের করুন ।

—হয়েছে ?

—হবে না তো কি, ইয়ার্কি !

মুটুবাবু লাল বের করতে করতে বললেন, বেশ ! বেশ ! খেল তো তুমি ভালোই ! মাঝে মাঝে মাথা বিগড়ে গেলেই যা তা খেল ।

নরহরি আর দাসুতে লেগে গেল তুমুল ঝগড়া ।

নরহরি বললে, আর ডাকলে না কেন ?

দাসু বললে, কুড়ি অবধি ডাকলাম, আবার কত ডাকব ? মাথা খারাপ ! হা হা হা !

দাসু শেলায়ের কলের মতো মাথা নাড়তে লাগল ।

নরহরি মুখ বেঁকিয়ে বললে, ডাকবে না ? ওরা খেলা করবে ?

দাসু মুরুবির মতো বললে, আরে বাপু, আমার হাতে ছিল কী ? ওরই খেলা হত না ।

—না, হ'ত না ! আমি এখানে যেন গাছ বসে আছি । তোমার সঙ্গে বসাই ঝকমারি ! নাও, বাঁটো ! রক্ষাকরও এই সময় পালাল ! একটু পরেই রক্ষাকর এল । এক বগলে তার প্লেট, আর এক হাতে কতকগুলো কপি । উদ্ভেজনা মুখ রক্তবর্ণ ।

হুটুবা বু তাস থেকে চোখ তুলে জিগোস করলেন, কাল যাচ্ছ না কি ? কি কিনলে ?

রক্ষাকর সে কথার উত্তর না দিয়ে বললে, বেশি খরচ হয়ে গেল । বাড়ি গিয়ে আর একটা পয়সাও হাতে থাকবে না ।

নরহরি মেজাজের সঙ্গে বললে, আমি আর একটা পাইস্ও দিতে পারব না । এই এক কথা বলে দিলাম ।

হুটুবা বু আবার জিজ্ঞাস করলেন, কি কিনলে ? কপি ? তোমার কমলা লেবু আসবার কথা ছিল এসেছে ? ওটা কি ? শেলেট ? সাবান কেননি ? ঝাল মসলা ? তবে আর কি কিনলে ?

কথাটা সত্যি । রক্ষাকরের বাড়ীতে শিলেটের কমলা লেবু খাওয়ার লোক বেশি নেই । অত কপি নিয়েই বা করবে কি ? তার চেয়ে কিছু ঝাল মসলা নিয়ে গেলে সংসারের অনেক উপকার হত । সাবান নিয়ে গেলে কাপড়ে দিয়ে বাঁচত । কিন্তু সাংসারিক বুদ্ধি রক্ষাকরের কম । সেই জন্তে মেসে তাকে বলে, ছপুঠাকুর । বহুকষ্টে নরহরির দাক্ষিণ্যে ক'টা টাকা পেল । তাও হিসেব করে খরচ করতে পারলে না । আবার কিছু কম পড়ল ।

হুটুবা বু বললেন, আচ্ছা, যা হয়েছে তা হয়েছে। বস দেখি এক বাজি। তোমার জন্তে খেলা আটকে আছে।

খেলায় রক্ষাকরের নেশা অসাধারণ। যত গুরুতর কাজেই থাক, তাস পড়লে আর রক্ষা নেই। সব কাজ পণ্ড হবে। হুটুবাবুরও নেশা আছে বটে, কিন্তু এত নয়।

রক্ষাকর অর্থের অপব্যয় সম্বন্ধে আক্ষেপ করবার অবসর পেলেন না। কপিগুলো এক কোণে ফেলে রেখে বললে, এই যে, যাঁই।

হুটুবা বু বললেন, ওঠো জয়কালী। রক্ষাকরকে একটু খেলতে দাও।

কিন্তু নরহরি তাকে আপত্তি জানালে। বললে, না, না, ওখানে নয়। দাসুকে উঠিয়ে দাও। দিয়ে বস। আনাড়ী নিয়ে খেলা পোষায় না।

দাসুও ঝাঁঝিয়ে উঠল। বললে, তুমি ওঠ না কেন? খেলা শেষ, শিখে খেলতে এস।

ঝগড়া ক্রমেই বেড়ে চলল। অবশেষে নরহরি বিরক্তভাবে উঠে বিছানায় গিয়ে লেপ মুড়ি দিলে। আর তাঁর জায়গায় রক্ষাকর বসল।

খানিক পরে পান চিবুতে চিবুতে হাবলু এল।

এবেলা পোষাকটা বদলেছে। হাতে “সুনয়নী সাহিত্য মন্দিরের” “দলিতা ফণিনী”। মলাটের ওপর দর্পণের সম্মুখে প্রসাধননিরতা ঈশ্বরগুবন্ধা একটি রমণীর রমনীয় রঙীন ছবি।

এসেই বললে, কাল গড়ের মাঠে প্যারেড্ দেখতে যাচ্ছেন তো?

কিন্তু সে কথা কারও কাণে গেল না। তখন “দলিতা ফণিনী” নিয়ে কাড়াকাড়ি পড়ে গেছে। আগ্রহ রক্ষাকরের সব চেয়ে বেশি। কিন্তু তাকে সবাই প্রথম চোটেই খামিয়ে দিলে।

বললে, তুমি কাল বাড়ী যাচ্ছ, পড়বে কখন?

—কেন, ঐনে।

জয়কালী ব্যঙ্গ করে বললে, ওরে বাবা! সখ দেখে বাঁচি নে।
সে সব হবে না। আমায় দিন মশাই, কাল বিকেলে ফেরত পাবেন।

হাবুল হাঁটু দোলাতে দোলাতে বললে, পাগল!

মুটুবাবু বললেন, আরে, ও বইএর তুমি বুঝবে কি! খুব কঠিন
বই, একটা লাইনও বুঝতে পারবে না।

জয়কালী তখন বইখানা ছিনিয়ে নিয়ে হাঁটুর নিচে রেখেছে।
মাথায় একটা ঝাঁকি দিয়ে বললে, না মশাই, বুঝতে পারব না?
অমাদের প্রেসে কত বই ছাপা হয়! তার লেখাই আপনারা কেউ
পড়তে পারবেন না, এমম জড়ান।

ক্ষুণ্ণ কণ্ঠে আবার বললে, কত বই পড়লাম মশাই! বুঝতে পারব
না! • হুঃ!

মুটুবাবু বললেন, তা বলিনি। তুমি পড়বে কখন? প্রেসের
কাজ করবে? না, পড়বে?

চাকরী ছাড়ার কথাটা আর জয়কালী এই মজলিসে প্রকাশ
করতে সাহস করলে না। পাছে দাদার কাণে ওঠে। সে স্থির
করেছে, ছপুর বেলাটা কলেজ স্কোয়ারে কাটাবে। “দলিতা
কণিনী” হবে সময় কাটানোর অবলম্বন। সেই জগ্গেই এত
আগ্রহ।

কিন্তু হাবুলকিছুতে সম্মত হল না। বললে, পাগল নাকি!
আমি নিজেই এখনও পড়ি নি। অনেক দিন থেকে বইখানা পড়বার
জগ্গে খুঁজছিলাম। বহু কষ্টে পেয়েছি। না পড়ে আমি ব্রহ্মা-বিষ্ণু-
মহেশ্বরকেও দোব না।

তবে আর নব্বর মানব সন্তানের আশা ভরসা কি! জয়কালী
অনিচ্ছার সঙ্গে বইখানা বের করে দিলে।

দান্দু শেলায়ের কলের সূঁচের মতো মাথাটা নেড়ে নেড়ে হাসলে।

বললে' ওই এক রোগ ! আমার এক দাদা আছে, নব্বুই টাকা দিয়ে বই' কিনেছে ।

ছুটবাবু বিষয়ে চক্ষুস্থির করলেন, বললেন বল কি হে ! এ বাজারে এক বিঘে উৎকৃষ্ট জমি হত যে ! তোমার দাদার মাথা খারাপ না কি !

দাসু সেই রকমভাবে মাথা নাড়তে নাড়তে তাস বাঁটতে লাগল । কিছু উত্তর দিলে না !

নিজের তাস তুলে নিয়ে জয়কালী গম্ভীরভাবে বলল, অত সখ আমার নেই ।

নরহরি এতক্ষণ নিঃশব্দে পড়ে ছিল । এখন কাছিমের মতো লেপ থেকে মুখ বের ক'রে বললে, আরে দিয়ে দাও ওর বই । কত বই চাও বল না !

ছুটবাবু জিগ্যেস করলেন, তুমি বই কোথায় পাবে ?

নরহরি বিছানা ছেড়ে উঠতে উঠতে বলল, ছ'চার খানা বই এর জন্তে কাজ আটকায় না ! বুঝলেন ? নরহরিবাবু থাকতে ।

জয়কালী বিরক্ত হয়ে বললে, ওঃ ! ভারি আমার বাবু !

—একশোবার বাবু ! এ মেসে বাবু যদি কেউ থাকে তো আমি । সব ক'টাকে পকেটে পুরতে পারি । চলহে দাসু, খেয়ে আসি ।

—নিশ্চয়

বলে হাবলুর হাতে তাস দিয়ে দাসু উঠল ।

নরহরি বলতে বলতে গেল, বই পড়ে সব হবে !

সবাই খাওয়া-দাওয়া সেরে বিছানা পেতে শোয়ার আয়োজন করেছে এমন সময় বটুক ঘোষ আর অবধূত ফিরে এল । রাত্রি তখন এগারোটার কম নয় ! অবধূত আর দাসু দুই ভাই এক বিছানায় শোয় । দাসু আগেই ছ'খানা মাদুর পর পর পেতে বিছানা তৈরী করেছে ।

কিন্তু অরধূত ফুদ ফুদ আরম্ভ করলে :

ঝাঁট দেওয়া হয়েছে? ঝাঁট হয়েছে? বালি কিচ্‌ কিচ্‌ করছে
যে। দান্দু, ওঠ। ওরে কেঁটা!

দান্দুর কেবল ঘুম আসছিল। বিরক্তভাবে বললে, ঝাঁট দিয়ে
গেছে কেঁটা।

—গেছে! এ সর কি হয়ে আছে! হুঁঃ! বালি কিচ্‌ কিচ্‌
করছে। এই কেঁটা!

নিচে থেকে কেঁটা সাড়া দিল। এখনি ঝাঁট দেলাম যে!

দান্দু রেগে বললে, তবে আপনি যে-টুকুতে শোবেন সেইটুকু
ঝাঁট দিয়ে নিন। আমি আর উঠতে পারব না। প্রত্যহ ঠিক ঘুমের
সময় এসে বিরক্ত করা। জিজ্ঞাস্য করুন দেখি পাঁচজনকে, ঝাঁট
দিয়েছে কি না।

অবধূতের তবু বিশ্বাস হ'ল না। বললে, পাঁচজনকে আবার
জিজ্ঞাস্য করব কি? আমি নিজে দেখতে পাচ্ছি না?

—তবে যা মন তাই করুন, আমি আর উঠতে পারি না।

বলে দান্দু পাশ ফিরে গুল।

জয়কালী মাথা তুলে বললে, আরে মশাই, ঝাঁট দিয়েছে।
আপনার ষত বাড়াবাড়ি। তবু যদি একটা তোষক থাকত!

অবধূত খেঁকিয়ে বললে, উঃ! তোষক থাকত! তুমি শোও না
ওইখানে। দেখি কেমন বাহাদুর!

জয়কালী তৎক্ষণাৎ রাজি হয়ে বললে, আসুন এইখানে। আমি
ওখানে শুছি।

এ প্রস্তাবেও অবধূত রাজি হল না। শেষ পর্যন্ত দান্দুকে সে
ওঠালে। নিজে একটা ঝাঁটা এনে জায়গাটা পরিষ্কার করলে। মাতুর
ছোটো ফের ঝেড়ে নতুন করে পাতলে। বিলিতি কবুল এবং ছোঁড়া
কাপড়খানা যা যথাক্রমে তোষক এবং বিছানার চাদর হিসেবে ব্যবহৃত
হয় সে ছোটোও ফের নতুন করে পাতা হল। এই আধ ঘণ্টা দান্দু
একটা কোণে ঠেস দিয়ে ঝিমুতে লাগল।

বিছানা পাতা হলে নরহরি বললে, ওহে অবধূত, তোমার একখানা চিঠি আছে। পড়ে ছ?

অবধূত আঁচল দিয়ে গাত্রমার্জনা করে বললে, না পড়ি নি। রেখে দাও, কাল সকালে পড়ব।

জয়কালী হেসে উঠল।

বললে, ও চিঠি সকালের ডাকে এসেছে। তখন থেকে পর্যন্ত পড়বার সময়ই পেলেন না? কি এমন কাজ?

—তুমি কি বুঝবে? তুমি কি বুঝবে?

বলে অবধূত আপন মনে বিড় বিড় করে কি বলতে লাগল।

নিচে থেকে ঘোষাল মশাই চেষ্টা করে বললেন, ছুটুবাবু, ছেলেটাকে পাওয়া গেছে মশাই।

—পাওয়া গেছে? কোথায় গিয়েছিল?

—কোথাও যায় নি। ভগবান রক্ষা করেছেন! শরীরটা খারাপ ছিল বলে আর কোথাও বেরোয় নি।

—বেশ!

তারপরে বটুক ঘোষের দিকে ফিরে ছুটুবাবু জিজ্ঞাস্য করলেন, কি রকম হ'ল মশাই?

—বেশ হল।

—লুচি ক'খানা?

বটুক ঘোষ ছুটুবাবুর দিকে পাশ ফিরে শুয়ে বললেন, লুচি বেশি খাই নি খান আঠারো। তবে মাছ খেয়েছি প্রচুর। আর মিষ্টি ও সব মিলিয়ে সের দুই হবে!

—তবে ভো বেশ ভালোই ঠেসেছেন। অবধূত, তুমি ক'সের মিষ্টি ঠাসলে হে? সের তিনেক?

অবধূত শুধু উপেক্ষা ভরে একটা চুমকুড়ি দিলে। আর বটুকবাবু কিক কিক করে হেসে উঠলেন।

হুটুবাবু বুঝলেন, কিছু একটা ঘটেছে।

ভালোমানুষের মতো জিজ্ঞাস করলেন, কেন? কি হয়েছে?
জিনিসপত্র ছিল না?

অবধূত বারকয়েক উপেক্ষাভরে চুমকুড়ি কাটলে। তারপর বললে,
থাকবে না কেন মশাই। সব যে তাড়াতাড়ি খায়, যেন ট্রেন ধরতে
হবে।

বটুকবাবু নিরীহভাবে বললেন, যা বলেছেন! এক ঘণ্টার মধ্যে
খাওয়া দাওয়া সেরে সব উঠে পড়ল।

অবধূত রসিকতাটা ঠিক ধরতে পারলে না। বললে, হঁ। আমি
বখন কপির তরকারীটা খাচ্ছি, তখন সব মিষ্টি খেয়ে গেলোসে
হাত ধুচ্ছে।

—তাহলে মিষ্টি আর তোমার অদৃষ্টে হল না?

—হবে না কেন? উঠে আসবার সময় তাড়াতাড়িতে একটা
মুখে ফেলে দিলাম।

বলে অবধূত মিট মিট করে চেয়ে ফিক ফিক করে হাসতে লাগল।

নীচে ঘোষাল মহাশয়ের মুখ ধোয়ার শব্দ পাওয়া গেল। ●

হুটুবাবু তাড়াতাড়ি লেপ মুড়ি দিয়ে ফিস ফিস করে বলেন, শুয়ে
পড়। শুয়ে পড়। ঘোষাল মশাই যদি জানতে পারেন আমরা জেগে
আছি, আবার এসে হৈ চৈ আরম্ভ করবেন।

ঘোষাল মহাশয়ের ভয়ে জয়কালী তাড়াতাড়ি উঠে আলোটা
নিভিয়ে দিল

শেষ

